CBETA電子佛典集成

CBETA Chinese Electronic Tripitaka Collection ebook

T16n0659

大乘寶雲經

梁 曼陀羅仙共僧伽婆羅譯

目次

- 編輯說明
- 章節目次
 - ∘ 1 序品(一)
 - · 2 十波羅蜜品(一-二)
 - **1**.
 - **2**
 - 。 3 平等品(三)
 - · 4 陀羅尼品(四)
 - · 5 安樂行品(五)
 - ∘ 6 二諦品(六)
- 巻目次
 - · 001
 - 002
 - · 003
 - · 004
 - · 005
 - 006
 - · <u>007</u>
- 贊助資訊

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta..org 回報。
- <u>版權所有</u>,歡迎自由流通,但禁止營利使用。

No. 659 [No. 658] 大乘寶雲經卷第一

梁扶南三藏曼陀羅仙共僧伽婆羅譯

序品第一

如是我聞:

一時佛婆伽槃住伽耶國伽耶頂山,與大僧眾七萬人俱,一切皆是大 阿羅漢——諸漏已盡,無復煩惱;心得自在,心善解脫、慧善解 脫;眾所知識,皆大龍、象;所作已辦,不受後有,捨離重擔,逮 得己利;盡諸有結,善俱解脫,一切自在,究竟彼岸;善達法性, 法王之子;其心調伏,堅固不退,世間八風所不能動;眾德具足, 所願皆滿,住涅槃道——唯除一人,所謂長老阿難。 復與諸大菩薩摩訶薩眾十六萬大士俱——一切皆是一生補處,向一 切智、重一切智、趣一切智、就一切智,得無礙陀羅尼三昧,住於 首楞嚴三昧;悉皆遊戲,藉大神通成熟眾生,不暫休息;無復一切 煩惱、障礙,大慈大悲遍現十方一切國土,善能往反無量佛剎;以 空境界住於無相,動、止、進、退每為利益一切眾生;善行一切諸 佛境界,智慧無邊同於虛空、三昧微妙甚深如海、心不搖動如須彌 山、清淨無穢猶如蓮華、心善明淨如摩尼寶、其心皎潔如鍊真金 ——其名曰:寶相菩薩摩訶薩、寶掌菩薩、寶印掌菩薩、寶冠菩 薩、寶頂菩薩、寶首菩薩、寶積菩薩、寶髻菩薩、寶幢菩薩、金藏 菩薩、金剛藏菩薩、寶藏菩薩、吉藏菩薩、莊嚴藏菩薩、如來藏菩 薩、智慧藏菩薩、日月藏菩薩、三昧藏菩薩、蓮華藏菩薩、解脫月 菩薩、普月菩薩、觀世音菩薩、大勢至菩薩、觀察自在菩薩、普賢 菩薩、普眼菩薩、蓮華眼菩薩、廣眼菩薩、普威儀菩薩、普齊整菩 薩、普悅意菩薩、普禮菩薩、智意菩薩、法意菩薩、勝意菩薩、上 意菩薩、金剛意菩薩、師子奮迅菩薩、大雷聲王菩薩、師子吼菩 薩、深響音菩薩、無污菩薩、無垢菩薩、金剛明菩薩、日光菩薩、 智光菩薩、智吉菩薩、月吉菩薩、芙蓉吉菩薩、寶吉菩薩、文殊師 利童子菩薩等;十六大十,賢護菩薩以為上首;及賢劫中諸大菩 薩,彌勒菩薩以為上首。

四天王天,四大天王以為上首;三十三天,天主帝釋以為上首;夜摩天子,須夜摩天以為上首;兜率諸天,刪兜率陀天以為上首;化樂諸天,化樂天主以為上首;他化自在諸天,自在天主以為上首;與諸梵俱助白諸梵王等一切梵眾,是大梵王以為上首;一切淨居諸天,大自在天以為上首;阿修羅王毘摩質多以為上首,如是等無量

百千阿修羅王;阿耨達龍王、摩那斯龍王、娑竭羅龍王、婆修吉龍王,如是等無量百千龍王,吉威德龍王以為上首;及諸龍女、無量百千天、龍、夜叉、乾闥婆、阿修羅、迦留羅、緊那羅、摩睺羅伽、人非人等。

爾時,大眾圍遶。伽耶頂山廣四由旬,無有地所及虛空中有空缺處 猶若隣虛。是時,大眾聚集,瞻仰尊顏,一面安坐。

是中寶師子座高一由旬,四方寶座高二十里,無量繒綵敷覆其上, 懸七寶鈴及諸羅網、百千幡華。高座四面一切地界變為金剛,七寶 所成,悅眾人意,平坦如掌,掃灑淨潔,燒諸雜香,無量天華皆散 其上。無量百千蓮華大如車輪,從地踊出,皆是金色,瑠璃為臺、 因陀尼羅珠以為其鬘,香氣馚馥、可愛柔軟,供養世尊。高座四角 不近、不遠,有四寶樹自然而出,高六十里,四維各十五里。

爾時,世尊坐師子座,以平等心善轉法輪、降魔怨敵,世間八風所不能動,無怖、無畏、無怯弱想,如師子王,亦如阿耨達池八功德水湛然盈滿、猶若大海甚深無底、如須彌山安隱不動、如日照了一切世間、如月悅樂一切群品、如大龍王遍雨法雨、如大梵王出過三界。無量調順弟子圍遶,無量百千釋、梵、護世諸天恭敬禮拜,心不高下,光明照曜一切大眾。

是時,世尊從頭頂上放大光明——其名普照——無量光明侍從而出,照曜十方無量無邊一切世界。照已收還,右旋三匝而皆入於如來面門。如是入已而無增減,猶如酥油、水等而寫沙中,不增、不減;如來光明亦復如是。

爾時,東方過無量恒河沙數世界,彼有世界名芙蓉華,是中有佛,名芙蓉眼如來、應供、正遍知、明行足、善逝、世間解、無上士、調御丈夫、天人師、佛、世尊,正為菩薩摩訶薩眾演說法要,所謂一大乘道。是中佛剎無有聲聞、辟支佛二乘之名,而彼世界一切眾生悉是菩薩階位,不退於阿耨多羅三藐三菩提。彼佛世界無餘雜食,一切菩薩唯羨禪味以為飲食、唯善法樂以為飲食。是中世界無復日、月、星宿之光,唯是如來光明照了。是方世界無有穢草、砂礫、荊棘及諸黑山,而彼世界平坦如掌。

是中有菩薩摩訶薩名曰薩婆尼弼沙敢毘陣國言此降伏一切障礙菩薩,若有眾生聞是菩薩名字,一彈指頃而發善心即能得除一切障 礙。

爾時,降伏一切障礙菩薩摩訶薩遇是世尊所放光明往照其身,而從住處出詣彼佛,頭面恭敬禮佛足已,一所而坐;及與無量菩薩大眾觸是光明,各各從於住處出詣彼佛,頭面作禮,恭敬已畢却坐一處。

爾時,降伏一切障礙菩薩從座而起,偏袒右肩,右膝著地,在蓮華臺上合掌向佛而前白言:「世尊!何因何緣有此光明遍照,種種雜色不可思議,清淨無垢悅樂一切菩薩身心?」

是時,佛告菩薩言:「善男子!去此西方過恒河沙數世界,彼有佛 剎名娑訶世界,是中有佛名釋迦牟尼如來、應供、正遍知、明行 足、善逝、世間解、無上士、調御丈夫、天人師、佛、世尊。若有 眾生得聞釋迦牟尼佛名號,是諸眾生則不退轉於阿耨多羅三藐三菩提。如是光明則是釋迦如來所放光明,清淨無垢,微妙第一,悅樂 一切菩薩身心。」

作是語已,復白佛言:「世尊!以何義故,有諸眾生得聞釋迦牟尼佛名而不退轉於阿耨多羅三藐三菩提?」

作是問已, 芙蓉眼佛告降伏一切障礙菩薩言: 「善男子! 釋迦如來 於過去世行菩薩時已發誓願: 『我成佛時, 凡是眾生聞我名者皆悉 令得不退轉於阿耨多羅三藐三菩提。』」

「世尊!彼世界中一切眾生聞佛名者盡不退轉耶?」

佛言:「不然。」

「世尊!彼土眾生不聞釋迦牟尼佛名耶?」

佛言:「善男子!皆得聞也。」

「世尊!彼土眾生無退轉者云何不退轉耶?」

佛言:「善男子!是諸眾生種植不退轉因,藉聞彼佛名號而生。今者,如來見是事已,說彼眾生無有退轉,非但聞名而不退轉。善男子!我今為汝當說譬喻,成是義故。善男子!如樹種子若大、若小,但無事礙、具諸外緣,即生萌牙乃至增長。善男子!云何說是為種子耶?」

對曰:「世尊!無事礙故,說為種子。」

佛言:「如是。善男子!聞如來名則便得種不退轉種,是諸眾生即 得名為不退轉於阿耨多羅三藐三菩提。」

復白佛言:「世尊!我今往彼娑訶世界,願樂欲得見釋迦佛、應供、正遍知,親近、恭敬、禮拜、供養。」

爾時,芙蓉眼世尊告降伏一切障礙菩薩摩訶薩言:「善男子!善哉佳矣,往時已到,汝當知之。」

復有無量諸大菩薩悉皆往詣芙蓉眼佛所而白佛言:「世尊!我等皆亦願樂往彼娑訶世界,欲見釋迦牟尼佛,親近、恭敬、尊重、供養。」

爾時,芙蓉眼佛告菩薩眾:「善男子!汝等隨意往之,今正是時。至彼世界,謹慎收攝莫放逸住。何以故?彼土眾生貪欲甚多、嗔恚甚多、愚癡甚多,不持沙門清淨梵行、深樂非法、惡賴姦詐、磣毒麁獷、讒刺言語、穢曲逆耳、惡口罵詈、放逸自恣、傲誕獨高、嘲

調諂曲、形容醜陋、懈怠懶惰、破戒暗鈍、勤行惡業、嫉妬慳貪,無量煩惱之所纏縛。如是彼土眾生眾中,釋迦如來正為說法。」 是等菩薩大眾對如來曰:「世尊!甚難甚難,釋迦如來為彼眾生而 說法耶。」

佛言:「如是,如是。善男子!釋迦如來為彼眾生演說法要,甚難 甚難。善男子!彼土眾生如是麁獷,運一念善甚為艱難。何以故? 若於清淨世界,眾生清淨,修行善法不足為難;娑訶世界如是穢 濁,設彼眾生能運善心一彈指頃甚為希有,一彈指頃歸依於佛、歸 依正法、歸依聖僧甚為希有,一彈指頃受持淨戒甚為希有、一彈指 頃發離欲心甚為希有、一彈指頃運大悲心發阿耨多羅三藐三菩提心 甚為希有。」

是諸菩薩而白佛言:「希有。世尊!希有。善逝!」爾時,一切諸菩薩摩訶薩言:「善哉。世尊!如所教誨,隨順正法,如誨奉行。」

從佛聞已,頂禮佛足,禮竟而出。復為釋迦如來化作種種供養之具:有化寶樹,華果莊嚴,相好圓滿;有化毘琉璃樹、有化玻梨寶樹、有化金銀之樹,及如意樹華果之樹;又化衣雲,及莊嚴雲、香雲、鬘雲、蓋雲并伎樂雲,如是變化合成一雲。是諸菩薩與降伏一切障礙菩薩俱而往娑訶世界。

爾時,降伏一切障礙菩薩報諸菩薩言:「仁者!此娑訶世界眾生,恒為眾苦之所逼惱。善哉,仁者!我等應當為諸眾生作大神通,以神通力令彼眾生遠離眾苦而受快樂。」

是諸菩薩答言:「善哉,善哉。仁者!」

爾時,降伏一切障礙菩薩而作神通,即從身出種種光明——清涼微妙,無有垢穢,悅樂身心——以是光明遍照三千大千世界。是中一切地獄及諸畜生、餓鬼之類及閻羅王,遇此光明皆離眾苦、受諸快樂,無復相殺害心、無忿恨心、無嗔恚心,互相恭敬作父母想。三千大千世界中間無光明處,日月光明、神通道力不能照處,是菩薩光悉皆照了,是中眾生互得相見。又,三千大千世界諸鐵圍山、目真隣山、大目真隣山及餘無量黑山,皆是菩薩光明照了。上至一切諸梵天處乃至有頂,下去乃至地獄——所謂活活地獄、黑繩地獄、合破地獄、叫喚地獄、大叫喚地獄、燒煮地獄、大燒煮地獄、阿鼻地獄,一百三十六諸大地獄及諸寒氷地獄無有方所,諸地獄等非日光明之所能照——遇此光明悉得快樂,息諸苦痛。

以是神通,有諸眾生求食得食、求飲得飲,衣服、車乘、財帛、金銀、珍寶應念而得,無眼得眼、聾者得聞、瘂者能語、失心顛狂而得正念、苦者得樂、懷娠之女產生安隱,無有痛惱。

爾時,一切大地菩薩摩訶薩眾往詣伽耶頂山,是諸大士去山非遠。此三千大千世界七寶羅網遍覆其上,於虛空中兩大蓮華。諸天華雲、果雲、鬘雲、香雲、衣雲、諸散香雲、種種繒綵、幢幡、蓋雲,一切自然空中而現,凡諸眾生觸此雲兩皆得快樂。伽耶頂山諸穢樹木悉不復現,是諸地界悉大清淨,唯有寶樹、意樹、華樹、果樹、檀樹、沈香之樹遍滿其中。

無量天女於虛空中作天伎樂而供養佛,以是音樂出此偈頌歌詠佛 德:

「託生林苑世奇特, 清淨、無污、無等等, 願禮虚空等相故, 我等故來到此國; 於道樹下成等覺, 破碎一切眾魔怨, 我等故來到此國; 願禮無比具威神, 說法如幻、水中月, 眾中轉于妙法輪, 願禮微妙如意樹, 我等故來到此國; 了知世間如夢等, 種種色像如火輪, 願禮不動福慧聚, 我等故來到此國; 於無量劫修雙行, 福慧成滿由大悲, 願禮清淨滿月面, 我等故來到此國; 無量人、天、菩薩眾, 恭敬供養稽首禮, 願禮除暗踰日光, 我等故來到此國; 累劫苦行獲法珍, 慈悲不悋施群品, 願禮自利利(他者, 我等故來到此國; 心淨寂滅慈悲熏, 塵勞不污如蓮華, 願禮無量功德聚, 我等故來到此國; 無為本性非牛滅, 神涌道力現三相, 願禮自在不思議, 我等故來到此國; 救護世間所歸仰, 分明相好莊嚴身, 願禮寶樹無量枝, 我等並齎供養具。」

爾時,偈頌出已未久,長老目連即從座起,偏袒右肩,右膝著地,合掌向佛,恭敬禮畢而白佛言:「世尊!如今瑞相是誰所作?本未曾有、未曾聞見。」

說是語已,佛告長老目揵連言:「目連!東方去此過恒河沙等數世界,彼有世界名芙蓉華,是中有佛名芙蓉眼如來、應、正遍知,即時存在,正說法要。從彼佛土,降伏一切障礙菩薩與無量百千億那由他諸大士,俱來至此娑訶世界現是瑞相。」

佛說是語未久之頃,降伏一切障礙菩薩與百千億那由他諸菩薩俱,以大神通悉詣佛所,與大士俱頭面稽首敬禮佛足,圍繞千匝俱立佛前,以此偈頌一時同音而歎佛曰:

「大名!大勇猛! 大智!大仙尊! 過有諸危嶮, 歸命度彼岸。 光明普照了, 普知眾生性, 普愍、普救拔, 敬禮至極尊; 不動如須彌、 如海深無底, 稽首禮法王; 降諸外道群, 本來無牛滅, 法性體自然, 眾中師子吼, 敬禮轉法輪。 時為說下道、 時今達直如、 時令入涅槃、 或為授記別, 善達三聚性, 時機無不了, 所化諸眾生, 法網如意滿。 好、怒、癡等垢, 及餘無量惑, 华於菩提樹, 以智火燒盡。 自度而度他、 自脫脫世間, 唯佛能濟拔。 三有長牢獄, 無明熟眠眾, 法燈今覺悟, 頂禮群品親。 如是諸菩薩, 皆是佛化生, 願樂聞正法, 世尊為說之。」

爾時,降伏一切障礙菩薩與諸菩薩摩訶薩等以是偈頌歎佛已畢,世尊憐愍聽許復座,俱於蓮華臺上而坐,隨其所應而從座起,偏袒右肩,右膝著蓮華臺,合掌向佛而白佛言:「世尊!我今欲問如來、應供、正遍知隨處少分,唯願世尊!如今所問憐愍答之。」作是語已,佛告降伏一切障礙菩薩言:「大士但問,如來世尊常自聽許。隨意所問,如來當為分別答之。」爾時,降伏一切障礙菩薩蒙佛聽許而白佛言:「世尊!菩薩摩訶薩云何具足檀那波羅蜜?云何具足尸羅波羅蜜?云何具足羼提波羅蜜?云何具足毘梨耶波羅蜜?云何具足禪那波羅蜜?云何具足般若波羅蜜?云何具足擾和俱舍羅波羅蜜?云何具足波尼牢那波羅蜜?云何具足發羅波羅蜜?云何具足邊郡波羅蜜?世尊!云何菩薩鄭志何菩薩與此平等?云何菩薩與水平等?云何菩薩與太平等?云何菩薩如月、如日?云何

菩薩如師子王?世尊!云何菩薩善能調伏?云何菩薩世所知識?云 何菩薩喻若蓮華?云何菩薩發增廣心?云何菩薩得清淨心?云何菩 薩無疑惑心?云何菩薩意如大海?世尊!云何菩薩心解微細?云何 菩薩辯才會理?云何菩薩辯才明了?云何菩薩辯才淨潔?云何菩薩 辯才能悅一切眾生?云何菩薩入壞言語?世尊!云何菩薩利益說 法?云何菩薩無不隨順?云何菩薩善了法界?云何菩薩行於空境? 云何菩薩住於無相?云何菩薩遠離一切心願?云何菩薩以慈為身? 云何菩薩以悲為身?云何菩薩恒歡喜住?云何菩薩住於捨中?云何 菩薩神通遊戲?云何菩薩永離八難?云何菩薩不忘失菩提心?云何 菩薩得宿命智?云何菩薩親近善知識?云何菩薩遠離惡知識?云何 菩薩得如來法身?云何菩薩得金剛不壞身?云何菩薩作大薩泊主? 云何菩薩作大導師?云何菩薩示道不顛倒?云何菩薩恒正憶念?云 何菩薩著糞掃衣?云何菩薩受持三衣?云何菩薩行不低昂?云何菩 薩如法乞食?云何菩薩唯一坐食?云何菩薩不再飲食?云何菩薩住 阿蘭若?云何菩薩依止樹下?云何菩薩習坐露地?云何菩薩住尸陀 林?云何菩薩宴坐不眠?云何菩薩隨官敷座?云何菩薩攝心方法? 云何菩薩用心與理相應?云何菩薩受持修多羅經?云何菩薩受持毘 尼律?云何菩薩具足威儀法用舉止?云何菩薩無慳嫉心?云何菩薩 於諸眾生生平等心?云何菩薩殷勤供養恭敬諸佛?云何菩薩斷除憍 慢?云何菩薩心多清淨?世尊!云何菩薩了知世諦?云何菩薩通達 第一義諦?云何菩薩善解十二因緣?云何菩薩於世間解?云何菩薩 生淨佛剎?云何菩薩不受胎生染污?云何菩薩出離家居?云何菩薩 壽命清淨?云何菩薩心無疲倦?云何菩薩行佛制法?云何菩薩姿顏 悦豫、面無顰蹙?云何菩薩多聞具足?云何菩薩持正法?云何菩薩 生法王子?云何菩薩釋、梵、護世諸天之所奉迎?云何菩薩了知眾 生機性?云何菩薩成熟眾生?云何菩薩堪任正位?云何菩薩共住安 樂?云何菩薩善行攝法?云何菩薩得身端正?云何菩薩為所依止? 云何菩薩喻大藥樹王?云何菩薩福業相應?云何菩薩善能變化?世 尊!云何菩薩速成阿耨多羅三藐三菩提?」

大乘寶雲經十波羅蜜品第二

爾時,佛告降伏一切障礙菩薩摩訶薩言:「善哉,善哉。善男子!重復善哉。汝為利益一切眾生,亦為安樂一切世間,特為莊嚴人天大眾,是故汝今以如是義應問如來。善男子!諦聽諦聽,善思念之,我當為汝分別解說。」

「唯然,世尊!願樂欲聞。」

佛言:「善男子!菩薩摩訶薩具足十法修行檀波羅蜜。何等為十?一者、法施具足,二者、無畏施具足,三者、財施具足,四者、無反報施具足,五者、憐愍施具足,六者、不輕慢施具足,七者、殷重施具足,八者、供養施具足,九者、無所依施具足,十者、淨潔施具足。

「善男子!云何菩薩法施具足?善男子!菩薩無希望心受持正法,不為利養、不為知識、不為名聞種種因緣,但為欲滅一切眾生劇苦因緣,以無著心於諸眾生而為說法,一向平等、無二心故。如於國王、王子、朝臣、富貴之處而為說法,於旃陀羅及下賤人平等說法亦復如是——無二心故——何況於諸萬民都邑一切眾生?如是說法不生憍慢。善男子!是名菩薩法施具足。

「善男子!云何菩薩無畏施具足?善男子!菩薩自身捨棄一切刀仗,不令一切眾生怖畏,以所行法傳勸化他,於諸眾生生父母想、眷屬妻子想、善知識想。何以故?如佛所說:『生生世世流轉無始,無一眾生非是汝等昔時父母、眷屬、妻子、知識——乃至蠕動、一切眾生四生之類——是故,應施其無所畏,割肉飴之勿令怖畏,何況於大眾生?』善男子!如是,菩薩無畏施具足。

「善男子!云何菩薩財施具足?菩薩若見眾生心性弊惡、行不善業,即施財物,施財物竟,止其惡業、令修善行。復更思惟:『如來所說,菩薩行施即滅三種惡法:所謂嫉妬、慳惜、貪愛。是故,我等依如來教而行布施。』如是行施不生傲慢。善男子!如是,菩薩財施具足。

「善男子!云何菩薩不望報施具足?善男子!菩薩行施不為自身、 不為眷屬、不為世俗往還因緣而行布施。是諸菩薩如法布施、性樂 布施,以是因緣,菩薩無有求報恩心。善男子!如是,菩薩不望報 施具足。

「善男子!云何憐愍布施具足?善男子!菩薩見諸困苦眾生,若飢、若渴、若裸、若袒、若披破弊,無救、無護、無歸依處、無所安身、福德微薄,見已則生憐愍殷勤之心:『為是眾生利益安樂,是故我應急行阿耨多羅三藐三菩提。是諸眾生困苦、無救、無護、無歸、無依,流轉生死遍於六道,受諸劇苦無暫休息。我當獨於一切眾生為尊、為師、為將、為上、為首、為導、為救、為護、為歸、為依。』以大憐愍逼切其心,以憐愍故攝受眾生,如是憐愍攝受無量無邊一切眾生,修是善根,不生憍慢。善男子!如是,菩薩憐愍布施具足。

「善男子!云何菩薩無憍慢施具足?善男子!菩薩行施非擲與施、不輕他施、不罵辱施、不前惱施、不恃富貴恍惚而施、不求名譽、

不恃多聞。夫欲行施,殷重而施,前作恭敬,然後方自手施與之。 善男子!如是,菩薩無憍慢施具足。

「善男子!云何菩薩殷重施具足?善男子!菩薩若見和上、師僧、可尊重者及諸同學,以身恭敬而心殷重合掌禮拜,奉迎送去,作和合意,於諸種種修行法事與善相應,常為朋友。善男子!如是,菩薩殷重施具足。

「善男子!云何菩薩供養施具足?善男子!菩薩若於佛前、於法前、僧前而設供養;若至如來塔廟之處,以諸香華而供養之,淨潔掃灑;若如來塔有破壞者即為治理。如是供養諸佛,復於所聽如來正法,讀誦、受持、書寫、演說、思惟其義、如法修行,以無顛倒故如是供養正法。以諸衣服、飲食、臥具、湯藥、種種資生,乃至冷暖湯水悉皆施給,如是供養僧眾。善男子!是名菩薩供養施具足。

「善男子!云何菩薩無所依施具足?善男子!菩薩行布施時不作是願:『以此善根令得生天,若次諸天、若生國王、朝臣、宰相、富貴之處。』善男子!如是,菩薩無所依施具足。

「善男子!云何菩薩淨潔施具足?

「善男子!菩薩如前所說,種種行施善觀察之,如是觀察布施過失、布施垢穢、布施障礙,悉令不生。善男子!如是,菩薩淨潔施 具足。

「善男子!以是十法菩薩檀波羅蜜滿足。

「善男子!菩薩具於十法尸羅波羅蜜具足。何者為十?一者、護持 波羅提木叉禁戒,二者、護持菩薩所應學戒,三者、遠離一切煩惱 燒熱,四者、遠離不善思惟,五者、信業因果,六者、怖畏罪想, 七者、慚愧觀察,八者、受持堅固,九者、無所依戒,十者、三輪 淨戒。

「善男子!云何菩薩護持波羅提木叉戒?若修多羅、若於毘尼及諸經中,『善哉,如來所制禁戒在在處處我應當學、如法受持,不恃種姓、不著諸見、不規徒眾、不見人過、無下劣想、不著雜藝,於是戒律生殷重心,如法受持。』如是,菩薩守護波羅提木叉禁戒。「善男子!云何菩薩守護菩薩所應學戒?善男子!菩薩作是思惟、反覆籌度:『非但受持波羅提木叉戒,我當證得阿耨多羅三藐三菩提。是故,處處經中凡是如來所說菩薩種種威儀,并於所制菩薩種種律儀,我應當學,如法受持。』何者菩薩修威儀戒?菩薩非處、非時不可說法,要知時節、善解國土,以軟美音方為說之。何以故?勿令眾生生不善心,將護彼意,自收六情,菩薩方得菩提行滿。何者律儀戒具足?所謂愛語、軟語、不渾雜住、樂住閑靜、顏

貌和悅。如是,菩薩具威儀已,絓是如來所制諸法律儀,以殷重心 悉皆受持。如是,菩薩守護菩薩所應學戒。

「善男子!云何菩薩遠離一切煩惱燒熱?善男子!菩薩若慾燒熱、 若瞋燒熱、若癡燒熱,及諸無量一切煩惱火所燒熱,或復種種財貨 資生因緣身心熾然,當修三種對治法門,仍姨遠離三毒因緣。

「何者是慾對治?何者是婬欲因緣?修不淨觀是慾對治,一切女色 是婬因緣。何者修不淨觀?所謂觀此身分,其中唯有毛、髮、爪、 齒、皮膚、垢膩、淚、汗、涕、唾、大小便利、筋、肉、血、脈、 腦、膜、肪、[月*冊]、骨、髓、膏、膿、心、肺、脾、腎、肝、 膽、腸、胃、黃白涎癊、生熟二藏,不淨充滿。菩薩如是身分當善 觀察三十六物,如是觀察復更思惟:『有諸嬰兒、凡夫,癡無曉 了、少分善根,尚能觀察三十六物不生貪欲,何況有智、具大人 相、厚種善根?』如是,菩薩修不淨觀。

「何者名為女色?所謂主家母村好能莊嚴色像、外形、姿態,三十 六物假合醜穢以為形相惑諸凡愚。菩薩若眼見已而作是念:『如來 常說一切境界如夢、如幻,皆是虛妄。何有智者於諸境界——如 夢、幻等——而生貪欲?』作是觀察應速遠離,是名菩薩離欲因 緣。

「何者瞋恚對治?何者瞋恚因緣?善男子!菩薩於諸眾生多生慈悲,凡是因緣能生瞋者皆悉遠離。如是,菩薩修瞋對治,離瞋因緣。菩薩作是觀已即得離癡;得離癡已不生惱熱,若被損辱、若失財物亦不生熱。如是,菩薩遠離一切煩惱燋熱。

「善男子!云何菩薩遠離不善思惟?善男子!菩薩獨無伴侶,住於空閑寂靜之處,發如是心:『我今安住無喧雜處、住清淨處,是故,得住如來法律、安樂清淨。有諸沙門剃除鬚髮、被壞色衣而行苦行,近惡知識、不善思惟,是故失於如來所說法律。』如是,菩薩遠離不善思惟。

「云何菩薩信業因果?菩薩作是思惟:『如佛所說:「沙門!夫作功德,應當至心持戒、修智,至到努力。何以故?至心造功德故,當受如意安樂果報。」』如是信故,即得遠離諸不善業,是名菩薩信業因果。

「善男子!云何菩薩怖畏罪想?菩薩於微細罪恒生怖畏,尚不故犯。何以故?如佛所說:『沙門!毒藥體性,若多、若少,俱能殺人;一切罪殃,若大、若小,俱令眾生墮三惡道——地獄、餓鬼、畜生——劇苦之中亦復如是。』思惟是已則生怖畏一切罪想,是名菩薩怖懼罪業。

「云何菩薩慚愧觀察?菩薩與四部眾及諸國民無不親狎,如是等人於菩薩邊而施金、銀、真珠、琉璃、璧玉種種寶物,而是菩薩獨不

生貪;若塔廟物、若僧鬘物,付囑委之而不自用。何以故?如佛所說:『菩薩於己身分乍割其肉隨意用之,而不可以非捨施物而應得用。』如是,菩薩慚愧觀察。

「云何菩薩受持堅固?菩薩若魔眷屬及諸天神之所嬈亂,令生貪著一切財物及五欲樂,其心安住,不動、不搖亦不退轉。如是,菩薩受持堅固。

「云何菩薩無所依求戒?菩薩護持淨戒,作如是念:『不以此戒我當生天及諸天等、國王、帝主、諸大朝臣。』菩薩持戒為無所得故,如是,菩薩無所依戒。

「云何菩薩三輪淨戒?菩薩以身清淨、口、心清淨。何者菩薩身清 淨戒?絓是一切身業不善,所謂殺生、偷盜、邪<mark>婬</mark>等,皆悉遠離, 是名菩薩身業清淨。何者菩薩口業清淨?絓是一切口業不善,所謂 妄語、兩舌、惡口、罵詈、破散戲語,皆悉遠離,是名菩薩口業清 淨。何者菩薩心業清淨?絓是心業一切不善,所謂貪欲、瞋恚、愚 癡等,皆悉遠離,是名菩薩心業清淨。如是,名為三輪淨戒。

「善男子!是名菩薩摩訶薩尸羅波羅蜜清淨具足。

「善男子!菩薩具有十法,羼提波羅蜜具足。何等為十?一者、內 忍具足,二者、外忍具足,三者、法忍具足,四者、佛印可忍具 足,五者、無方所忍具足,六者、平等忍具足,七者、不見事忍具 足,八者、不搖動忍具足,九者、慈悲忍具足,十者、成就誓願忍 具足。

「善男子!云何菩薩內忍具足?內有憂悲、苦惱、愁毒、惆悵、憒 悶,悉皆忍之,默然不熱,是名菩薩內忍具足。

「云何菩薩外忍具足?善男子!菩薩聞有惡口、罵詈、種種誹謗, 及其父母、一切眷屬、和上師僧,乃至誹謗佛、法、僧寶,聞已不 瞋、不惱、不入內懷,而堪忍之無怨恨心,是名菩薩外忍具足。

「云何菩薩法忍具足?菩薩摩訶薩於諸如來所說甚深經教斷諸疑惑, 意趣難達諸佛境界, 所謂諸法本來寂靜, 不生、不滅, 性自涅槃, 聞如是法不恐、不怖、不驚、不畏, 即便作是進退思惟: 『頗有一人不聞如來如是甚深微妙正法得成阿耨多羅三藐三菩提耶?』以是因緣,應當至心受持、讀誦、觀察、修行如是正法, 是名菩薩法忍具足。

「云何佛所印可忍具足?菩薩靡訶薩若生瞋恨,即當至心諦善思惟:『如此瞋者,何由而生?又何處滅?復誰所生?云何而生?藉何因生?』如是觀察,不見瞋因、不見生處、不見源由,以是因緣即便忍之,不生煩惱,是名菩薩佛所印可忍具足。

「云何無方所忍具足?菩薩非晝日忍、夜中不忍,非夜中忍、晝日 不忍,非此國忍、彼國不忍,非彼國忍、此國不忍,非知識不忍、 知識而忍,非不知識忍、知識不忍。菩薩不爾,於一切時、在在處處皆悉安耐一切能忍,是名菩薩無方所忍具足。

「云何菩薩平等忍具足?菩薩不但於其父母、尊長、妻子、一切眷屬等所而為堪忍、餘處不忍,菩薩不然。何以故?菩薩堪忍,無有親疎、不問尊卑及旃陀羅,以平等心而堪忍之,是名菩薩平等忍具足。

「云何菩薩不見事忍具足?菩薩不以事緣故忍、不為名聞故忍、不 為世流布忍、不為慚愧故忍。菩薩在在處處常修忍辱,是名菩薩不 見事忍具足。

「云何菩薩不擾動忍具足?菩薩瞋恚未發之前,為惡不生而暫忍辱,不名為忍;若遇惡境——或以手捲、若以刀仗、或打、或殺、或口罵辱——菩薩皆忍,是名菩薩不擾動忍具足。

「云何菩薩慈悲忍具足?菩薩若作國王、王子、朝臣、富貴,多饒 財寶、得自在力,設被罵辱、毀呰、誹謗、種種輕欺悉皆堪忍,不 瞋、不恨、不逞富貴,而作是念:『是等眾生我皆荷負、我所守 護,是故不可於所守護增加瞋恚便棄捨之。』以是因緣,興大慈 悲,能堪忍之,不生瞋恨,是名菩薩慈悲忍具足。

「云何菩薩誓願忍具足?菩薩摩訶薩應作是念:『我於如來、應供、正遍知前作師子吼:「我當修行阿耨多羅三藐三菩提,見諸眾生沈滯生死、沒深淤泥,我應拔濟令得度脫。」是故,我今不可以於所度之眾多生瞋忿、起怨憾心、不耐不忍。若我不忍,尚不自渡,何況渡人?』

「善男子!譬如醫王見諸盲人便作是念:『我今當為如是人等除其 目中一切暗翳、種種障膜。』雖作是念而是醫師本自盲冥。善男 子!於意云何?如是醫師能為眾生除眼翳不?」

對曰:「不也。世尊!」

佛言:「善男子!如是,菩薩於此無明生盲世界自無慧眼,云何能除世間無明?自眼翳障尚不能治,豈能治他?以是因緣,菩薩欲除一切眾生無明暝者,應前自除一切暗障後及於人。是故,菩薩應堪忍之,不生瞋恨。如是,菩薩自誓願忍具足。

「善男子!是名菩薩摩訶薩具足十法,忍波羅蜜滿足。 大乘寶雲經卷第一

梁扶南三藏曼陀羅仙共僧伽婆羅等譯

十波羅蜜品之二

「善男子!菩薩摩訶薩具足十法,毘梨耶波羅蜜滿足。何等為十? 一者、金剛不壞精進,二者、勇猛精進,三者、離兩邊精進,四 者、增廣精進,五者、練治精進,六者、無休息精進,七者、清淨 精進,八者、無比精進,九者、無輕蔑精進,十者、非策精進。 「善男子!云何菩薩精進不壞,喻如金剛?菩薩摩訶薩勇猛精進,

發弘誓願為諸眾生,未涅槃者令得涅槃、未得度者而令得度、未解 脫者令得解脫、未安立者令得安立、未覺悟者令得覺悟。如是勇猛 運廣大心時,魔波旬即便往到是菩薩所而諫之曰:『善男子!無勞 如是勇猛精進。何以故?善男子!我昔已曾如是勇猛,亦為眾生發 弘誓願,未涅槃者令得涅槃。如是誓願皆是妄語,欺誑世間嬰兒、凡夫,無有真實。善男子!我未曾見頗有一人如是精進、發弘誓 願,以願力故得成阿耨多羅三藐三菩提。善男子!我唯見無量無邊 一切眾生如是精進,以聲聞乘、辟支佛乘而般涅槃。以是義故,急 當捨離如是精進、勞累身心、艱苦疲極。』爾時,菩薩而作是念:

『咄哉,波旬!將不故來嬈亂我耶?豈不欲作障礙留難我法事耶?』審知魔已而作是言:『波旬!善哉。少欲自持,何勞樂知世間事乎?波旬!如來說此一切世間業為師匠,依因於業,緣力所使。波旬!汝當自攝,復道還去。汝今惱我之因緣故,汝於來世長夜受苦,空無利益。』如是,魔眾及魔天民故作障礙來相惱觸,而是菩薩不破、不散、不壞、不退。如是,菩薩金剛精進具足。

「善男子!云何菩薩勇猛精進?菩薩摩訶薩以是精進即能超越過前修行,諸菩薩等不能及是菩薩一分,乃至算數譬喻皆不能及,何況聲聞、辟支佛等?於初發心以精進力攝持一切如來法藏,即便遠離一切不善。如是,菩薩勇猛精進具足。

「云何菩薩離二邊精進具足?菩薩摩訶薩雖作如是勇猛精進,不得過分自苦其身、復不下劣懈怠懶惰。如是,菩薩離二邊精進具足。 「云何菩薩增廣精進具足?菩薩摩訶薩如是精進:如如來身,我身亦然;如來頂上無能見者、圓光一尋相好殊特、具足無量不可思議無礙智慧、諸佛功德、恒師子吼、力、無所畏,我皆亦爾。如是精進,是名菩薩增廣精進具足。

「云何菩薩練治精進具足?善男子!如摩尼珠及金、銀等,以練治故,却垢瑩磨,淨潔光明,人見歎言:『是摩尼珠及金、銀等以得光明,被練治故。』如是,菩薩修行精進,蕩除一切垢穢、不淨亦

復如是。何者精進垢污?所謂懈怠、懶惰是精進垢,於食飲中不自知足、不識己身是精進垢,菩薩悉皆蕩除。如是勇猛則為無垢、無穢,淨潔光明顯現。如是,菩薩練治精進具足。

「云何菩薩不休息精進具足?菩薩摩訶薩於四威儀常修精進,無時 無處而暫休息,是名菩薩不休息精進具足。

「云何菩薩清淨精進具足?如是菩薩常修精進,設有麁惡、諸不善法、障道因緣、無利益事悉應蕩除,所有善法、隨順涅槃、不逆正道、助成菩提、流向菩提則為生長而增廣之。於一念頃尚不故生微細諸惡,何況大惡?是名清淨精進具足。

「善男子。云何菩薩無比精進具足?菩薩作如是念:『若遍十方如 恒河沙等世界為阿鼻獄猛火燒然,是中世界見諸眾生無救、無護、 無歸依處、困苦無向。』菩薩即發勇猛之心,獨自無侶,設為一人 度脫因緣,能以脚步度如是等世界猛火而度脫之,何況眾多?如 是,菩薩與諸聲聞、辟支佛等及諸外道不可為比。如是,菩薩無比 精進具足。

「云何菩薩無輕蔑精進具足?菩薩不作是念:『謂菩提者非是世間凡人可得,而我今者所修精進蓋不足言、下劣微薄。我今懶惰,而菩提法勇猛精進如救頭然,於無量劫之所修得。我今若不堪任荷負如是重擔,是菩提法豈可得矣?』菩薩應復諦想思惟:『過去已有無量諸佛、如來、應供、正遍知、今正等覺、當成等覺,皆悉用於如是等策、如是修行、如是精進,諸佛如來悉成正覺。而我今者用如是策,勇猛精進與諸眾生不可為比,緣諸眾生得成阿耨多羅三藐三菩提亦復如是。是故,我今寧為一切諸眾生等受地獄苦,而不能為利益自身獨證解脫而取涅槃。』如是,菩薩無輕蔑精進具足。

「善男子!云何菩薩無策精進具足?菩薩如是精進,非人所策、不 著其味,亦不以此勤精進故策怪他人亦不自高,作是思惟:『何有 智者正務私事待人所策?』是名菩薩無策精進滿足。

「善男子!如是,菩薩具是十法毘梨耶波羅蜜滿足。

「善男子!菩薩摩訶薩具足十法禪波羅蜜滿足。何等為十?一者、福德佐助,二者、多厭離想,三者、勇猛精進,四者、多聞具足, 五者、心不顛倒,六者、如訓相應,七者、如法修行,八者、自性 利根,九者、善解心地,十者、善解奢摩他毘婆舍那無止息意。

「善男子!云何菩薩福德佐助?菩薩摩訶薩於大乘法宿植德本,在 在處處流轉生死,為善知識之所攝受,隨願受生,若富貴大姓、若 居士大家、信樂之家。既意欲得往彼受生,即便造作彼業因緣令得 往生,生生世世值遇親近真善知識。何者名為真善知識?所謂諸 佛、菩薩。如是增長宿世修集善業因緣,常作是念:『苦哉,世 間。痛哉,世間。無安立哉,一切世間久遭重病、癡暗、無明。何 以故?欲因緣故。是故,我今不當於如是等困厄世間求受五欲。夫 婬欲者,唯是妄想、顛倒而已,於三苦中謬生樂想。是故,如來處 處經中種種因緣具說婬欲多諸過失、殊可患厭,所謂婬欲如炙肉 法,肉[(夕/火)*束]俱燋;如舐刀刃,貪味偽舌;如毒蛇頭,具四 種毒;如猪在廁,臭穢不淨;如彼癡狗而齧枯骨,其口出血謂之為 樂;亦如獼猴黏著[米*离]膠。』

「是故,菩薩當生厭離,剃除鬚髮而被法服,於正法中如法出家, 往無家地而慕精進,未得令得、未證令證、未至令至。以是因緣而 取三慧,世諦所說、第一義諦所說,善解二諦深妙之理,如所教訓 即為隨順、離諸顛倒、如法修行。

「何者名為如法修行?所謂正見、正思惟、正語、正業、正命、正 精進、正念、正定。

「以能通達於道諦故,成就利根、了知諸根,即樂寂靜,究竟遠離 一切徒眾混雜諠鬧,忽遽多言、婬、怒、癡等一切惡覺,親里、知 識、利養、名譽畢竟遠離,身心快樂,柔軟調和。

「復更思惟觀察是心:『何法處行於善、不善、無記法耶?』若行 於善即生歡喜;若生欲覺,名為不善。

「欲有三種,謂上、中、下。何者為上?以欲遍身,深入心住,继 亂倡狂,不能修於遠離因緣,以深著故。云何深著?以其不能究竟 生於慚愧心故,獨居空閑而隨憶念不曾暫忘,生惡覺觀決云婬欲, 定是精妙諷詠、歌歎、妄想、顛倒、謂言好物,如癡獼猴見水中月 便欲捉取。不見其惡,無慚恥心,以欲因緣亦能與其父母尊長而共 爭競乃至相殺,不避親疎。凡夫癡頑,耽著愛染,不能捨離欲因緣 故,死墮地獄、畜生、餓鬼受諸苦報,是名上欲。何者中欲?若人 習行親近婬欲,未交會前方便求覓,設遂其事便生厭離而有慚心, 知欲不善,呵責自悔,是名中欲。何者下欲?脫遇欲緣,止申捉 手、共相磨觸、或共言話、或眼瞻視,是名下欲。夫名婬欲,若莊 嚴身、若愛壽命及諸資生,但能生貪悉名婬欲。

「何者名瞋?瞋亦三種,謂上、中、下。其上瞋者,生於忿毒、怨憾、恚怒、惡賴、憎嫉,於五無間重罪之中皆能備造。或謗正法,由謗正法所得重罪,於前五逆不及一分,乃至算數譬喻悉不能及。以是因緣,死後入於大地獄中受諸苦毒,久久之後無量劫中脫得生人,其眼光赤、無賴惡性、暴虐咆哮,生旃陀羅下賤之家。以是因緣,展轉生死無有出期,是名上瞋。何者中瞋?其雖發瞋造諸惡業,即生悔心,發露懺謝瞋所生罪,速疾修其對治方法,是名中瞋。何者下瞋?當瞋發時而作惡口、不愛之語、或惡眼視,雖作不善善亦非恒瞋,一念之頃速疾修集對治方法,是名下瞋。

「癡亦三種,謂上、中、下。何者上癡?於前所說,如是之處癡所 迷惑而無憂愁,不知改悔,是名上癡。何者中癡?若癡暫發,造作 惡業速疾改悔,於同學邊發露懺悔,不敢覆藏,於所犯罪知非利 益,是名中癡。何者下癡?於所持戒,若二、若三脫有毀犯皆是制 罪,終不敢犯性重禁戒,是名下癡。

「是中菩薩善巧方便,制伏其心令不作罪。如是,制心絓是婬欲, 縛著因緣悉不復生。何以故?如是善巧制伏心故。心若無記,是時 憶念一向觀察,令其心性與善相應。

「何者名為無記心耶?若有是心,不散於外、不住於內,不住於 善、不住不善,不在奢摩他、不在毘婆舍那,不能收攝令得寂靜, 睡眠所逼沈沒而住。如人眠覺,睡勢未除,心不明了。菩薩爾時以 巧方便制御其心,令得起發歡喜,安住於禪定中。如是,菩薩善解 於心。

「菩薩如是解於心已,觀見諸法如幻、如夢,是法不善、是法是善,是法出離、是法不出離。作如是知:是等諸法皆依於心、由心而生,心為上首,若能攝心調伏制止,若達心性則能攝得一切諸法、則能調伏一切諸法、則能通達一切諸法。若如是見一切諸法,則能修心令得寂靜,以心繫心;若心不靜而制令靜,安心於心。

「若心如是寂靜相應,是名一心;得一心已則入於定;得入定已, 寂靜所生一向歡喜;心歡喜已,滅於貪欲;貪欲滅已,一切不善亦 皆寂滅,有覺、有觀,寂靜所生,得歡喜樂入於初禪。是時,菩薩 為滅覺觀勤行精進,於歡喜樂不著其味。何以故?謂無常故。

「行於初禪而移其心,離於覺觀心不復著,無覺、無觀,三昧所生,得歡喜樂入第二禪。是時,菩薩則見此樂,決定是苦。何以故?三苦攝故。

「是時,菩薩住於捨心;住捨心已,唯正憶念而有了知以身受樂,如是之樂一切聖人說名為捨,憶念樂住入第三禪。

「是時,菩薩謂第三禪決定是空,故求四禪而使其心入於四禪,結 諸我見悉皆迴轉,樂亦隨滅、諸苦亦滅。苦、樂滅故,從初以來 憂、喜滅故,不苦、不樂,捨念清淨入第四禪。

「復作觀行則自見身與虛空界以為一相,如是見已,絓是色想究竟 超越,是隔礙想悉不復生。何以故?已得超越過色想故,無復絓 礙,於一切想唯見無礙、無邊虛空,故入無邊虛空而住。

「是時復見識與無邊虛空相應,自謂此識無有邊故,入識無邊。 「過此識已,是中但有無相之心,一切行滅無心功用,是名為滅。 「如是心滅菩薩應知,復更入定,是中進修而不休息,是處其心與 慈相應,具如前說;乃至修得六通自在,是中亦復不息精進,當求 修滿菩提法行。 「善男子!如是,菩薩具是十法禪波羅蜜具足。

「善男子!菩薩摩訶薩具足十法,般若波羅蜜具足。

「何者為十?一者、善解無我真理,二者、善解諸業果報,三者、 善解有為之法,四者、善解生死相續,五者、善解生死不相續,六 者、善解聲聞、辟支佛道,七者、善解大乘之道,八者、善解遠離 魔業,九者、智慧不倒,十者、智慧無等。

「善男子!云何菩薩善解無我真理?善男子!菩薩摩訶薩以善正慧 觀察色陰,乃至受、想、行、識皆善觀察。如是觀察,不見色生、 不見色集、不見色滅;乃至受、想、行、識亦不見生、亦不見集、 亦不見滅。何以故?以真實故、不以假名世俗性故。其真實性與世 俗性,是二種性,文字、章句所不能說。以是因緣,精進不息如救 頭然,精進勇猛利益眾生。如是,菩薩善解無我真理。

「云何菩薩善解諸業果報?菩薩應作如是觀察: 『所言世間有諸果報,皆似伎兒、乾闥婆城,本性自空。所言眾生則非眾生,而橫執相著於我見,以是因緣不達真理。既不能了真道理故,作如是見:「若言無我、無人、無眾生、無壽者、無士夫、無養育、無男女等及諸善惡業因、果報,誰生、誰死?」』爾時,菩薩雖無眾生,有業、有報,如是悉知;非是眾生、非諸善惡業因、果報,菩薩亦知,以正慧故、以真實故。如是,菩薩善解業因果報。

「云何菩薩善知諸有為之法?菩薩摩訶薩應於一切有為之法,以善慧故而善通達,作如是觀:『是諸行法搖動不住,如朝露滴,日出 消盡;如山水流,唯去不歸。何有智者於行法中而生貪著,其心戀 慕?』若能觀見如是真實,見實因緣則生厭離、寂滅之心。如是, 菩薩善知有為之法。

「云何菩薩善解生死流轉?菩薩以善智慧通達有為諸法,作是思量:『遍諸世間被無明暗之所覆蔽,障其慧眼,如生盲人不見正路,何由能得出離生死?唯著生死、貪愛繩索之所纏繫,而取四取、趣向三趣,沈滯生死;以取因緣而能造作善、不善業;以善、不善諸業行故,受三有生,有因緣生;以生因緣,有老、有死;老、死因緣,憂、悲、苦、惱種種不絕。如是流轉猶若車輪,生死輪迴無復斷絕。』如是,菩薩善知生死流轉。

「善男子!云何菩薩善知生死,不復流轉?菩薩摩訶薩作如是觀: 『無明滅故,不著生死;不執著故,貪愛不生;貪不生故,取則不 生;取不生故,有不相續;不接續故,生則不生;生不生故,老、 死、憂、悲、諸苦惱等悉皆斷滅,究竟無餘。』菩薩摩訶薩依此道 理,以善慧故悉皆通達。如是,菩薩善知生死不復流轉。

「云何菩薩善知聲聞、辟支佛乘?作如是觀:『若行是法得須陀洹 果、若得斯陀含果、若得阿那含果、若阿羅漢,流盡六通,盡諸有 結,無復繫縛,向涅槃道;若行是法得成緣覺,自度自脫,等於犀角。』如是諸法,菩薩以善慧故皆得通達,雖爾通達而不取證。所以者何?菩薩摩訶薩作如是念:『我今荷負諸眾生類,作師子吼誓度脫之。是故,我今不應未度一切眾生生死稠林曠野險難,而獨度身於生死險。』如是,菩薩善知聲聞、緣覺乘道。

「善男子!云何菩薩善知大乘?菩薩乃學一切諸佛所制戒律、種種 經法,究竟無餘。不得學者、不得學道、不得所學一切種法,不以 如是之因緣故而墮斷見。如是,菩薩善知大乘正道。

「善男子!云何菩薩善知遠離魔業?菩薩摩訶薩於惡知識究竟遠離;及非所宜國土聚落、受持讀誦路伽夜多外典呪術、貪求利養、殷重恭敬,菩薩知已皆悉遠離,究竟避之;及諸結使、諸縛惱惑、能障菩薩清淨道者皆悉遠離,修對治門究竟斷之。如是,菩薩善知遠離魔業。

「善男子!云何菩薩智慧不顛倒?菩薩摩訶薩一切世間技藝、道術悉皆學知。何以故?為欲成就利眾生故、不為欲得所知識故、但為光揚顯示如來正法功德之最勝故。於諸外法不生優勝功德之想,唯作是解:『如來經教最深、最極,諸律毘尼功德無量。』是故,菩薩不取外道、邪見法則而為清淨。如是,菩薩智慧不顛倒。

「善男子!云何菩薩無比智慧?菩薩摩訶薩於此世間,若魔、若 梵、若沙門、若婆羅門、若人、若天,一切十方無有一人等於菩薩 之智慧故,唯除如來、應供、正遍知;無有智慧能勝之者,若天、 若梵、若人、若魔,一切世間所有智慧無能及者。如是,菩薩智慧 無比。

「善男子!菩薩摩訶薩具足十法,般若波羅蜜滿足。

「善男子!菩薩摩訶薩具足十法,善解方便波羅蜜。何等為十?一者、善解迴向滿願方便,二者、善解轉諸外道方便,三者、善解轉諸毒塵方便,四者、善解調伏疑悔方便,五者、善解救濟眾生方便,六者、善解延眾生命方便,七者、善解攝受方便,八者、善解處非處方便,九者、善解勸化利喜教導方便,十者、善解供養承事方便。

「善男子!云何菩薩善解迴向滿願方便?善男子!菩薩設見若華、若果,無有主甲、非人所護,以此華果於夜三時、日中三時而供養佛及諸菩薩,以是因緣所得功德迴向阿耨多羅三藐三菩提;設見香樹、寶樹、意樹,無有主甲、非人所護,日夜六時而設供養,迴向阿耨多羅三藐三菩提。又,諸經中所聞種種供養之具勝妙殊特,以內深心皆悉迴向十方世界諸佛世尊、一切菩薩、一切眾生。所有善業、菩提修行,以深心故,皆悉隨喜迴向阿耨多羅三藐三菩提。於佛塔像,若華、若果而設供養,皆悉迴向,願諸眾生遠離破戒臭穢

之氣、願諸眾生得於如來戒定慧等芬馥之香;若以掃灑供養佛時,願諸眾生皆得端正威儀具足;若設幡蓋供養三寶,悉皆迴向,令諸眾生遠離煩惱、一切蒸熱。若入寺舍,願諸眾生入涅槃寺;若從寺出,願令眾生出離生死困厄牢獄;若開門戶,願諸眾生開善道門;若閉門戶,願惡道門悉令閉塞;若坐息時,願諸眾生坐於道場;若洗治時,願諸眾生離煩惱垢;若受水時,願諸眾生離諸臭穢;若洗脚時,願諸眾生離煩惱障;若用楊枝,願諸眾生離諸臭穢;若洗脚時,願諸眾生離煩惱障;若用楊枝,願諸眾生除諸不淨;出、入、動、止,願我此身但為利益安樂六道一切眾生;若禮佛時,願諸眾生速成佛身,一切人天之所恭敬。如是,菩薩善解迴向滿願具足。

「善男子!云何菩薩善解迴轉外道方便?菩薩摩訶薩常於處處外道法中,化作道士、梵志、尼揵,為欲成就眾生因緣,就學經法而作是念:『是等眾生多有憍慢,若作法師而往教化其不信受。』以是義故,前作外道弟子學士,就中出家,精進勇猛、細密威儀,必令得勝外道徒眾。以多聞故、以苦行故,方能得作外道法師,可尊重,言語有用,辯才具足。知其信已,方貶其道、示其過失:『仁者!汝所學道非為清淨、非為離欲亦非厭離,不能滅障。』從其邪道而迴轉已,以佛正法而安立之,為五通仙受持梵行:『修是梵行,勇猛精進必令能得外道法術。如是勇猛成就三昧三摩跋提,必令得勝一切外道、五通仙等,為諸仙人作大法師,世所崇仰。』知成熟時而貶是等諸外道法,現其過失,從其禪定而迴轉之:『仁者!是道不為清淨、不為厭離亦不能滅一切障礙。』從如是法迴轉竟已,以佛正法而安立之。如是,菩薩善解迴轉外道方便。

「善男子!云何菩薩迴轉毒塵?菩薩摩訶薩見諸眾生深著貪欲,但令滅其貪欲因緣,作是方便化作女色,形容端正,具足相好勝餘女人。眾生見已,生貪甚深,愛樂耽著。於所眠息受樂之時忽然而死,一念之頃即成臭爛,可惡不淨,見即怖畏,大生厭離,慞惶苦惱:『此是臭穢誰能除之?』爾時,菩薩侍立其前即為說法,令得決定、令入正位,於三菩提隨得一種。如是,菩薩善解迴轉毒塵方便。

「善男子!云何菩薩善解斷除疑悔方便?菩薩摩訶薩見是眾生作五 逆罪及餘不善種種罪業,菩薩往詣而作是言:『仁者!何故愁毒不 安樂耶?心無寧賴,如無精神。』答曰:『善男子!我以造作諸逆 罪業,以是因緣,我今失心,怖懼無寧。以此罪故,於未來世受諸 苦惱、諸非利益。』是時菩薩前令信受,以是因緣,或作神通、或 記於心。見神通者,是人信已,於菩薩邊得大歡喜,生信解心,堪 受說法。如是信已,是時菩薩於其人前而作變化化作父母,而作是 言:『仁者見不?我之父母亦被殺害。』殺父母已,復作神通而現

是人,令其歡喜:『如是之人,有大神通尚殺父母,何況於我?』 是時,菩薩為是眾生而說法要,令其罪業展轉輕微,薄如蠅翼。如 是,菩薩斷除疑悔善巧方便。

「善男子!云何菩薩善解救濟眾生方便?菩薩摩訶薩若見眾生堪聞正法而作惡業,為教化故,菩薩爾時巧作神通:若以王身應得度者,則現王身;若宰相身應得度者,而則為現宰相之身;若以高貴、臣民、剎利身應得度者,則為現之;若以天身應得度者,而現天身;若有眾生以軟語故應得度者,而作軟語為教化之;若金剛身應得度者,現金剛身;若有眾生以怖畏故應得度者,即現怖畏;若有打拍、訶罵、縛錄應得度者,即現是事。若有眾生欲作逆事、打拍損惱,菩薩摩訶薩見是等已即生憐愍而作是念:『是等眾生欲來惱我。』見是眾生如觀掌中阿摩勒果,生大愁惱而作是念:『我今此身寧受阿鼻地獄大苦,令是眾生即得入於無餘涅槃而得解脫。』見是眾生作諸罪業,以是因緣,若捨今身必受阿鼻地獄苦報,是時菩薩生憐愍心,以慈悲故念彼眾生、為治罰故而折伏之,後方教悔。如是,菩薩救濟眾生善巧方便。

「善男子!云何菩薩善解延眾生壽命方便?菩薩摩訶薩若見眾生不 感利養、無有勢力、不能得知諸聖妙法、雖求飲食尚不能得存立身 口,是時,菩薩為是人等教導文章、技藝、算計、種種法術,善相 應者令得存立。如是,菩薩善解延眾生壽命方便。

「善男子!云何菩薩善解攝受方便?菩薩摩訶薩若得種種珍寶之聚,高須彌山悉為納受、隨宜微細亦為納受。所以者何?爾時,菩薩而作是念:『是等眾生慳惜貪悋、耽著無厭、保護堅捉,慳貪因緣流轉沈溺生死大海。猶若江河,一切川流俱入大海;是等眾生墮三惡道亦復如是。』為是眾生利益安樂,是故,菩薩納受所施不為自利、非為潤己而受畜之,不生貪心,但為一切眾生利益同得用故、但為供養佛法僧寶、但為救濟困乏眾生,令彼檀越得歡喜故、得利益故。如是,菩薩攝受善巧方便。

「善男子!云何菩薩善解處非處方便?菩薩摩訶薩若見眾生有大威力、堪任成就阿耨多羅三藐三菩提,而行諸行求於聲聞、辟支佛道勇猛精進。是時菩薩從如是處而作方便令得捨離,示大乘道而令修行,若不信受乃至示現作大鬪諍令得降伏。如是,菩薩處非處起善解方便。

「善男子!云何菩薩善解勸化利喜方便?菩薩摩訶薩於諸未發菩提心者能令發於菩提之心、已發心者懈怠懶惰勸令精進、不持戒者令其持戒、若以少善而知足者方便發起令具諸善;若見眾生隨所犯戒可懺悔者,以是因緣閉心而住,不喜、不樂。是時菩薩為是眾生廣說法要,令得懺悔滅如是罪。如是,菩薩勸化利喜善解方便。

「善男子!云何菩薩善解供養承事方便?菩薩摩訶薩得出家已,無人供養,隨宜如法所得知足,獨在閑處住於寂靜,作是思惟:『我今云何能得供養承事如來?』作是思惟,心心不絕思諸供具,願得供養承事三寶,此則能得滿足六波羅蜜行:於一念中運供養心,捨於所重,是檀波羅蜜;運供養心,緣諸眾生而發是心,是戒波羅蜜;於是心中而坐安樂,是忍波羅蜜;於是心中無有疲倦,是精進波羅蜜;於是心中不散、不動,是禪波羅蜜;於是心中而思種種供養之具,是般若波羅蜜。如是,菩薩供養承事善解方便。

「善男子!菩薩具是十供養善解方便波羅蜜具足。

「善男子!菩薩摩訶薩具足十法,願波羅蜜具足。何者為十?一者、無下劣願,二者、無怯弱願,三者、為度脫利益一切眾生願,四者、稱歎一切諸佛功德願,五者、降伏一切魔怨願,六者、不由因信他願,七者、無邊際願,八者、無怖畏願,九者、無疲倦願,十者、究竟圓滿清淨諸願。

「善男子!云何菩薩無下劣願?菩薩摩訶薩不樂受於三有之樂而發誓願,是名菩薩無下劣願。

「善男子!云何菩薩無怯弱願?菩薩摩訶薩發弘誓願,不求遠離出於三界而自取證,是名菩薩無怯弱願。

「善男子!云何菩薩救濟利益一切眾生願?菩薩摩訶薩作如是願: 『諸眾生界窮未來際先令盡得無餘涅槃,然後我乃於佛涅槃而般涅 槃。』是名菩薩救濟利益一切眾生願。

「善男子!云何菩薩稱歎一切佛功德願?菩薩摩訶薩作如是願: 『若有眾生於其未發菩薩心者教化令發、已發心者次第令行諸菩薩 行、已修行者令坐道場,我設供養請轉法輪、請住世間利益眾生, 莫般涅槃。』是名菩薩稱歎一切諸佛功德願。

「善男子!云何菩薩降伏一切諸魔怨願?菩薩摩訶薩作如是願: 『我今應作如是等事,得成阿耨多羅三藐三菩提已,是我剎土不聞 魔名、一切魔民不生我國。』是名菩薩降伏一切魔怨願。

「善男子!云何菩薩不由信他願?菩薩摩訶薩不信他故,願得成就 阿耨多羅三藐三菩提。何以故?以智慧故,作是思惟:『此眾生界 滯生死苦,無救、無護。』為救護故,發阿耨多羅三藐三菩提願, 是名菩薩不由信他願。

「善男子!云何菩薩無邊願?菩薩發願無有齊限,行無執著。是故,菩薩偏袒右肩,右膝著地,至心勸請,觀於十方一切世界,有諸菩薩坐於道場、有諸菩薩於十方界而成等覺,請轉法輪、隨諸眾生根性不同而善憶念。凡是諸佛所說法要皆悉信解,如是信解而隨喜之,作隨喜已迴向阿耨多羅三藐三菩提,是名菩薩無邊願具足。

「善男子!云何菩薩無怖畏願?菩薩摩訶薩從初發心、聞諸佛法甚深甚深、聞佛功德甚深甚深、聞諸菩薩神通遊戲甚深甚深、聞諸菩薩方便甚深甚深,不恐、不怖、不畏、不驚,而作是念:『諸佛菩提無量無邊、諸佛境界無量無邊、成熟眾生無量無邊,如我等類何能思算如來境界?所以者何?諸佛、如來自能知之,我不能知。』是名菩薩無怖畏願具足。

「善男子!云何菩薩無疲倦願?菩薩若見剛強眾生難調難伏、放逸自恣不肯受化,是諸菩薩之所厭患。如是剛強、難調難化、所厭患者,以是因緣即生疲倦而棄背之,發願往生清淨世界諸佛淨土。是淨土中無如是等剛強眾生及其名處,菩薩不欲聞是人名,何況相見?若有菩薩棄背眾生,亦不能得諸佛淨土而往受生,是中有智諸菩薩等發如是心:『一切世界有諸眾生頑囂、暗鈍、聾、盲、瘖、瘂、無涅槃性,從彼世界諸佛菩薩所棄捨者,是等眾生願悉來集我所莊嚴佛國土中。是等眾生勿令有餘,我皆令得阿耨多羅三藐三菩提、坐於道場覺了佛果。』菩薩摩訶薩作是思時,從初發心一切魔宮無處不動、十方一切諸佛世尊之所稱歎,而是菩薩無疲倦願。成就究竟清淨、證於阿耨多羅三藐三菩提,是名菩薩無疲倦願。

「善男子!云何菩薩善畢竟具足願?菩薩摩訶薩坐於道場破碎魔軍,乃至得成阿耨多羅三藐三菩提後不復發願,是名得如所願滿菩提願。譬如器皿,酥油盛滿,平齊緣邊,不復能容如隣虛滴,是故說言:『此鉢盛滿,究竟具足。』菩薩摩訶薩證得佛道不復發願,猶若隣虛亦復如是,一切諸願究竟滿故,是名善究竟諸願具足。

「善男子!菩薩摩訶薩以是十法願波羅蜜具足。

「善男子!菩薩摩訶薩具足十法,力波羅蜜具足。何者為十?一者、不可降伏力具足,二者、不可破壞力具足,三者、福德力具足,四者、慧力具足,五者、眷屬力具足,六者、神通力具足,七者、自在力具足,八者、陀羅尼力具足,九者、不擾動鎮力具足,十者、超越無智力具足。

「善男子!云何菩薩不可降伏力具足?菩薩摩訶薩一切外道悉不能 伏,是名不可降伏力具足。

「云何不可破壞力具足?善男子!菩薩摩訶薩於諸人、天、眾生聚中,無一眾生以其道力能得破壞菩薩力者,是名菩薩不可破壞力具足。

「善男子!云何菩薩福德力具足?菩薩於諸德福行中無有一行——若世間、若出世間——所不經行,是名菩薩福德力具足。

「善男子!云何菩薩般若力具足?菩薩摩訶薩於諸佛法,無有一法 ——以善慧故——是所不見、是所不證、所不通達,唯除如來深智 慧耳,是名菩薩般若力具足。 「善男子!云何菩薩眷屬力具足?菩薩眷屬無破戒者、無邪見者、 非威儀者、無邪命者。所以者何?菩薩眷屬隨有資生共相分張,具 足自利、利他義故,是名菩薩眷屬力具足。

「善男子!云何菩薩神通力具足?菩薩摩訶薩於諸世間神通之力, 及諸聲聞、緣覺境界,悉皆超越。何以故?菩薩神通力最勝故。若 閻浮提內一毛中而安立之亦無損減;如是,四洲若干世界、若三千 大千世界、若如恒河沙數世界,內於一隣虛塵中而安立之,亦無增 減;若二、若三、若四、若五、若六、若七、若八、若九、若十恒 河沙、若可說不可說恒河沙數世界,內於隣虛塵中,亦無增減;是 等世界亦無妨礙、是中眾生亦無逼迮,是名菩薩神通力具足。

「善男子!云何菩薩自在力具足?菩薩摩訶薩變此三千大千世界化 作七寶盈滿其中,自在力故事無不遂,乃至不可說不可說世界七寶 盈滿,其中皆悉自在,是名菩薩自在力具足。

「善男子!云何菩薩陀羅尼力具足?菩薩於諸不可說不可說諸佛剎土,絓是諸佛所說之法——種種文字、種種章句、種種意趣——於一◎剎那、一羅婆、一牟休羅,菩薩一聞悉能受持、通達、解說,是名菩薩陀羅尼力具足。

「云何菩薩不可擾動鎮力具足?菩薩摩訶薩所鎮之處,於諸人、 天、眾生聚中,無一眾生能擾動者,唯除如來、應供、正遍知,是 名菩薩不擾動鎮力具足。

「云何菩薩超越無智力具足?菩薩於一切智皆悉超越,一切眾生尚不能及,何況能過?唯除如來善解方便,是名菩薩超越無智力具足。

「善男子!菩薩摩訶薩具足十法,力波羅蜜滿足。

「善男子!菩薩摩訶薩具足十法,智波羅蜜滿足。

「何者為十?一者、人無我智具足,二者、法無我智具足,三者、無分限智具足,四者、三昧境智具足,五者、鎮智具足,六者、不破壞智具足,七者、觀眾生行智具足,八者、無功用智具足,九者、一切法相智具足,十者、出世間智具足。

「善男子!云何菩薩人無我智具足?菩薩摩訶薩觀見諸陰生時、滅時:『是陰生時,無真實生,不動、不作,皆是虛妄。』而觀見之:『是陰滅時,不見敗壞。』復作是念:『是陰無我、無人、無眾生、無壽者、養育士夫,有諸癡頑、嬰兒、凡夫,深著我見而作是解:「是陰非我,我中無陰。」於五陰中深生執著。決言有體,故不通達真實法性;以不通達真實道理,是故流轉於生死中,猶若火輪無有休息。』菩薩於是真實法性究竟通達,無復有餘,是名菩薩人無我智具足。

「善男子!云何菩薩法無我智具足?菩薩摩訶薩於損減謗如實而知、於增上謗如實亦知,而作是念:『於假名法而為安立分別諸名,雖作分別,所可分別一切諸法本無自性,是等文句能分別者亦無自性,是法體性不如分別,名字分別不當其體。所以者何?一切諸法但有名相,唯假名說,於是法中不應執著。是假名法非為究竟、一向非有,但此諸法依因他緣,藉他緣合而便得生、因緣散故其亦隨滅。』如是等法菩薩摩訶薩如實而知,是名◎法無我智具足。

「善男子!云何菩薩無分限智具足?菩薩不於一剎那中而生於智、 第二剎那而不生也。何以故?菩薩摩訶薩於一切剎那之中智慧悉 生,無邊無礙、無有分限,是名菩薩無分限智具足。

「善男子!云何菩薩三昧境界智具足?菩薩摩訶薩悉知一切聲聞三昧、悉知一切緣覺三昧、悉知一切菩薩三昧、一切如來三昧皆悉知之,於是三昧聲聞行處菩薩悉知、於是三昧緣覺行處菩薩亦知、於是三昧菩薩行處菩薩亦知、於是三昧如來所行是佛三昧菩薩亦知,復有果報所可成就、自得智者皆悉知之,是名菩薩三昧境界智具足。

「善男子!云何菩薩鎮智具足?菩薩若於聲聞所鎮、若辟支佛所鎮、若菩薩所鎮,菩薩尚不知,何況一切諸眾生等?是名菩薩鎮智具足。

「善男子!云何菩薩不可破壞智具足?菩薩摩訶薩一切智慧不可破壞,若諸外道、若諸魔兵、若諸聲聞、若諸緣覺悉不能破,是名菩薩不可破壞智具足。

「善男子!云何菩薩觀眾生行智具足?菩薩摩訶薩以清淨智,皎潔明白觀眾生界,是中而見有諸眾生已發菩提心、有諸眾生未發菩提心、有諸眾生已修菩提行、有諸眾生未修菩提行、有住初地乃至十地有成等覺、成等覺已正轉法輪、佛事已訖而般涅槃、有諸眾生以聲聞乘而般涅槃、有緣覺乘而般涅槃、有諸眾生生於天上、有諸眾生生於三途,菩薩悉皆了了得見,是名菩薩觀眾生行智具足。

「善男子!云何菩薩無功用智具足?菩薩摩訶薩若行、若立、若坐、若臥、若出、若入,不加功用是智恒生。猶若有人正眠熟時喘息恒生,菩薩智生亦復如是。如是智慧無處不遍,是名菩薩無功用智具足。

「善男子!云何菩薩了一切法相智具足?菩薩摩訶薩於一切法——若通相、若別相、若無量相——皆悉知之,若如幻相、若虛妄相菩薩悉知,是名菩薩了一切法相智具足。

「善男子!云何菩薩出世間智具足?菩薩摩訶薩以無流智得具足故,超越一切世間人天,是名菩薩出世間智具足。

「善男子!菩薩摩訶薩具足十法,智波羅蜜具足。」 大乘寶雲經卷第二

平等品第三

佛告降伏一切障礙菩薩摩訶薩言:「善男子!菩薩具有十法,與地平等。何等為十?一者、廣大無量,二者、養育眾生,三者、有恩、無恩無有異想,四者、能受大法雲兩,五者、一切眾生所依止處,六者、種善根處,七者、為珍寶器,八者、為妙藥器,九者、不可傾動,十者、無所怖畏。

「善男子!云何菩薩廣大無量?猶若大地,遍於十方,廣大無量;菩薩亦爾,遍一切處,廣大無量,福德、智慧具雙行故,是名菩薩廣大無量。

「云何菩薩養育一切眾生?善男子!譬如大地,一切眾生因之存立,種種資生隨意得用;菩薩亦爾,長養眾生,種於施、戒、忍辱、精進、禪定、慧等一切菩薩清淨行法,及餘無量資生什物皆悉利益,是名菩薩養育一切眾生。

「云何菩薩有恩、無恩無有異想?善男子!譬如大地,若被損辱亦不生瞋、若有供養亦不生喜,是中不作二想;菩薩亦爾,損惱不瞋、利益不喜,於彼眾生不生憎愛、不望反報,是名菩薩有恩無恩皆悉平等。

「云何菩薩能受一切大法雲雨?善男子!譬如大地,受諸洪雨及餘一切諸大水聚,悉堪容受;菩薩亦爾,如來所雨大法雲雨悉皆容受,是名菩薩能受大法雲雨。

「云何菩薩一切眾生所依止處?善男子!譬如大地,一切眾生——若出、若入——依於大地;菩薩亦爾,一切眾生行於六趣及涅槃道而為依止。如是,菩薩一切眾生所依止處。

「云何菩薩種善根處?善男子!譬如大地,一切種子因之生長;菩薩亦爾,一切眾生諸善種子,依因菩薩而得增長,是名菩薩種諸善 法種子之處。

「云何菩薩為珍寶器?善男子!譬如大地為珍寶器,依因於地,無量珍寶皆悉出現;菩薩亦爾,種種功德、光明珍玩,依因菩薩而得出現,是名菩薩為珍寶器。

「云何菩薩為妙藥器?善男子!譬如大地出諸妙藥,能治一切眾生病苦;菩薩亦爾,一切法藥因之出現,能滅一切世間種種煩惱重病,是名菩薩能為藥器。

「云何菩薩不可傾動?善男子!譬如大地,一切苦具不能侵擾,時節寒暑、蚊、蟻、毒虫觸之不動;菩薩亦爾,不可擾惱,眾生所起一切內外種種苦具悉不能擾,是名菩薩不可傾動。

「云何菩薩無有怖畏?善男子!譬如大地,一切龍王及諸象王、師子王等所出音聲,聞不怖畏;菩薩亦爾,聞諸魔聲及外道聲,不恐、不怖、不怯、不畏,是名菩薩無有怖畏。

「善男子!菩薩摩訶薩具是十法,與地平等。

「善男子!菩薩摩訶薩具足十法,與水平等。何者為十?一者、福德漸深,二者、生白淨法,三者、歡喜諮嗟潤澤,四者、漬爛一切煩惱根栽,五者、清淨無濁,六者、滅煩惱熱,七者、除諸渴愛,八者、甚深難冒,九者、能漂好醜,十者、淨煩惱塵。

「善男子!云何菩薩摩訶薩福德漸深?善男子!譬如諸水,次第流注,漸入深處;菩薩亦爾,流注善法,漸漸向深,是名菩薩福德漸深。

「云何菩薩生白淨法?善男子!譬如水聚能生一切草木、叢林、種種妙藥;菩薩亦爾,以三昧故,生長一切助菩提法,已生長者重復增廣,乃至成於一切種智樹木叢林,於佛剎土令生法果活立眾生,是名菩薩生長善法。

「云何菩薩歡喜諮嗟潤澤?善男子!譬如清水,自性潤澤,復潤餘物;菩薩亦爾,自性歡喜、諮嗟、潤澤,復潤於他。言歡喜者,是出世法;言諮嗟者,依佛、法、僧;言潤澤者,是心清淨。是名菩薩歡喜諮嗟潤澤。

「云何菩薩漬爛煩惱根栽?善男子!譬如清水,若草、若木、若根、若葉皆能漬爛;菩薩亦爾,因修三昧,一切煩惱根栽相續而漬爛之,乃至名相亦皆滅盡、不知所在,煩惱、臭穢習氣亦盡,是名菩薩漬爛一切煩惱根栽。

「云何菩薩清淨無濁?善男子!譬如淨水,體性清淨,無有垢穢;菩薩亦爾,自性清淨,無垢、無穢。言清淨者,一切隨眠煩惱、結使、貪、瞋、癡等皆消滅故。諸根無染、無垢、無穢,是名菩薩清淨無濁。

「云何菩薩滅煩惱熱?善男子!譬如水性,夏月蒸熱,一切地土并 諸地上一切眾生為作清涼;菩薩亦爾,諸眾生界煩惱蒸熱,以法淨 水悉令清涼、滅其熾熱,是名菩薩滅煩惱熱。

「云何菩薩除諸渴愛?善男子!譬如冷水於渴乏者轉其渴乏;菩薩亦爾,一切眾生渴愛六塵,難忽、難耐,於是眾生為降法雨,以法雨故令諸眾生迴六塵渴,是名菩薩除諸渴愛。

「云何菩薩甚深難胃?善男子!譬如水聚甚深難胃;菩薩亦爾,修 諸智慧甚深難胃——所謂一切天、魔、外道不可輕胃——是名菩薩 甚深難冒。

「云何菩薩能漂好醜?善男子!譬如水流一切地境——若好、若醜——悉皆能漂;菩薩亦爾,以法流水若好、若醜諸眾生界,一切能漂。雖如是漂,不惱眾生,水流亦爾。如是,菩薩以大慈悲潤澤眾生,降大法雨無所損惱,是名菩薩能漂好醜。

「云何菩薩淨煩惱塵?善男子!譬如水大,一切地上不淨塵埃、麁 澁垢穢悉令潤澤,淨無有餘;菩薩亦爾,有諸眾生心性麁獷、煩惱 客塵,依因定慧淨盡無餘,是名菩薩淨煩惱塵。

「善男子!具是十法,一切菩薩與水平等。

「善男子!菩薩摩訶薩具足十法,與火平等。何者為十?一者、能 燒煩惱糞穢,二者、成熟一切佛法,三者、乾燥煩惱淤泥,四者、 譬如火聚,五者、能作光明,六者、能令恐怖,七者、善能安慰, 八者、於諸眾生平等,九者、世所供養,十者、不可輕蔑。

「善男子!云何菩薩能燒煩惱糞穢?善男子!譬如火性能燒一切糞 掃穢惡、草木、叢林、諸藥樹等;菩薩亦爾,以智慧火能燒一切隨 眠煩惱、一切結使、貪、瞋、癡等煩惱糞掃、及對治道、鑽火之具 皆悉燒盡,是名菩薩能燒一切煩惱糞穢。

「云何菩薩成熟一切佛法?善男子!譬如火性成熟一切苗稼、藥草;菩薩亦爾,以智慧火成熟一切內諸佛法,如是成熟永無有失, 是名菩薩成熟一切佛法。

「云何菩薩乾燥煩惱淤泥?善男子!譬如火性炙燥一切諸地淤泥;菩薩亦爾,以智慧火炙燥一切有流之法,是名菩薩乾燥煩惱淤泥。「云何菩薩喻如火聚?善男子!如諸火聚於寒氷者却其寒凍;菩薩亦爾,一切眾生煩惱寒瘧,以智慧火而為却之,是名菩薩喻如火聚。

「云何菩薩能作光明?善男子!如大火聚絕炎熾盛,若雪山上、頻 耶山頂,若一由旬、若二由旬、三、四由旬,而作光明;菩薩亦 爾,以智光明能遠照了,若千由旬、若萬由旬、乃至無量阿僧祇 界,為諸眾生作大光明,照了明徹,以智光明悉能却除一切無智盲 暗之法,是名菩薩能作光明。

「云何菩薩能作怖畏?善男子!譬如禽獸、若師子王,見大火聚而生怖畏——所謂畏損我身——遠避是處。如是,惡魔及諸魔眾,若見菩薩而生怖畏,無威德故即便遠避,乃至不能得聞菩薩名號,何況視之?是名菩薩能作怖畏。

「云何菩薩善能安慰?善男子!譬如一人迷於稠林曠野,失其道路,忽然得見一大火聚而往就之,能於是中得見聚落、若見群牛,得見是已便生安慰,離諸恐怖。如是,一切無量眾生遭於生死稠林曠野,若見菩薩則得安慰、離諸怖懼,是名菩薩善能安慰。

「云何菩薩一切眾生平等?善男子!譬如火性於諸眾生悉皆平等,如於國王及旃陀羅平等無二;菩薩亦爾,於諸眾生悉皆平等,如於國王悉作利益、於屠殺者亦作利益,是名菩薩於諸眾生皆悉平等。「云何菩薩世所供養?善男子!譬如火性為諸剎利、婆羅門等之所供養;菩薩亦爾,為諸天、人、阿修羅、乾闥婆一切世間之所供養,作師範想,是名菩薩世所供養。

「云何菩薩不可輕蔑?善男子!如火雖小,不可輕觸,無憍慢故;菩薩亦爾,住於信行,從初發心未得勢力於大乘法不可輕蔑。若天、若人、一切世間天、龍、夜叉、乾闥婆等所知所悉,作如是言:『今此菩薩不久當坐菩提道場,證得阿耨多羅三藐三菩提。』是名菩薩不可輕蔑。

「善男子!菩薩摩訶薩具足十法,與火平等。

「善男子!菩薩摩訶薩具足十法,與虚空平等。何者為十?一者、 廣大,二者、無礙,三者、寂靜,四者、無邊慧,五者、無邊智, 六者、隨順法界,七者、信一切法同虛空性,八者、無處所,九 者、過想境界,十者、超越思量。善男子!菩薩摩訶薩具是十法, 得與虛空平等。

「復次,善男子!菩薩摩訶薩復有十法,與虛空平等。何等為十? 一者、於色好、醜,不貪、不瞋;二者、於聲好、醜,不愛、不 憎;三者、於香好、醜,不欲、不恚;四者、於味好、醜,不耽、 不棄;五者、於觸好、醜,不婬、不怒;六者、於法好、醜,不 執、不責;七者、於得、不得,不喜、不恨;八者、於苦不臧、於 樂不欣;九者、於好、惡名,不慕、不却;十者、稱歎、毀謗,不 親、不踈。如是十法與虛空平等。

「善男子!菩薩摩訶薩具足十法,引喻於月。何等為十?一者、清涼眾生,二者、見之歡喜,三者、增長白法,四者、除滅黑法,五者、世所稱歎,六者、形貌清淨,七者、乘最勝乘,八者、常為莊嚴,九者、遊戲正法,十者、有大神通,威德巍巍。

「云何菩薩清涼眾生乃至有大神通威德?

「善男子!譬如月出一切眾生悉得涼冷,以可愛故;菩薩亦爾,能 除眾生煩惱蒸熱令得歡喜,怡悅踊躍而作清涼。

「善男子!如月出時,見之歡喜,以清涼故欣悅其心;菩薩亦爾,滅煩惱熱,諸根清淨,威儀、動止、功德具足。

「善男子!如上旬月從其初生漸漸增長,至十五日具足圓滿;菩薩亦爾,從初發心至坐道場,日夜白法增長、圓滿,種種具足。

「善男子!如下旬月,色相、光明、可愛之貌漸漸損減,乃至月盡 不復現相;菩薩亦爾,得出世智,一切妄相皆悉損減,坐道場時畢 竟不現。 「善男子!如月出時,一切世間大小、道俗、臣民、男女悉稱歎 之;菩薩亦爾,一切世間人、天、修羅皆悉光揚。

「善男子!如月天子身心清淨、光明照耀,業報所生;菩薩亦爾, 身心清淨、光明遍照,法性所出自然化生,非因父母、迦羅羅等五 時不淨之所污染。

「善男子!如月天子乘清淨乘而照四方;菩薩亦爾,乘最勝乘遍照 無量無邊世界。

「善男子!如月天子常為莊嚴,無時有翳;菩薩亦爾,常為功德所莊嚴故。

「善男子!如月天子恒有自然歡喜快樂;菩薩亦爾,恒住法樂、不 住欲樂。

「善男子!如月天子有大神通、有大威德;菩薩亦爾,具諸功德、 自在、智慧、神通變化,隨意無礙。

「善男子!菩薩摩訶薩具是十法,故喻於月。

「善男子!菩薩摩訶薩具足十法,譬喻如日。

「何等為十?一者、滅無明暗,二者、能令開悟,三者、能照十 方,四者、善法因起,五者、能滅諸流,六者、能作光明,七者、 能翳外道邪見,八者、顯現好醜,九者、造作善法諸業,十者、善 人恭敬。

「善男子!云何菩薩摩訶薩滅無明暗乃至云何善人恭敬?

「善男子!如日出時滅一切暗;菩薩日出滅無明暗亦復如是。

「善男子!如日出時蓮華開敷;菩薩日出開悟眾生諸受化者亦復如是。

「善男子!如日出時照了十方;菩薩日出,智慧光明遍照十方而不 損惱一切眾生。

「善男子!如日出時放千光明照閻浮提,世人方知是日出已;菩薩 日出,智光明照,爾時方知有諸善法。

「善男子!於閻浮提,日光滅時即知日沒;菩薩日出於諸眾生作智 光明,能滅眾生一切癡暗、重昏盲冥,癡暗滅故,名為漏盡菩薩不 現。

「善男子!如日出時,諸餘光明翳不能照,日於爾時不作是念: 『我令是等諸餘光明翳不令照。』以法爾故,自然不現。菩薩日 出,一切外道、邪見、盲暗自然退滅,是時菩薩亦不作念:『我令 是等退滅不現。』

「善男子!如日出時,於閻浮提一切眾生為現好、醜,高、下, 邪、正;菩薩日出亦復如是,為諸眾生顯了好、醜,高、下,邪、 正。所言好者,則是聖道;所言醜者,一切邪道。

「善男子!如日出時,種植等業因之得成;菩薩日出,善法方生。

「善男子!如日出時,善人歡喜、供養、稱嘆,而諸不良、愁毒不樂;菩薩日出,有智之人、聰哲利根歡喜、稱嘆,行邪道者、嬰兒、凡夫、鈍根不良、無智慧眼、願樂生死、背涅槃道而不恭敬。 「是名菩薩滅無明暗乃至善人恭敬。

「如是,善男子!菩薩摩訶薩具足十法,譬喻如日。

「善男子!菩薩摩訶薩具足十法,喻師子王。何等為十?一者、不怖,二者、無有怯弱,三者、不迴轉顧,四者、能師子吼,五者、不驚,六者、行於山林,七者、居住山窟,八者、無所儲畜,九者、獨步無侶,十者、住阿蘭若。

「善男子!云何菩薩不怖乃至住阿蘭若?

「善男子!如師子王遍行諸處,不怖、不驚,恒見自身獨步無敵; 菩薩亦爾,諸處來往不怖不驚,恒見自身無對敵故。

「善男子!如師子王無怯弱想;菩薩亦爾,與諸外道設捔力時,論議鬪諍無怯弱想,不勇、不劣。

「善男子!如師子王脫被辱時亦不迴顧;菩薩亦爾,若為外道之所 損辱,亦不可轉、亦不默然。

「善男子!如師子王作師子吼,一切禽獸及諸豺狼遠走退散;菩薩亦爾,說法無我作師子吼,執著我見外道豺狼退散,滅盡於十方界,而是菩薩不為惱彼以無我法作師子吼,但為迴轉所化眾生故。「善男子!如師子王無所怖畏遍觀十方;菩薩亦爾,性樂寂靜,行於山林。

「善男子!如師子王住於山窟;菩薩亦爾,安住智慧寂靜山窟。

「善男子!如師子王無所儲畜;菩薩亦爾,却除一切煩惱重擔,無所儲畜。

「善男子!如師子王獨步無侶降禽獸群;菩薩亦爾,坐於道場,獨自無侶而破魔軍。

「善男子!如師子王所住之處,一切禽獸不得侵損一切苗稼;菩薩亦爾,國土聚落居住之處,外道禽獸不能損侵善法苗稼。

「如是,菩薩不怖不畏乃至能護眾生善根。

「如是,善男子!菩薩摩訶薩具是十法,喻師子王。

「善男子!菩薩摩訶薩具足十法善能調伏。何者為十?一者、菩提心堅固,二者、領理菩提心,三者、守護六情,四者、修行聖道, 五者、荷負重擔,六者、利益眾生,心不疲倦,七者、正命,八 者、實無貢高,九者、無諂曲欺誑,十者、質直。善男子!菩薩摩 訶薩具是十法,善能調伏。

「善男子!菩薩摩訶薩具足十法,世所知識。何等為十?一者、坐 禪攝心;二者、多修空行;三者、學法不息;四者、不緣境界,離 煩惱使,奉行如來一切經教,一向不犯,隨順一切法宗平等,通法 界宗故;五者、行於世間如旃陀羅卑下之子,以下卑心遠離自高、傲慢、狂醉故;六者、恒乞食活,次第平等故;七者、心無疑惑住於世間,於佛法中如實知見故;八者、心無猶豫,內證法故;九者、不復他信、不可誘引,自見道理故;十者、世間福田善修行故。如是,菩薩摩訶薩具是十法,世所知識。

「善男子!菩薩摩訶薩具足十法,譬如蓮華。何等為十?一者、身無染污,二者、微細之惡不與共住,三者、戒香芬馥,四者、受生潔淨,五者、姿顏和悅,六者、柔軟微妙,七者、覩見吉祥,八者、心意開悟,九者、心意成熟,十者、善能攝受。

「善男子!云何菩薩摩訶薩身無染污乃至善能攝受?

「善男子!譬如蓮華從水出時自無染污,如是無染以法性爾;如是,菩薩從生死水出而無染。何以故?得方便智慧故,一切菩薩善解方便行在生死,生死過患不能染污,菩薩方便智慧所持。

「善男子!如蓮華中一滴之水不能得住;如是,菩薩微細罪過悉不中住。

「善男子!如諸地界生蓮華處,香氣芬馥熏是方所;如是,菩薩是 處鄉村、國邑、聚落,所居之處以戒香氣無處不遍。

「善男子!如地界處有生蓮華淨潔可愛,國王、王民、一切百姓悉 往就之;菩薩亦爾,諸處受生自性淨潔,戒德、威儀無不具足, 天、龍、夜叉、乾闥婆、阿修羅、緊那羅、摩睺羅伽、人非人等之 所恭敬、愛重禮拜,諸佛、菩薩稱歎光揚。

「善男子!猶如蓮華開敷之時見則歡喜,色貌可愛能悅眾情;菩薩 亦爾,密笑之時無有顰蹙,諸根清淨。

「善男子!猶如蓮華柔軟,無有麁澁;菩薩亦爾,自然柔軟,本無 麁獷。

「善男子!如見蓮華於夢想時則為吉祥,而加稱嘆而利益故;見於 菩薩利益亦爾,一切住處甚為吉祥,為得一切智故。

「善男子!猶如蓮華漸漸開敷;菩薩亦爾,智慧覺分蓮華開敷,是時說名為佛覺悟。

「善男子!如蓮華敷,見時悅於眼根、嗅時悅於鼻根、觸時悅於身根、心歡喜時悅於意根;菩薩亦爾,成熟智慧光時,見時眼根清淨、聞時耳根清淨、已有戒功德香而悅鼻根、觸時供養恭敬而悅身根、若能思惟歎功德時意根清淨。

「善男子!如蓮華生,人天攝受;菩薩亦爾,出於世間,諸佛、菩薩,乃至諸天、帝釋、梵天、護世之所崇仰。

「是名菩薩自無染污乃至攝受。

「善男子!如是,菩薩具是十法,喻如蓮華。

「善男子!菩薩摩訶薩具足十法,心意廣大。何者為十?一者、我當修行一切諸波羅蜜故發增廣心;二者、我當成熟一切佛法故發增廣心;三者、我當教化一切眾生故發增廣心;四者、我當坐於道場得成阿耨多羅三藐三菩提,成等覺已當轉法輪,若梵、若天、一切世間所不能轉故發增廣心;五者、我當利益一切眾生,於無量無邊世界發增廣心;六者、我當造作智慧舟航,度諸眾生於生死海發增廣心;七者、一切眾生無救、無護、無歸依處、無有親識能度脫者,我當為其作親屬故發增廣心;八者、我當顯現諸佛威神、作師子吼、遊戲諸佛神通道力,亦當視顧摩訶那伽發增廣心;九者、我當不共一切世間——若天、若人——無比無等故發增廣心;十者、以佛正法,我當教化一切眾生,非陋行故、非苦行故、非下劣行故,發增廣心。

「善男子!菩薩摩訶薩具是十法,發增廣心。

「善男子!菩薩摩訶薩具足十法,心得清淨。何等為十?一者、心 多信樂,心內不動,心住堅固,心無虛假,遠離一切不善思惟,所 謂不發心求聲聞道、求辟支佛道。

「以少欲知足故,遠離一切垢穢不淨:離身貢高,所謂不作虛假威儀;離口貢高,所謂不說非實語言;離心貢高,無諂曲故、身不混雜故、口少欲故、心無貪求故。

「知恩報恩,微細恩義尚不忘失,何況多者?

「言語諦實,於所作事不毀謗他、無利不說、唯歎有德、利喜勸 嘆,是中唯見功德,如說而行。

「菩薩不得以口慰喻而心含怨;菩薩以口勸歎,心不令諍;口說愛語,心無忿恨。

「菩薩不以身現善而心行惡、菩薩不以身恭敬而心輕慢。

「菩薩無貢高、不懈怠,不恪惜、不嫉妬,菩薩既無貢高,亦不懈 怠,不慳、不嫉,亦不幻惑亦無諂曲。

「菩薩不鬪兩邊互相破散。何以故?菩薩以身恭敬,口說諦實,三 業相應。

「不謗如來清淨正法,菩薩不敢謗法。云何不謗諸佛正法?菩薩發 阿耨多羅三藐三菩提心,剃除鬚髮,著壞色衣,於佛正法而得出 家。如是出家,非畏國王故、不畏劫賊所破壞故、不負債故、不怖 畏故、不為生活故而作沙門,以信樂故出家學道、唯求法故親近善 友、深心承事、就善知識、深心聽法。如法修行,心無憍慢,雖無 憍慢而顛倒取,若無顛倒則能通達於佛正道,以通達故則得正法, 以得法故決定阿耨多羅三藐三菩提。如是,學者不謗如來正教正 法。

「善男子!如是,菩薩具足十法,心得清淨。

「善男子!菩薩摩訶薩具足十法,無有疑惑。何等為十?信於如來 身有祕密、信於如來口有祕密、信於如來心有祕密、信菩薩行、信 具神通、信滿本願、信一乘道、信種種說、信佛音聲妙響甚深、信 化眾生隨其根性。

「善男子!云何菩薩信於如來有身祕密乃至信於教化眾生? 「善男子!菩薩作如是念:『所聞如來有是法身:寂靜身、無等身、無等身、無量身、不共身、金剛身,皆是真實,不虛不 誑。』菩薩是處不生疑惑,無有二心。如是,信於如來身有祕密。 「復作是念:『絓是所聞如來有口祕密,如來自口授記、相貌授 記,若不了義所說經教,悉皆信之。如來無有蹉跌、非無義說,以 是因緣,悉非妄語。諸佛如來滅一切惡,清淨無垢,無復煩惱、結 使燋熱,自在具足,無所希望、無濁、無穢。若言如來有失、如來 無義語者,無有是處,至真至實,無有欺誑。』是處不疑不惑,如 是,信於佛口祕密。

「復作是念:『絓是如來心中祕密,在心內懷,依止於心,一切聲聞、緣覺所不能知,及諸菩薩一切眾生,唯除如來神通力耳。何以故?如來甚深,難冒難量,境界廣大,無邊無量,同於虛空不可思議,唯真唯實,無有虛誑。』是處不疑,如是,信心祕密。

「復作是念:『絓是所聞一切菩薩勤利眾生、成就一切眾生,於是 事業都無疲倦、亦不怖畏。荷負大擔,力勢堅固,修行十度一切佛 法,有無礙智、無邊智、無等智、不共智。勇猛堅固、莊嚴堅固、 誓願堅固,為菩提故次第滿足,唯真唯實,非是欺誑。』是處不 疑,如是,菩薩信於修行。

「復作是念:『菩薩坐於道場,所得無滯無障無礙清淨眼通,乃至 耳通、他心智通、宿命通、如意神通、漏盡通,無著無滯無障無 礙。』於三世中得一剎那相應智,視眾生界如實見之,是等眾生具 足行身惡業、具足行口惡業、具足行意惡業、誹謗賢聖、邪見顛 倒、行於邪法,業因緣故,捨身死後生諸惡道、受地獄苦;有諸眾 生以身善業、以口、意業善、正見具足故,不謗賢聖、行於正見, 以正見故三業清淨,以是因緣捨身死後生於善道,天上受樂。如是 真實觀眾生界,即見眾生善、不善業。

「復作是念:『我昔作菩薩時行菩提道,作是誓願:「自成正覺方令覺他。」是我前願,今已果滿得如所願,皆是真實、無有虛誑。』是處不疑亦不生惑,故說菩薩名為等覺,已自覺悟名三佛陀。

「善男子!如是,菩薩信於菩提、信佛出世。復作是念: 『所聞一乘——唯一佛乘——皆是真實,非是欺誑,不虛不謬。所以者何? 諸乘皆從大乘中出。譬如閻浮提洲,乃有諸洲而相圍繞,各各名字 皆悉屬於閻浮提洲,總說其名入閻浮提;一切諸乘亦復如是,依大乘出,無二、無三。』是處不疑,如是,信於一佛乘道。

「復作是念:『聞諸如來種種說法,於諸經中悉是真實。所以者何?為化眾生故,而諸如來隨機說法。』是處不疑、亦不生惑、不作二心,如是,信於三乘有異。

「復作是念:『聞諸如來響音甚深,微妙梵音悉皆真實。所以者何?諸梵天子少分善根,尚有音聲微妙響徹、柔軟了亮、雅美可愛,何況如來於無量劫修行成就百福莊嚴、萬德具足?』是處不疑不惑,如是,信於如來甚深響音。

「復作是念:『聞佛如來了別機性、諸根利鈍,所化眾生聞以一音說法,隨類各各得解,斷其疑心,善根成熟者而前化之。一一眾生作如是解:「如來今者為我一人說如是法。」而諸如來無是分別亦無思惟,是等悉皆真實,非謬非誑。』是處不疑不惑,生如是信: 隨機緣故教化眾生。

「善男子!如是,十法具足,菩薩摩訶薩無疑惑心。

「善男子!菩薩摩訶薩具足十法,喻如大海。

「何等為十?一切珍寶之所歸聚、難冒、廣大、漸漸轉深、不宿死 尸、等為一味、復能容受一切川流、不過齊限、諸大眾生之所依 止、無有邊際。

「善男子!云何菩薩眾寶歸聚乃至云何無有邊際?

「善男子!譬如大海,一切珍寶是中聚集,無量無邊,一切眾生往 彼採寶;菩薩亦爾,一切功德珍寶聚集,無量無邊,一切眾生求福 德者而往詣之。

「善男子!如海難冒;菩薩亦爾,甚深難冒。

「善男子!如海廣大;菩薩亦爾,慈悲、智慧甚廣大故。

「善男子!譬如大海漸漸轉深;菩薩亦爾,修道、種智漸漸轉深。

「善男子!如彼大海不與一切死屍共宿。所以者何?大海法爾。如是,菩薩不與一切煩惱及惡知識而共止宿。何以故?菩薩法爾故。

「善男子!如此大海,一切眾流悉往入之,至成一味,所謂醎味;

菩薩亦爾,絓是所修一切白法悉成一味,所謂一切智味。

「善男子!如海容受無量眾流,不增、不減;菩薩亦爾,受無量法無有增減。

「善男子!如彼大海不過齊限;菩薩亦爾,教化眾生不過齊限。

「善男子!如大海水,大身眾生在中居住;菩薩亦爾,一切眾生有 白淨法,於菩薩身依止而住。

「善男子!如大海水無有邊際,一切眾生不能知其水之多少;菩薩亦爾,為諸眾生而說法要,無邊無窮,無能測量。

「如是,菩薩大海福德珍寶聚集之處乃至無邊。

「善男子!如是,菩薩具足十法,喻如大海。」 大乘寶雲經卷第三

陀羅尼品第四

爾時,佛告降伏一切障礙菩薩摩訶薩言:「善男子!菩薩摩訶薩具足十法,深解微細。何等為十?所謂解求出離、解究竟諸法、解具足一切法、解隨順一切法相、解分析一切諸法、解十二因緣甚深難冒、解業力不可思議、解如所說深義、解通達順如道理、解一實諦。

「善男子!云何菩薩解求出離乃至云何解一實諦?

「菩薩恒作是念: 『一切世間痛哉苦哉,八苦猛火之所焚然,婬欲炎盛燒其身首、瞋烟蓬勃妄想亂起、無明癡暗障蔽眼目。』

「菩薩見已,復作是念:『是等眾生云何出離三界火宅得脫火 難?』

「為是眾生得脫因緣,是故求解諸法,求得隨順諸法平等;得平等已,如實了知諸法幻相;了知幻已則如實知;如實知已而順觀察甚 深難冒十二因緣;得緣觀已,觀察業力不可思議。

「作是觀已,生大希有而作是念: 『一切諸法雖無自體,而能巧作 種種色像。』

「如是微細以意覺了,所說諸義則得明解;已了義故,通達真如; 達真如已,得見實際;見實際已則能度脫一切眾生生死火宅。

「善男子!如是,菩薩解求出離乃至解一實諦。具足如是十法,菩薩摩訶薩深解微細。

「善男子!菩薩摩訶薩具足十法,辯才會理。何等為十?所謂一切諸法但是假名,無我、無人、無眾生、無壽者、無養者、無造者、無受者、無知者、無見者,危脆災厄、不能自由、空無所有、虚妄分別、因緣假合,如是假合假名說之。善男子!有此道理隨順法相,無人、無我、眾生、壽者、造者、受者、知者、見者,無有自在、虛妄分別、因緣假合。如是說法有此道理隨順法相,不違法相與理相應,如是觀察實法道理,悉不顛倒顯了法相。如是,辯才與理相應,是故說名辯才會理。善男子!具足十法,菩薩摩訶薩辯才會理。

「善男子!菩薩摩訶薩具足十法,辯才明了。何等為十?所謂解結辯才、無盡辯才、無斷絕辯才、無不潤辯才、無下劣辯才、無怖畏辯才、無比辯才、不可沮壞辯才、無窮辯才、四無礙具足辯才。善男子!菩薩摩訶薩具是十法,辯才明了。

「善男子!菩薩摩訶薩具足十法,淨潔辯才。何等為十?所謂無吃 訥辯才、無恐怖辯才、無劣弱辯才、不自逞辯才、不損義辯才、不 損文辯才、不失方法辯才、無失時辯才、無麁澁辯才、無不明了辯 才。

「善男子!菩薩辯才無諸吃訥。所以者何?以無所畏故,菩薩在大眾中如師子王,不畏、不怯。

「菩薩辯才不逞、不諂。何以故?遠煩惱故;有煩惱者而恒自逞, 非無煩惱。

「菩薩辯才義無損減。何以故?得法爾故。

「菩薩無無義辯才。何以故?證得法故。

「善男子!未證法者有義損減非得法者,菩薩辯才無文損減。何以故?通學一切諸經論故。不學經論有失文章,若學經論無有此失。 「菩薩不失方法。何以故?已修一切諸方法故。

「菩薩善學無量經法,不失時節、無前後失,故菩薩無麁澁辯才、無有麁惡、無逆耳語。何以故?遠離惡口、諸過失故。

「菩薩辯才無不明了。何以故?具利根故。

「善男子!菩薩摩訶薩具是十法,辯才淨潔。

「善男子!菩薩摩訶薩具足十法,能令一切眾生歡喜辯才。何等為十?所謂愛語、姿顏悅豫無有顰蹙、恒說義理、恒說正法、說法平等、不逞自能、無所輕蔑、心無污染、不輕躁動、種種辯才。

「善男子!菩薩愛語,能令眾生心得歡喜。

「姿顏光悅,無有顰蹙,諮嗟具足,和悅眾生。

「恒說義理,優量語故悅眾生心。

「恒為說法,利益語故而悅眾生。

「說法平等,於諸眾生令悅其意。

「菩薩不自逞能,遠離憍慢、自恣、矜高,隨眾生類而教導之,必令歡喜。

「菩薩無所輕蔑,殷勤為說令得歡喜。

「菩薩無所染污,持淨戒故令眾歡喜。

「菩薩不輕躁動,多修忍故。

「菩薩種種辯才,以愛語故令眾歡喜。

「善男子!菩薩摩訶薩具是十法,辯才能令一切眾生歡喜。

「善男子!菩薩摩訶薩具足十法,言語辯才人所信受。何等為十?所謂菩薩於諸眾生非是法器而不為說、謗法眾生亦不為說、有來調弄亦不為說、外道邪見亦不為說、無恭敬者亦不為說、無信心者亦不為說、幻惑諂曲亦不為說、不為自身乏無資生故為說法、不為利養嫉妬慳悋故為說法、散頭裸袒及瘖瘂者不為說法。所以者何?善

男子!菩薩於諸眾生無有慳悋、亦無祕法、無不憐愍、無不利物,但諸眾生於佛法中非法器故,是故菩薩而不攝受。」 降伏一切障礙菩薩言:「世尊!有何眾生,菩薩為其說法?」 佛言:「善男子!菩薩說法為諸眾生:有信根者可成熟者、具有法 器、於過去佛已種善根、無有諂曲、離諸欺誑、所有威儀實無虛 假、不著世間名聞利養、具足信心、善友攝持、行諸善業、易可開 悟、利根眾生於所說義能解意趣、精進勇猛能得佛果、如說修行, 善男子!如是眾生,諸佛、菩薩而為說法。善男子!菩薩摩訶薩具 是十方,所出語言悉可信受。

「善男子!菩薩摩訶薩具足十法,善能說法。何者為十?所謂但為修行諸佛法故而演說法,如是說法而佛及法俱不可得;但欲修行諸波羅蜜而為說法,而是修行及波羅蜜亦不可得;為菩提行菩薩說法,而是菩提及菩提行皆不可得;為滅煩惱故為說法,不得煩惱及煩惱滅;為修厭離而證滅故,菩薩說法不得厭離亦不得滅;為須陀洹、為斯陀含、為阿那含證得果故菩薩說法,亦不可是須陀洹及斯陀含、阿那含等悉不可得;為阿羅漢果故菩薩說法,亦不可得阿羅漢及阿羅漢果;為得辟支佛果故菩薩說法,緣覺及果俱不可得;為滅執著、諸我見故菩薩說法,我與執著皆不可得;菩薩雖說有諸業報,業及業報亦不可得。何以故?作是思惟:『所說之法依因名字,依此名字尋法不得。所以者何?所言法者,非文字體;夫文字者,亦無法體。以是義故,依於假名俗諦,故說於無名法而立名字,如是名字皆是虛妄而非真實。非真實者,非第一義;既非真諦,是虛妄法,誑惑一切嬰兒、凡夫。』善男子!菩薩摩訶薩具是十法,善能說法。

「善男子!菩薩摩訶薩具足十法,無不隨順。善男子!菩薩隨順於 法不出於色、隨順於法不出受想行識、隨順於法不出欲界、隨順於 法不出色界、隨順於法不出無色界、隨順於法不出於法、隨順於法 不順眾生、隨順於法不順斷見、隨順於法不出於道、以智善巧方便 相應非不隨順。善男子!菩薩摩訶薩具是十法,無不隨順。

「善男子!菩薩摩訶薩具足十法,善解法界。何者為十?所謂智慧 具足、為善知識之所攝受、勇猛精進、遠離一切障礙、善能清淨、 於所教誨生殷重心、多修空相、遠離僻見、善行聖道、了見真實, 是為十法。善男子!慧命菩薩親近善友,見善知識生歡喜心,於善 友中生世尊想,依止而住。依善友已,勇猛精進,為滅一切不善之 法、成就滿足一切善法,如是勇猛,一切障礙悉皆滅盡。無障礙 已,不息於道,故得清淨,遠離一切身、口、意惡及破戒業。得清 淨已,於所教誨生殷重心;殷重教已,多修空相;修空相已,不生 倒見;離倒見已而修聖道;修聖道已而見真實。」 降伏一切障礙菩薩言:「世尊!何者名為真實?」

佛言:「善男子!夫真實名非顛倒名。」

「世尊!何者是非顛倒?」

佛言:「善男子!非是虛妄,名不顛倒。」

「世尊!何者是非虚妄?」

佛言:「即是如如無變異法。」

「世尊!何者名如如?」

佛言:「夫如如者,謂是內所證知之法,不可文字之所顯示。所以者何?是法一切言語道斷,文字、章句所不能詮,過音聲界、離諸口業、絕諸戲論,不增、不減,不出、不入,不合、不散,非可籌度、不可思量,過算數境非心行處、無礙無想過想境界、過諸嬰兒一切境界、一切嬰兒所不行處、過一切魔境界、過一切煩惱境界、過識境界無所住處、無住寂靜聖智行處。如是,如是內所證,無垢、無污、無染、清淨,微妙第一、畢竟最勝,常恒湛然,無生滅法,如來出世及不出世法界常爾。

「善男子!菩薩為是法故,精勤不懈,修行精進、忍種種苦,如是 苦行證是法界,於是法中復加安立一切眾生。善男子!是名如如、 是名實際、是名一切智、是名一切種智、是名不可思議界、是名無 二界。」

降伏一切障礙菩薩言:「世尊!云何應證?云何應得?如是法界說名內所證得耶?」

佛言:「善男子!以出世智故,內應當證、內應當得。」

降伏一切障礙菩薩復白佛言:「世尊!以智所證得,是內證得不?」

佛言:「善男子!不也。何以故?以智慧故,如實見法,以身證 之。」

菩薩復言:「世尊!諸善男子若以聞慧、若以思慧得證是法,名內 證不耶?」

佛言:「善男子!不可也。何以故?不可以聞慧、不可以思慧內證此法。

「善男子!我今為汝說於譬喻。善男子!如大曠野林中夏月後分, 設有一人從東方而往西域。復有一人從於西方而往東域,以蒸熱所 苦,渴乏惱亂,路中逢見東方來者而問之曰:『仁者!我今熱惱所 苦,渴乏煩躁。汝可為我示於道路——若池、若湖——有清淨水涼 冷無濁,能為我除此渴乏者?』是時,東方來人諳悉道路,經見善 知水路之相,己曾自飲洗浴是水,便報之曰:『仁者!以此道路汝 但直去,若於是處見有二道,可避左邊而行右道,乃至得見欝茂叢 林,是叢林中有三池水,清淨香美、柔軟輕冷、八德具足。』 「善男子!於汝意云何?是人為熱所苦,渴乏逼惱,但聞水名,唯思是水除渴乏不?即證此水涼冷以不?」

對曰:「不也。世尊!如渴乏者要須至彼清冷水處,得飲浴已渴乏 乃除,方自證知。」

「善男子!聞、思二慧不得內證,亦復如是。善男子!言叢林者,即生死之名也;熱惱所苦者,一切眾生也。何以故?三障煩惱熱所逼故,渴乏五欲。所言示道路者,則是菩薩之名也,善解一切智道,經證是法,內證得法故;言清冷水者,即是第一義諦之名也。「復次,善男子!我今為汝更說譬喻,汝當聽之。善男子!於意云何?諸佛如來若住世界一劫壽命,於閻浮提人前稱歎甘露之味——所謂色、香、美味、清淨具足、柔軟——是諸眾生聞歎是食得飽以不?」

「不也。世尊!」

佛言:「善男子!以此義故應當知之,聞、思二慧不可內證得如是 法。

「復次,善男子!諦聽譬喻。善男子!如有一人經食甘果知其美味,於眾人前而稱嘆之具足色、香、味、觸。善男子!汝意云何?是等眾人聞說果味,得果味不?」

「不也。世尊!」

佛言:「善男子!依此義故應當知之,聞、思二慧不可內證得如是法。」

降伏一切障礙菩薩言:「善說。世尊!善說。善逝!世尊!是等眾生何當得是法?由聞此經歷耳因緣故。所以者何?世尊!是等眾生為得此法,因聞是法無顛倒故。」

佛言:「如是如是,如汝所說。得聞是法,以不顛倒故當得是法, 如我不異。

「善男子!菩薩摩訶薩具是十法,善解法界。

「善男子!菩薩摩訶薩具足十法,行空境界。何等為十?所謂力空、無畏空、佛不共法空、戒藏空、定藏空、慧藏空、解脫藏空、解脫知見藏空、一切法空、空空,悉皆了知。不以此因緣故而得空法,亦不著空、亦無空見、亦不依空、亦不以此因緣故墮斷滅相。 善男子!菩薩摩訶薩具是十法,行空境界。

「善男子!菩薩摩訶薩具足十法,住於無相。何者為十?所謂離於外相、亦離內相、離諸戲論、離一切分別、離一切有所得、離一切動轉、離一切行處、離一切境界、不得於識、亦不得所識之法。善男子!菩薩摩訶薩具是十法,住於無相。」

爾時,降伏一切障礙菩薩白佛言:「世尊!諸佛菩薩云何觀察是無相法?」

佛言:「善男子!是處不可思議,其義深妙。何以故?過意識境界故,一切眾生於是法處皆生狂亂。善男子!是如來法不可思議,一切眾生不能得見;是如來法微妙甚深,不可思算勞累心識。所以者何?善男子!是法難入,甚深甚深、不可思議,無彼、無此,等於虚空,一切論師非其境界,不能思量、不能籌度。」

降伏一切障礙菩薩言:「世尊!我於今日重欲諮啟,願垂聽許。」 佛言:「善男子!隨汝所問,我當答之。」

降伏一切障礙菩薩即白佛言:「如佛所說,此無相法一切眾生不能得見。是如來法誰能信者?如來法王而自稱嘆,將非貢高、增上慢耶?夫貢高者,非大人相。」

佛言:「善男子!善能諮問,諦聽諦聽,善思念之。」「唯然,世尊!」

佛言:「善男子!佛無憍慢亦無貢高,不為名聞、不為利養、不為知識,非虛自歎、非虛自高,但為利益一切眾生故、為得此法故而作是說。所以者何?是等眾生於如來邊聞是所說,得大歡喜、無量清淨,當得是法不異今日,為是法器長夜利安,乃至能得阿耨多羅三藐三菩提。」

降伏一切障礙菩薩言:「世尊!是等眾生將不知佛之威神耶?」 佛言:「善男子!是等不知。何以故?心下劣故。善男子!此佛刹 土多有眾生小意下劣、薄弱卑陋、小智小信、少分善根,是故不知 如來威神之德。為是眾生故,佛自歎己,令彼於佛而生信故。

「善男子!如一醫王善巧治病。時多眾生深滯疾苦,是處聚落唯有此醫,無二、無三,諸病人眾都無一人識是醫者善能療治、具大威德。是時,醫師而作是念:『此等病者困苦可矜、眾惱所逼,不識藥性、不識增損,我今當為是等眾生療治令差。』是時,醫王於病眾前而自歎己:『汝等病人應知我是大醫之王,善巧治病、了知病源、善解診藥。』病者聞已,信知是醫而往依附。是大醫王即為病人而療治之,種種疾病應時得差。善男子!於意云何?是醫可得名貢高不?」

「不也。世尊!」

佛言:「善男子!諸佛如來亦復如是,為大醫王,了知一切煩惱重病,亦知煩惱病之根源,普施眾生大法妙藥。煩惱病者所不識知,如來醫王見是事已,於病眾前而自稱歎己之功德。諸眾生等聞說如來真實功德,皆生信心歸投如來。為是等人,如來大醫以大法藥、種種微妙療治一切煩惱重病,悉皆滅盡。何者名為大法藥耶?所謂不淨觀、慈悲觀、十二因緣等觀。善男子!佛見如是無量利故自歎己德,非貢高也。

「善男子!菩薩摩訶薩具足十法,遠離一切依願。何者為十?所謂 雖願布施不依於施,雖願戒、忍、精進、禪定、智慧及以三界、菩 提、涅槃悉皆不願。所以者何?菩薩遠離一切諸願,以無所願遍行 世間。善男子!菩薩摩訶薩具是十法,遠離一切依願。

「善男子!菩薩摩訶薩具足十法,以慈為身。何者為十?所謂無少分慈具足、無彼此慈具足、法慈具足、寂靜慈具足、不追過慈具足、利益慈具足、於諸眾生生平等慈具足、無忿恨慈具足、於十方界普覆慈具足、出世間慈具足。善男子!菩薩摩訶薩具足十法,以慈為身。

「善男子!菩薩摩訶薩具足十法,以悲為身。何等為十?所謂見諸眾生困苦、無救、無護、無歸依處發菩提心;發是心已努力修行,勇猛精進為得是法;得是法已為諸眾生而作利益——見慳惜者勸住於施、見破戒者勸令持戒、見瞋恨者勸修忍辱、見懈怠者勸修精進、見散亂者勸修攝心、見無智者勸修智慧——菩薩摩訶薩見諸眾生劇苦所逼、難可堪忍,是故不退於菩提行。善男子!菩薩摩訶薩具足十法,以悲為身。

「善男子!菩薩摩訶薩具足十法,住於歡喜。何者為十?所謂我已得出遠離三有火宅牢獄,故生歡喜;我已斷除生死羅網、無始纏縛,故生歡喜;我已得度種種覺觀蛟龍亂住生死大海,故生歡喜;久遠戴立憍慢之幢我已傾倒,故生歡喜;我以金剛智杵破碎煩惱高山,令究竟盡無復遺餘,故生歡喜;我已穌息,復為安慰未穌息者令得悅意,故生歡喜;我已覺寤,無始久遠世間睡眠渴愛所逼、無明癡暗障蔽眼目、未覺寤者復令覺寤,故生歡喜;我已得脫六趣惡道種種苦報,復當度脫諸餘眾生遭是惡道受苦報者,故生歡喜;我無始來迷於生死曠野稠林,獨無伴侶、慞遑亂走、未曾見路、不識正道、無示導者,今日欻然值遇導師,故生歡喜;我今漸近一切智城、隣於佛座,故生歡喜。善男子!菩薩摩訶薩具是十法,住於歡喜。

「善男子!菩薩摩訶薩具足十法,住優畢叉。何者為十?所謂眼識所了諸色境界此中捨離,不以色境而自損害、不作瘡疣;耳所聽聲、鼻所嗅香、舌所得味、身所覺觸、意所了法皆悉捨離,不以意識了諸法故而自損害、為作瘡疣、亦不隔礙;於行苦中、於苦苦中、於壞苦中捨離而住,於此三苦不自損害、不作瘡疣、亦無隔礙,於事已辦;眾聖人邊捨心而住,於聖人邊生大歡喜,復作是念:『是等聖人本凡夫地,我應化度。其今成聖,我願已得。』故住捨心。善男子!菩薩摩訶薩具是十法,住於捨心。

「善男子!菩薩摩訶薩具足十法,神通遊戲。何者為十?所謂從兜率下、託神母胎、示現受生、處宮受樂、踰城出家、樂於閑寂苦行

修道、降制魔軍、坐於道場而成正覺、轉於法輪、示現涅槃。」 降伏一切障礙菩薩白佛言:「世尊!何因緣故,菩薩摩訶薩示現兜 率天下乃至示現涅槃?」

佛言:「善男子!於彼兜率天宮有諸眾生,執有常想。時見菩薩——世間最勝、至尊至極、無上無邊、不染欲樂——從彼退墮,是 其所執常想即滅,生無常想,依無常想故不放逸。

「善男子!於彼天宮有諸眾生多放逸者,於菩薩所生歡喜心,戀著欲樂而不欲往,修覲菩薩亦不承事,其作是念:『菩薩常在、我等亦在,時節長遠,何慮不得往親近之?』是故,菩薩為除是等眾生放逸故現退墮。彼諸眾生忽見菩薩於彼墮墜,大生懊惱,遠離五欲,不復放逸;無放逸故,決定當得阿耨多羅三藐三菩提。

「善男子!有諸眾生宜於胎中受教化者,菩薩在胎威神巍巍,是等 見已即生希有,為是眾生菩薩處胎,隨其所宜而為說法,必令決定 當得阿耨多羅三藐三菩提。

「善男子!有諸眾生宜於菩薩作嬰兒時及在宮中應可成熟,而諸菩 薩為彼眾生得成熟故、及餘下劣眾生樂小法者為隨順故,是故示現 作嬰兒相住於宮中。

「善男子!有諸眾生宜見菩薩踰城出家,是菩薩為彼眾生令成熟故而示是等踰城出家。

「善男子!有天、龍、夜叉、乾闥婆等樂於弊陋,為是等故示現苦行,復為降伏諸外道故示現苦行。

「善男子!有諸眾生:『待菩薩坐道場時,我當到彼設諸供養。』 為是等故現坐道場。是諸眾生詣菩薩所而設供養,因緣決定當得阿 耨多羅三藐三菩提。

「善男子!有諸眾生憍慢、剛強,為折伏故,菩薩坐於道場降伏魔軍。

「善男子!有諸眾生成熟善根,為進修德勝利益故,是故菩薩現登正覺。

「是時,菩薩登於正覺,三千大千世界種種音聲悉皆休息,三千大 千世界無不寂靜。是等眾生見是事已,發弘誓願:『願我來世坐於 道場,證得阿耨多羅三藐三菩提。』

「善男子!有諸眾生謂言自是世間之師,而未覺了究竟出離清淨之法,於當來世亦無其分,但為折伏是眾生故。有諸眾生善根成熟、 堪為法器,為是等眾示現道故,而是菩薩得道之時往詣迦尸城轉于 法輪——其輪十二,三轉具足——於大眾中而師子吼。

「善男子!有諸眾生宜於涅槃受教化者,為化此等,是故菩薩現般 涅槃。 「善男子!以是因緣,示現從兜率天下閻浮提,乃至涅槃而示現 之。

「善男子!菩薩摩訶薩具是十法,神通遊戲。

「善男子!菩薩摩訶薩具足十法,遠離八難。何等為十?所謂遠離一切諸不善業、於諸如來所制禁戒不敢故犯、遠離慳貪、於過去佛種諸善根、福德相應、智慧具足、善巧方便、發弘誓願、修厭離想、勇猛精進。

「善男子!菩薩不造諸不善業、不感地獄。有諸眾生墮於地獄,受 於種種不如意苦,受苦既久,於彼眾生在地獄者互生瞋恚;而是菩 薩性戒清淨、十善具足,是故菩薩不墮地獄。

「善男子!菩薩摩訶薩於諸如來所制禁戒不敢故犯,隨順受持,是故不生畜生惡道。何以故?是諸畜生受畜生苦故。

「善男子!菩薩摩訶薩無慳貪心,慳貪因緣墮餓鬼道、受餓鬼苦故。

「菩薩摩訶薩不生邪見卑下之家。何以故?邪見眾生不得親近善知 識故。所以者何?菩薩累劫久於過去諸如來所種諸善根,以是因 緣,生生世世生正見家、富足錢財、具足修道習因成就,展轉增長 福德智慧。菩薩摩訶薩所得諸根無不具足,以是因緣,諸根具足為 佛法器。

「是故,菩薩功德成就既與福德業相應故,於佛塔廟、於法、於僧 設諸供養;供養因緣修習善業,是故而得諸根具足;諸根具故,是 則得為諸佛法器。

「菩薩摩訶薩不生邊地。何以故?邊地眾生暗鈍癡頑、瘖瘂,不了不解言語,似於羺羊、不堪聽受善不善法、甚深意趣不識道理,而不堪為甘露法器、不名沙門、不名信士,是故菩薩生於中國。中國眾生利根聰哲、諸根明了、智者稱嘆、堪受所說善不善法、深解意趣、堪為諸佛甘露法器、名為沙門、名為信士。何以故?過去願力、智慧力故。

「菩薩不生長壽天中,若生住彼,無量諸佛出於世間不沾法潤、不 獲法利,饒益眾生便爾被廢。是故,菩薩生於欲界,教化成熟下界 眾生,值佛出世。何以故?如是菩薩巧方便故。

「菩薩不生無佛出處。何以故?是中眾生不聞佛名、不聞法名、不聞僧名、不敬三尊,是故菩薩所生剎土有三寶處,如其過去所發誓願具足滿故。

「眾生[怡-台+龍]候、剛強難化;菩薩不爾。何以故?聞八難苦無不厭離。以厭離故,勇猛精進,修行正勤,滅如是等不善法故。 「善男子!菩薩摩訶薩具是十法,遠離八難。 「善男子!菩薩摩訶薩具足十法,不忘菩提心。何等為十?所謂遠離幻惑、諂曲、貢高,質直和雅,信心清淨;於正法中斷除疑悔,於諸眾生樂受法者而不悋惜、不作祕師;絓是能損正法因緣皆悉遠離,不相違犯,如說修行;受持大乘一切諸典,若見有人持大乘者生殷重心,恭敬禮拜作同學想,一心一意聽受大乘,於說法人生如來想。善男子!菩薩摩訶薩具是十法,不忘菩提心。

「善男子!菩薩摩訶薩具足十法,得宿命智。何等為十?所謂已多供養承事諸佛、已曾受持諸佛正法、戒品清淨、遠離掉悔、無有諸障、心多歡喜、修心令直、得入禪定、恒受化生、無疑惑心。

「善男子!菩薩摩訶薩以多供養過去佛者,敬重正法、於持法人生 謙下心,以是因緣就聽正法,受持、讀誦、通利文句、廣為他人、 分別解說、不惜身命而弘正法。

「禁戒清淨者,所謂於三品戒——若身、口、意——持淨戒故,離 諸掉悔而生恭敬。所以者何?以戒清淨故而無掉悔,無掉悔故而離 障礙,離障礙故而生歡喜,多歡喜故而能堪任修心令直,以修心故 則得入定,得禪定故六道清淨,六道淨故而受化生,受化生故無疑 惑心,無疑惑故得宿命智,追憶過去一生、二生、三、四、五生、 十生、二、三十生、四、五十生,乃至無量百萬億生。

「善男子!菩薩摩訶薩具是十法,得宿命智。

「善男子!菩薩摩訶薩具足十法,值善知識。何等為十?所謂不離見佛、不離聞法、不離供養眾僧福田、不離恭敬禮拜謙卑合掌承事諸佛菩薩、不離多聞及說法者、不離聞諸波羅蜜行、不離聞三十七品助道之法、不離聞三解脫門、不離聞於四無量心、不離聞於一切種智。善男子!菩薩摩訶薩具是十法,得值善友。

「善男子!菩薩摩訶薩具足十法,遠離惡知識。何等為十?所謂遠離破戒人故——當知名為離惡知識——遠離邪見人故、遠離失威儀人故、遠離邪命人故、遠離喧閙混雜中住故、遠離解怠懶惰人故、遠離樂住生死人故、遠離背菩提行人故、遠離交習在家人故、遠離一切煩惱故,是則名為諸惡知識,菩薩摩訶薩當遠離之。善男子!雖離是處,於眾生邊不生惡心亦不生瞋,心無惱熱亦不輕蔑,於前眾生而作是念:『如佛所說,一切眾生是氣類聚,為近惡知識故失於大利。是故,我今速當遠離諸惡知識。』善男子!菩薩摩訶薩具足十法,離惡知識。

「善男子!菩薩摩訶薩具足十法,得佛法身。何等為十?所謂無等等身、清淨之身、無瘡疣身、非修得身、不可思算身、甚深法身、非思議身、寂靜之身、虛空等身、佛智之身。善男子!菩薩摩訶薩具是十法,得佛法身。」

降伏一切障礙菩薩白佛言:「世尊!菩薩摩訶薩何處住止,能得如來如是法身?」

佛言:「善男子!於初地中得無等等身。何以故?遠離一切身差別故、隨順一切菩薩平等法故;二地菩薩得清淨身,戒品清淨故;三地菩薩得無瘡疣身,遠離一切瞋恨故;四地菩薩得非修得身,已經修佛法故;五地菩薩得不思算身,已得通達一切法故;六地菩薩得甚深法身,已修不可思量法故;七地菩薩得不可思議身,已修善巧方便故;八地菩薩得寂靜身,已遠離一切戲論、無煩惱故;九地菩薩得虛空等身,光明徹故;十地菩薩得妙智身。何以故?遍修一切所知境故。」

降伏一切障礙菩薩白佛言:「世尊!如來法身、菩薩法身,將無差 別耶?」

佛言:「善男子!得種種身無有差別,功德明昧亦有差別。」 降伏一切障礙菩薩言:「世尊!云何種種身而無差別,功德威神獨 有差別?」

佛言:「善男子!彼身、此身,無有差別。何以故?修一身故。而是功德威神之相殊有差別,應當觀之。」

降伏一切障礙菩薩言:「世尊!兩身差別當云何觀?」

佛言:「善男子!諦聽諦聽,我當為汝說於譬喻,成是義故。善男子!如摩尼珠磨瑩治飾,光曜明淨,以練治故。於諸摩尼未被練者,比前摩尼可相及不?」

「不也。世尊!被練治者,光色淨徹,悅眾意故;未被治者不得為類。」

佛言:「如是,菩薩身摩尼珠及如來身摩尼之珠,雖復同是清淨法身,菩薩法身於如來身,畢竟清淨不可為比。所以者何?如來身者不可限量,齊眾生界、徹虛空界,遍照而住。何以故?最極清淨,遠離一切諸塵垢故。而菩薩身摩尼珠明徹不爾。何以故?有餘垢故。

「善男子!譬如初月,其光始顯漸漸增長,至十五日方乃圓明。俱得月名,而此初月不可比於十五日夜。何以故?得法爾故。諸佛、菩薩雖復同得法身之名,而菩薩身於如來身,光明遍照不可為比。 善男子!如是,佛身及菩薩身同是身相,與佛功德威神之相非為一相。

「善男子!菩薩摩訶薩具足十法,獲得金剛貞實堅固不破壞身。何者為十?所謂貪、瞋、癡等不能破壞;怨憾、忿恨、災蓋、憍慢、貢高、邪見、顛倒不能破壞;世間八風不能破壞;三惡道苦不能破壞;眾生諸苦不能破壞;生、老、病、死不能破壞;外諸梵志、諸邪論師不能破壞;一切眾魔及諸天魔不能破壞;一切聲聞及緣覺等

一切欲樂亦不能壞。善男子!菩薩摩訶薩具是十法,獲得金剛貞實 堅固不破壞身。

「善男子!菩薩摩訶薩具足十法,作大薩泊主。何者為十?所謂堪可慶賀、堪為恭敬、能令濟度、堪可依止、能為安立、資糧豐厚、修理行具、無有厭足、引導上首、善能隨入一切智城。

「善男子!云何菩薩堪可慶賀乃至善能隨入一切智城?

「善男子!如薩泊主,國王、朝臣、宰相所可慶賀;如是,菩薩大薩泊主,諸佛、菩薩所可慶賀亦復如是。

「善男子!如薩泊主,剎利、百民之所恭敬;菩薩宗主,學、無學人,及餘天、龍、夜叉、乾闥婆所可恭敬,亦復如是。

「善男子!如大宗主,於大山林曠野險難而能濟度,令得安樂而無疲倦;菩薩宗主在於生死稠林曠野,眾生群品遭諸煩惱劫賊逼切而 能濟度,令得安樂而無疲倦,亦復如是。

「善男子!如諸商賈貧窮困乏,而往依投大薩泊主即得出於曠野稠林;尼揵、梵志、種種外道依投菩薩大薩泊主,獲得出離生死曠野諸大險難處。

「善男子!如薩泊主能為安立文武等眾諸憑附者;菩薩宗主能為安立生死眾生亦復如是。

「善男子!如薩泊主隨方發趣,與大群眾冒涉山林險難曠野,為得至彼安樂大城,足有資糧,安隱得出曠野之難不覺疲勞,乃得到彼豐樂之處;菩薩宗主亦復如是,是過去佛所行之方而隨行之,將領是等大群眾生欲令得度生死大險、欲令是等速至一切種智大城,而修種種福德資糧,豐足無限,示導而行。

「善男子!如大宗主多畜種種資生之具隨方而行,所謂金、銀、瑠璃、真珠、璧玉、珊瑚等寶;菩薩宗主亦復如是,趣向一切種智大城,善修佛法種種諸行。

「善男子!如薩泊主求諸財物不知厭足;菩薩宗主求聖法財不知厭足亦復如是。

「善男子!如薩泊主於諸商賈引導之首。何以故?富財物故、眾中勝故、以將領故、語言有用故。如是,菩薩大薩泊主於諸眾生為引導主。何以故?豐功德故、階位勝故、法自在故、所說無謬故。

「善男子!如薩泊主善能令至豐沃國土,如是,菩薩大薩泊主善領 眾生至於一切種智國土。

「善男子!如是,菩薩具是十法,作大宗主。

「善男子!菩薩摩訶薩具足十法,作大導師,了知正道。何等為十?所謂知路平坦、知路阻險、知路豐沃、知路安隱、知路有水無水、知路穌息處所、知路相貌、知路正直、知路迴曲、知路速出。 善男子!如是,菩薩摩訶薩具是十法,了知正道。

「善男子!菩薩摩訶薩具足十法,能示導正路而不顛倒。何等為 十?所謂若以大乘所應化者,而為是等說大乘道,而不為說聲聞之 乘;若有眾生以聲聞乘而受化者,即為是等說聲聞道,而不為說菩 薩之乘;若有眾生以一切智應得度者,即為是等說一切智道,而不 為說二乘之道;若有眾生以辟支佛道所應化者,即為是等說辟支佛 道,而不為說大乘之道;若有眾生執著我見、執著諸法,為是等故 而說無我、空、無相道,不說我、人、眾生、壽者;若有眾生著於 二邊,而為是等不說二邊;若有眾生心有散亂,為是等故說奢摩 他、毘婆舍那,不說散亂;若有眾生多有戲論,為是等故說如如 道,不說戲論凡夫之道;若有眾生樂住生死,為是等故說涅槃道, 不說牛死;若有眾牛行於邪道,為是等故說平坦道,不說煩惱刺棘 等道。善男子!如是,菩薩摩訶薩具是十法,能示正道而不顛倒。 「善男子!我今為諸四部弟子大眾安樂行故,說是經者、聽是經者 護其身心,令其辯才明了無盡,使諸天龍八部擁護是眾,令其獲得 四事供養,離諸疾惱,四百四病令滅無餘,生生世世得宿命智,見 佛、聞法、遇善知識,展轉增長乃至成佛,十力具足、得無所 畏。」

而說呪曰:

「怛絰咃 陀柯第(吳音) 陀柯婆羅第 陀柯那伽脚那呵利膩 梨履膩 迦蘭闍蘭那桎叉桎叉薩婆薩埵(耽音) 婆羅耶寐 莎呵阿 阿致那祇 禰弟(吳音) 斯思伊履旨履 比詈 祇那伽多羅祇 呵羅怒 摩訶薩衣(吳音) 因陀羅闍 液叉 卑多屈(居勿反) 砂臟 茶柯喃羅裳伽多喃 婆覆莎呵 南無般那伽寐詈 莎呵 旧經毗 柯支留 一柯支喜遏婆詈他 離樓地(吳音) 陀罕塼彌莎呵 怛絰咃 他彌他彌他彌他須 利乾他梨常伽利 拘波縣(吳音) 婆羅磨那 頗婆枳展那賒耶泥 展那閤示 拘留師理 尼猗婆 弼地耶 娑莫伽羅呵禰 薩婆魯伽婆奢摩尼 摩訶摩由羅喜陀耶 滿多 毘那尸尼 摩波多 伊底莎呵

「若火難、若王難、若災厄難、若劫賊難、若惡鬼難、若兩足難、若四足難、若多足難、若無足難、若有色難、若無色難、若煩惱難,一切諸難,當用一心憶念、受持、讀誦此呪,即得消除、遠離諸難,便得安樂,永無怖畏,得如所願。」 大乘寶雲經卷第四

安樂行品第五

爾時,世尊復告降伏一切障礙菩薩摩訶薩言:「善男子!菩薩摩訶薩修行十法,在在處處心恒寂靜而安樂住。何等為十?所謂善修憶念觀察於身及受、心、法,善修憶念觀察境界、阿蘭若處,於諸聚落國城都邑、於諸利養恭敬名聞、於諸如來所制禁戒、於皮肉心一切煩惱上、中、下品,善修憶念而觀察之。

「善男子!云何菩薩觀察於身而安樂住?菩薩摩訶薩以智慧故觀察是身,從足至頂唯見是身三十六物假合成人,念念生滅、無常敗壞、筋脈連持、不淨充滿、無可樂者,如是觀察即生厭離。以厭離故,身染、身貪、身見、身著悉不復生。以是因緣,凡諸不善與身相應皆得遠離、有諸善法與身相應悉皆增長。

「云何觀受善修憶念而安樂住?菩薩摩訶薩作是思惟:『凡是諸受一切皆苦。所以者何?嬰兒、凡夫頑<mark>囂</mark>無智,以顛倒故,以苦受中而生樂想;一切聖人唯見是苦,復能安立一切眾生,於是法中令得隨順。』如是學之,已得觀受善住念處,於苦樂受不瞋、不貪。為滅受故,勤修憶念,於是法中勸化他人、令如是行。

「云何觀察於心念處而安樂住?菩薩摩訶薩作是思惟:『是心顛倒,無常常想、苦生樂想、於無我法而作我想、於不淨中而作淨想,躁動易轉、一念不住,為諸煩惱而作根本,長為眾生開三塗門,為諸苦惱而作因緣,能閉善道,能為發起貪、瞋、癡等,為一切法作增上緣。一切諸法心為上首,若知於心則能得知一切諸法。心能盡作一切世間種種色像,唯心見心、唯心造業——若善、不善一唯心輪轉無暫休息猶若火輪、唯心奔逸猶如惡馬、唯心能燒猶如野火、唯心潤生猶若大水。』如是觀察住心念處,則便能得不隨於心、能為心師;以心師故則能得為一切法師。若能於心得自在者,則於諸法而得自在。

「云何菩薩觀法念處而安樂住?菩薩摩訶薩於如是等不善諸法如實而知,言不善者,貪、瞋、癡等及諸煩惱因無明生。以是義故,修對治門,若貪心生修不淨觀、若瞋心生修慈悲觀、若癡心生而修十二因緣之觀,修行正勤而令除滅。復為觀察一切善法,見善法已,於善法中攝心令住,憶念觀察受持是法,於是法中轉更勸化,令他眾生安住其中。

「云何菩薩於諸境界攝念觀察而安樂住?菩薩於色、聲、香、味、觸——若好、若醜——而不生於戀著、隔礙、貪、瞋之心。作是思惟:『我今不宜起如此心,一切諸法皆非是持,我今云何橫生戀著?於是法中我若戀著,我是愚癡、我是不了、我是顛倒。所以者何?如佛所說,以戀慕故而生染著、以染著故而取境界、以愚癡故則不能了善、不善法,以是因緣當墮惡道。』復作是念:『我今不宜生如是心,於危脆法而生隔礙。若生隔礙則不堪忍,由不忍耐便生瞋恚,以生瞋故為諸聖人之所呵責、一切同學而生毀呰、所不稱歎。』作是觀已,於憎恨境善修憶念而安樂住。

「云何菩薩於阿蘭若而安樂住?菩薩摩訶薩作如是念:『夫阿蘭若,無諍三昧之所居處。此阿蘭若多有天、龍、夜叉、乾闥婆等得他心智、證知我心及心數法。是故,我今於此林中不宜起諸不善思惟。』於一切法若能不生不善思惟,觀行得成、多修善法。

「云何菩薩於村聚落、國城、都邑而作觀察得安樂住?菩薩摩訶薩 行於聚落,脫見是處於出家人不相宜者應遠避之。何等是耶?所謂 若酤酒家、若婬女舍、若國王家、若波羅塞等嬉戲之處,及以飲酒 聚集之處、若白衣群作倡伎樂歌舞之處。凡是出家非所宜者悉遠離 之,是中觀察而安樂住。

「云何菩薩於諸利養、恭敬、名聞而作觀察得安樂住?菩薩摩訶薩 於諸利養、檀越、櫬施、功德事中,於是利養而須自策調伏其心, 勿令貪著、不生愛樂,亦復不生我我所心,所得利養皆與一切困乏 眾生共同平等、普受用之。若藉是緣而得名聞,於是名中亦不自 高、不生憍慢亦不自恣,作如是念:『我今所得如是名聞,不久之 頃自當歇滅,能得名者及所得名一切無常。何有智者於諸虛妄、無 常迅速敗壞、危脆無安立處,而生貪著、起於憍慢、輕蔑他人?』 如是觀察得安樂住。

「云何菩薩於諸如來所制戒律憶念觀察得安樂住?菩薩摩訶薩作如 是念:『於過去世一切如來學此法律已成等覺而般涅槃、於未來世 一切如來學此法律當成正覺而般涅槃、於現在世一切如來亦學是法 今成正覺而般涅槃。』作是觀已,於諸法律至心恭敬,勤求是法, 修行諸善,得安樂住。

「云何菩薩於皮肉心上、中、下品三種煩惱憶念觀察得安樂住?菩薩摩訶薩於皮煩惱而觀察之、肉心煩惱亦觀察之,以觀察故知其因緣——是諸煩惱從何緣生、是諸因緣復依何生——即得知見煩惱因緣則是無明。無明因緣不善思惟。不善思惟復何因生?不聽正法。不聽正法復何因緣?不近善友。如是知已,煩惱因緣、煩惱源由、煩惱境界悉能遠離,得安樂住。

「善男子!如是,菩薩具是十法,在在處處心恒寂靜、得安樂住。

「善男子!菩薩摩訶薩具足十法,著糞掃衣。何等為十?所謂受持 堅固、謙卑堪忍、無疲倦心、無染污心、不見其惡、唯見功德、亦 不自高、不輕蔑人、具足淨戒、感諸天人之所供養恭敬禮拜。

「云何菩薩受持堅固?善男子!菩薩摩訶薩信根成就,內懷清淨, 隨順如來所制法律,若喪身命終不故犯。

「所受持法堅固持已,得謙卑心;謙卑心故,憍慢不生;無憍慢故,摭拾弊壞、世間所棄、異於世俗所著之衣;摭拾得已,浣濯練治,壞其本色,縫納為衣,不生煩惱、不辭劬勞,心無疲倦亦無污染,直為成就所作功德。

「於如是等糞掃衣中不見其惡,謂是糞掃大藍縷哉、過麁弊哉、聚 多虱哉、迮我身哉、出垢污哉。

「以是義故,菩薩觀察於糞掃衣唯見功德——是糞掃衣一切仙聖所經受持,隨於無欲,順於聖種;一切諸佛之所稱歎,不以此緣生我慢心,亦不自高、不輕蔑人。

「若離憍慢即不輕他;不輕他故,戒品具足;戒具足已,一切釋、 梵及諸天眾之所供養、稱嘆、禮拜,一切諸佛之所護念、一切菩薩 之所擁護、人非人等之所恭敬,國王、豪族及諸臣民之所供養、一 切同學之所勸進。

「善男子!如是,菩薩具足十法,著糞掃衣。」

降伏一切障礙菩薩言:「世尊!一切菩薩心地廣大,何緣樂此下劣 麁弊冀掃衣耶?」

佛言:「善男子!一切菩薩欲使一切世間願力自在成就,然諸菩薩 於願力中未成就者,為諸煩惱不得生故,對治法門而修習之。善男 子!汝意云何?如來世尊廣大心耶?弊陋意耶?鄙下心耶?」

對曰:「世尊!我無此辯能答是言。所以者何?世尊!諸佛如來應 現信解非我境界。何以故?唯是世尊了見是法、唯修伽陀了見是 法,諸佛如來無有一法而不知見、不可信者。」

佛言:「善男子!汝意云何?何因緣故,如來世尊於閻浮提人、非人等種種根性、種種信解,於眾生前現弊陋行,及諸天、龍、夜叉、乾闥婆等於其前說光揚稱歎頭陀功德?」

降伏一切障礙菩薩又言:「世尊!為是眾生所應化者而現是事,及諸無量新發心者行菩提行、煩惱未斷,如來為示對治法門。」

「善男子!如是,菩薩得誓願力,但為教導諸眾生故著糞掃衣,非 鄙下心。善男子!以是義故,菩薩摩訶薩著糞掃衣。

「善男子!菩薩摩訶薩具足十法,受持三衣。何等為十?所謂其心知足、而常少欲、遠離貪求、遠離儲蓄、既無所蓄無去失憂、既無失憂離有失苦、離失苦故惡心不生、惡心無故無有愁毒、無愁毒故無所求取、無求取故能得修行,盡諸有流。善男子!以知足故,菩

薩摩訶薩隨宜法服而為自足;以自足故,即得少欲;以少欲故,遠離貪求;離貪求故,無所儲蓄;無儲蓄故,無有失憂;無失憂故, 不生苦惱;無苦惱故,惡心不生;無惡心故,不生愁毒;無愁毒故,無所求取;無求取故,能得修行,盡諸有流。善男子!如是菩薩具足十法,受持三衣。

「善男子!菩薩摩訶薩具足十法,不低昂住。何者為十?所謂不隨 貪欲、不隨瞋恚、不隨愚癡,安隱而住,是名不低昂住;無怨恨 住、無嫉妬住、無慳悋住、無憍慢住、不顯己德住、不求名聞住、 不貪利養住、不輕蔑他住、不自高住。善男子!菩薩摩訶薩具是十 法,無低昂住。

「善男子!菩薩摩訶薩具足十法,行乞摶食。何等為十?所謂發心 利益諸眾生故、次第行乞、無渴愛求、已自知足、性樂分施、無貪 婪想、於所乞食自知限量、趣向助道、巧摶善根、遠離摶想。

「善男子!云何菩薩利益眾生乃至遠離博想?

「善男子!菩薩摩訶薩見諸眾生貧窮困苦、功德微薄、不種善根, 為利彼故行詣乞食。

「若入城郭、若入聚落而行乞時,應善攝念、內善思惟,於諸境界 勿令馳騁,威儀庠序,諸根不動,慎無於放逸,視地七尺低頭而 行,於諸善法勿使心散。

「以如是法次第行乞,不長出手,斂鉢在胸。

「若入大富、長者之家,亦不多求,知量受之,充足是日一食而已,勿妨法事。

「若處多有惡狗、惡牛、惡馬、惡象、種種禽獸來相惱觸,若男、 若女、若小、若大惡口戲調,或相是非、毀呰、誹謗,如是等處悉 皆遠離。

「修行乞法勿渴愛求、勿強逼求,於諸檀越勿起愛慕亦不瞋恨。 「既無渴樂,隨宜所得,已自知足持鉢而還,至所住處安置衣鉢而 洗手足。

「若見佛像而前恭敬、供養、禮拜,然後入寺。

「於所食者分為四分:一分與同學、一分施貧窮、一分與畜生、一 分而自食。

「如是取食,無貪著心、無希望心,隨宜飲食但能持身,莫為過少、莫為過多,於食多少籌量取足。所以者何?若食過少,不能行道;若食過多,睡眠身重亦不堪任學問坐禪。

「夫求道者,皆應正勤而作是念:『懈怠、懶惰何由能得滿助道 法?』

「若能合集助道法已則不著我;若不著我,能自割肉以飴眾生。 「善男子!如是,菩薩具足十法,行乞摶食。 「善男子!菩薩摩訶薩具足十法,唯一坐食。何等為十?所謂坐於菩提道場,一切魔兵為作恐怖而坐不動;於出世座而坐不動;於出世歷而坐不動;於出世智而坐不動;於空三昧而坐不動;覺了諸法而坐不動;於八正道而坐不動;於真實際而坐不動;於如如中而坐不動;於一切智而坐不動。所言一坐,唯是法座,是故名為一坐食也。善男子!如是,菩薩見是十法,唯一坐食。

「善男子!菩薩摩訶薩具足十法,持不再食。何者為十?所謂一食之後無所希望、無所染著,勸食不食,是時、非時悉皆不受;脫能治身種種湯藥所可食者,所謂若蘇、若油、若石蜜、若白蜜、若砂糖、若根、若果,設見他食亦不生瞋、亦不貪樂、亦不悋惜;若菩薩中後不食而病困苦,若以病故恐失壽命、恐廢行道,以無疑心審知是藥能治是病許為受用。善男子!如是,菩薩具是十法,持不再食。

「善男子!菩薩摩訶薩具足十法,住阿蘭若。何者為十?所謂久習 梵行、善解毘尼、諸根不缺、廣博多聞、持戒德業、離著我怖、譬 如野鹿攝身威儀、修身輕利、趣向寂靜、心無愁悶。

「善男子!云何菩薩久習梵行乃至心無愁悶?

「善男子!菩薩摩訶薩出家已來,於正法律具足戒品、三輪清淨、 善解法相、威儀具足、出入以時,凡是如來所示道法上中、下、品 皆悉通達,不復求人、不易可動,不著邪論、一切外典,於佛正法 文義明了。

「犯與不犯懺悔方法無不具知,於所犯者皆悉遠離,恭敬正法,數 數懺悔。

「一切惡法發露改往,是罪源由莫不洞達而遠離之,上中下業、上中下報亦悉了知。

「已信解故,守護正法,眼、耳等根具足,身分無所殘缺。

「住阿蘭若——阿者言無、蘭若謂諍——住山林中不與世諍,於是 林中無相觸惱,不近、不遠,便於乞食。

「是山林中有清淨水,無諸難事,灌洗易得。樹木蔭映,華果豐 足,無惡禽獸。自然石室不過峻阻,登涉無難。

「寂靜閑居,獨而無侶,曾所聞法而誦習之,日夜六時憶念不忘, 聲不高下,誦之勿廢。

「調伏諸根不令馳騁,攝心思惟勿生散亂,恬然自樂受持經典,取 於三相謂止發捨,勿著睡眠。

「脫有國王、大臣、長者及諸人民故來尋詣,應作是言:『善來, 善來。』若至住處,喚大王坐,隨宜坐處。王若能坐,二人俱坐; 王若不坐,莫獨自坐。王若躁動,不就鄙座,應作愛語:『大王! 此山林地甚有利益,持戒道德、多聞沙門是中安止,無怖、無畏、 無劫盜賊。』若是國王安隱寂靜、堪聽說法,而為說之;其若不樂廣分別說,當為略說隨順厭離;其若不樂聽厭離法,當說嘆佛無上功德。

「若諸長者、人民來至,隨其所應為說法要,悉令得生信法之心、 亦使受持三歸戒等,令諸人輩生歡喜心、自利利他。

「已生諸惡及諸煩惱令得滅故,而修多聞、不著於我;不著我故, 住於山林,無憂、無畏、無怯弱想、不生恐怖。

「趣向寂靜,遠離喧雜,獨居如鹿,少欲知足。

「善男子!菩薩居山,不同於鹿怖畏馳走,不取其失。言如鹿者, 遠離郭邑、聚落、居家,其作是念:『近惡人故,或失壽命。』如 是,菩薩離於喧雜——若男、若女、若小、若大——而作是念: 『親近是等,失我宿昔所習善根,勿生散亂。』如是,恒生怖畏心 住故向寂靜,於世間中生厭離心,住山林中唯見功德、唯見寂靜、 唯見畢竟、唯見安樂,無憂愁心、無迷悶心,不近惡友、不障山中 寂定功德、受持修行一切善法。

「善男子!如是,菩薩具是十法,住阿蘭若。

「善男子!菩薩摩訶薩具足十法,依止樹下。何等為十?所謂所依樹下,去於聚落不近不遠、無諸棘刺及毒草木穢雜之處、樹葉不彫、非猿猴處、眾鳥巢處、非惡禽獸所居之樹、無有惡人危難之處,所依樹下身安樂處、心無悶處、安心而止。善男子!如是,菩薩具是十法,依止樹下。

「善男子!菩薩摩訶薩具足十法,坐於露地。何等為十?所謂冬時、夏時、春時不得近於舂場之處、不近樹木非叢聚處、不約山險、莫近江河、不遮寒、不遮風、亦不遮雨、亦不遮熱、不遮霜露一唯除疾病。菩薩摩訶薩若坐露地,身有疾病不堪行法當住寺中,而作是念:『諸佛如來制頭陀法,但為斷除一切煩惱。如佛教法我當奉行,我雖住寺應學正勤,為斷煩惱不得懈怠、散亂、閑住,雖居寺舍不生貪著。』復作是念:『如是寺舍皆是檀越之所起造,利益一切修道之人。是故,我今不應於寺生我所心,雖住寺中恒不離於露地之想。』善男子!如是,菩薩具是十法,坐於露地。「善男子!菩薩摩訶薩具足十法,住屍陀林。何等為十?所謂若在中住多生厭離,恒作死想、作八萬戶蟲所唼食想、作赤血想、作青淤想、作臭穢想、作膖脹想、作血塗想、作膿爛想、作解離想、作骸骨想。

「善男子!菩薩摩訶薩住屍陀林,恒興慈悲憐愍眾生,持戒清淨、 具足威儀、恒習素食、支持活命。所以者何?善男子!是屍陀林有 諸非人依止中住,食人血肉,若見菩薩食魚肉者,而起惡心來相觸 惱。 「善男子!住屍陀林菩薩脫入寺舍,前禮佛塔,次禮大德,問訊上座,恭敬事畢一處而立,於眾僧座不得坐之。何以故?菩薩之法將護世間諸俗人意,是屍陀林住止菩薩翻於世間凡愚眾生,不違眾聖。

「若於私座請菩薩坐,審如是僧心無變異乃可就坐,勿令前人而生 悔心,以卑下心於己身中作旃陀羅想。

「善男子!如是,菩薩具是十法,住屍陀林。

「善男子!菩薩摩訶薩具足十法,宴坐不臥。何等為十?所謂不為 苦身故而坐不眠、不為惱心故不為眠、所牽故不萎身坐、菩薩摩訶 薩凡坐不眠、但為滿足菩提諸行、為一心故、為向正道故、為坐道 場故、為利眾生故、為滅一切煩惱故,坐而不臥。善男子!如是, 菩薩具是十法,常坐不臥。

「善男子!菩薩摩訶薩具足十法,隨宜敷坐。何等為十?所謂於坐之處不過經營、亦不求他而為敷座、不作相貌令他敷座、所坐之處若葉若草隨得而坐、若有地所多諸虫——蟻、蚊、虻、蠅、蚤——作窟住處及闍維處悉遠離之;若消息時,右脇而臥,上下累脚,袈裟覆身,正念專心作光明想;恒作悟想而暫眠臥,不取眠樂、不取脇樂,但調其身;持於四大勿令過困、晝夜用心趣助道法。善男子!如是,菩薩具是十法,隨敷而坐。

「善男子!菩薩摩訶薩具足十法,攝心與理相應。何者為十?所謂 多修不淨觀、多修慈悲觀、多修十二因緣觀、善識污心之法、多修 空相、多修無相、多修攝心、無所願求、恒修不息不令悔恨、具足 戒品。

「善男子!云何菩薩多修不淨觀?善男子!菩薩摩訶薩獨居閑寂,不出人間,隱山林中,一向默念其心調直。令身調直,結跏趺坐,見其支節屈伸俯仰,生厭離心。當觀身內三十六物,念念相次,莫觀皮外。作如是觀:乃至眾生種種飲食美味淨潔——若麁、若好——纔入腹中即成不淨,觸於內火則便臭爛,穢氣逆鼻,一切世間之所不耐。如此之身,一切嬰兒、凡夫、眾生之所戀著,當依聖教以善智慧如實觀之。是故,我今不應愛此臭處之身,以是因緣故厭離之。如是,菩薩多修不淨觀。

「云何菩薩多修慈悲觀?菩薩摩訶薩獨居閑靜具如前說,依前次第 而作是念:『是諸眾生多諸瞋恚、怨憾、忿恨,造諸惡業、結搆怨 家、無緣責主。若於過去、現在、未來一切瞋恚究竟滅已,我方得 坐菩提道場。』作是甚深觀察,思惟真實慈悲,非但口說。

「云何菩薩多修十二因緣觀?菩薩摩訶薩若貪欲生、若瞋恚生、若 愚癡生,作是思惟:『是貪、瞋、癡藉因緣生,而此因緣復藉因 緣,於是諸法因緣所生,無有自性悉是虛妄。何有智者以虛妄法 ——因緣所生——於自己身而作瘡疣?』

「云何菩薩善知污心之法?菩薩摩訶薩觀是污法——若在自心、若在他心——不可量度,為滅是等因緣法故當觀察之。何者是耶?所謂不敬佛、不敬法、不敬僧、不敬戒律、不敬同學——若老、若少並不恭敬——是名染污心法。

「唯重自身、輕蔑他人,於諸境界馳騁散亂,背於涅槃,著於我 見、人見、眾生見、壽者見,執著空見、執著斷見,執常、無常, 憎忿善人,親近凡愚、離持戒者,近破戒眾、伏事惡友,遠善知 識,誹謗諸佛甚深經典,於甚深法生怖畏相,懈怠懶惰,於己身中 生下劣想,無有威德,訥於言語,非處生疑、應疑不疑、不疑而 疑,諸蓋諸結之所纏縛,幻惑世人,間構諂曲,睡眠瞪瞢,唯貪利 養、求於名聞, 恃於姓族, 戀於眷屬, 染於邪見, 恃怙國土、戀慕 群眾,習學呪術、路伽耶陀、世俗文章,捨離正法、廢於道行,於 不善法忽務經營、於功德業不勤其事,憎惡毀呰出家之人,但好歌 詠歎諸女色、稱美少年——若男、若女——不樂寂靜,於阿蘭若愁 憒不樂,於善、不善不知量度,於可尊重不往問訊、親近、供養, 讀誦經典不知時節,於所行處不避譏嫌,於諸戒律若輕若重悉不能 持。於諸惡法皆無怖畏,諸根暗鈍、愚癡障重,心恒躁動、惡業快 利,無所忌難、自恣獨步,横理取法、憂慮愁毒。於色好醜取相評 量、於瞋恚境不修慈悲、於諸貧窮不起憐愍、見疾病苦不生厭離、 見死不怖、住火宅中不欲出離,但經營身不護戒律,於過去中經作 何事、於現在中正作何事、於未來中當何所作?如是境界都無思 惟。於不思議而作思議、於不可量而作限量、所不可求而競勤求、 於非清淨作清淨想、於非出離作出離想、於非正道作正道想、於所 未得謂言已得。『我正多事未得修善。』『我是凡夫那能修行諸聖 道法?』多戀俗務推斥度日,迴避微妙功德善根。於大小乘不能稱 歎,設見信樂佛正法者而誹謗之,樂於鬪諍、好相是非、麁獷惡 口、自大高舉、惡賴罵詈、卒暴忽擾、凌轢於他、說無義語、喜論 人過、所不可說而好說之,樂於戲論,耽著嬉戲。如是等事名染污 法,能染污心而善知之。

「為滅一切諸戲論故,多修於空而入禪定以調其心。

「如是修空,於此境界隨心著處。

「當尋是處,求其體性遂無所有;無所有故,通達於空。

「所緣之境及能緣心並須觀察,作觀察已,心、境二法悉無所有而 诵達空。

「通達空故,為修無相而攝其心入於禪定,一切相貌顯現相似,善 觀察之則見非相。 「既了非相,不得己身則無身相;得無相已,不著己身;不著身故,不得一切外諸境相。

「於諸外境不作分別、不更移心,於內外相心既不動,為滅無相之 相故,於修觀行不生憂喜。

「雖得是定,習氣尚多;為滅習氣恒修是定,心心相續無令休息, 猶如爛火。

「住於奢摩他、毘婆舍那中,毘婆舍那者如實法觀、奢摩他者一心寂默。

「得心定故,後不致悔;不致悔故,生歡喜心。何故歡喜?由戒清淨。一切菩薩具足戒品,清淨攝心與理相應。何以故?持戒清淨故,攝心得成。是故,說名與理相應。

「善男子!如是,菩薩具足十法,攝心與理相應。

「善男子!菩薩摩訶薩具足十法,受持經典。所謂為護正法而往聽聞,不為資生;為護正教勤聽正法,不為利養;為三寶種不斷絕故勤求多聞,不為世利;為欲利益學大乘者而修多聞,不為稱歎;為諸眾生無救護者利益因緣而修多聞;為諸眾生三苦所逼作安樂故而修多聞;為無慧眼諸眾生故令得慧眼而修多聞;為小乘人說聲聞法而修多聞;為大乘人說菩薩道而修多聞;為自得證無上智慧而修多聞,不求下乘而修多聞。善男子!菩薩具是十法,受持經典。

「善男子!菩薩摩訶薩具足十法,受持毘尼。何等為十?所謂了知毘尼并律宗體、毘尼甚深、毘尼微細、犯與不犯、性罪制罪、波羅提木叉、學之本源、聲聞毘尼、菩薩毘尼悉皆了知。善男子!如是,菩薩具足十法,受持毘尼。

「善男子!菩薩摩訶薩具足十法,威儀行處齊整具足。何等為十?所謂於聲聞法已經修學、於緣覺法已經修學、於菩薩法已經修學,如是學已威儀具足;凡是沙門不宜處行皆悉遠離,以是因緣,非處不行、非時不行、非國不行;修行沙門所應行處不失威儀,勿令沙門婆羅門之所譏誚。夫威儀者,與理相應,復勸化他,令住此法,使行法者具諸威儀,庠序細密,內懷相應,無有虛假。善男子!如是,菩薩具是十法,威儀行處齊整具足。

「善男子!菩薩摩訶薩具足十法,心無慳貪亦無嫉妬。何等為十? 所謂自能惠施、復勸他人令行布施、稱歎布施、見他布施起隨喜 心、勸歎成獎令其歡喜。不作是念:『但施於我,莫施餘人;唯使 我豐,不令他得。』應作是念:『令諸眾生得安樂具、種種資生, 若於世間、若出世間具足安樂,我今所為是等眾生利益安樂修諸苦 行。是故,我今於眾生邊不應起諸慳貪、嫉妬。』善男子!如是, 菩薩具足十法,無有慳貪、嫉妬之心。 「善男子!菩薩摩訶薩具足十法,於諸眾生行平等心。何等為十? 所謂於諸眾生業行平等、於諸眾生無忿憾心、於諸眾生平等利益而 行布施、受持禁戒、修於忍辱、勇猛精進、善思禪定、修般若智、 不依二邊而修是心、緣諸眾生起平等心、修行六度令得是法。

「生死火宅眾苦熾然,自得出已,復救餘人令其得出。以心平等, 不生彼此隔礙之想,無有憎愛。

「善男子!譬如長者,其家巨富,唯有六子愛念憐愍而悉平等。是等子息嬰稚愚癡,於事不了,匍匐而戲。是長者宅被火所燒,熾然猛焰炎盛遍起,是等諸子各各東西。善男子!於意云何?是時長者頗作是念:『我今前可且救一子,然後方便救餘子。』不?」降伏一切障礙菩薩對曰:「不也。世尊!所以者何?而是長者於其諸子平等救濟、無有偏心,而隨近者前引出之。」

「善男子!如是,一切眾生之類皆是菩薩之嬰兒也,未了苦樂、無 所知解生死火宅,六道之中各各住處。菩薩摩訶薩隨其善根有成熟 者,前救脫之安置令住清淨法界、生死之外。

「善男子!如是,菩薩具足十法,於諸眾生行平等心。

「善男子!菩薩摩訶薩具足十法,慇懃恭敬供養諸佛。何等為十? 所謂供養於法是供養佛、不以財物是供如來、為作安樂利益眾生、 為欲攝受一切眾生、為欲成就眾生善根、不捨所受清淨禁戒、不廢 一切菩薩行業、如所說法身即能行,如是修行心無疲倦、不捨無上 菩提之心。

「如是恭敬供養諸佛不用財寶,若能修行諸佛正法即供養佛。所以 者何?供養於法則是供養一切如來。

「是法所生利益群品令出世間,若背菩薩所行之業則為身、口相 乖,如所誓願不得成滿,則心疲倦便捨菩提,則不能得利益眾生。 何以故?菩薩摩訶薩求阿耨多羅三藐三菩提,但為利益諸眾生故, 若無眾生亦無菩薩取於正覺。善男子!當如是觀:法即是佛,一切 諸佛法為身故。

「善男子!如是,菩薩具足十法,慇懃恭敬供養諸佛。

「善男子!菩薩摩訶薩具足十法,斷除憍慢。何等為十?所謂出離家居,勤苦求道,親識、朋友、一切眷屬不復相關,何異死人?故無憍慢;改其形相,著壞色衣,而我今者別有所求,故無憍慢;剃頭持鉢,家家乞食活此身故,不生憍慢;以乞食故,生謙下心,如栴陀羅不應憍慢;今我身命寄於人活受他摶食,猶若餓狗人所輕蔑,不應憍慢;我應紹續尊重福田,不應憍慢;令諸同學見而歡喜,不應憍慢;持諸威儀,庠序齊整,不應憍慢;所未得法我當得之,不生憍慢;於弊惡性諸眾生中多修忍辱,不生憍慢住。善男子!如是,菩薩具足十法,斷除憍慢。

「善男子!菩薩摩訶薩具足十法,心多清淨。何等為十?所謂福業所持過去善根、宿因具足、正見具足、不著邪論、不可移動、不事餘師、內懷清淨、無有諂曲、意無貢高、亦不幻惑。其心質直,備諸智慧、諸根明利、離眾障蔽、心行清潔、親近善友、遠惡知識、摧伏憍慢、勤求妙理、於聽法時不伺過失、諸佛功德皆悉了知。善男子!如是,菩薩具是十法,心多清淨。」

降伏一切障礙菩薩言:「世尊!諸佛功德不可思議,我於此法云何得聞、能了知之?」

佛言:「善男子!汝善諦聽,我今為汝說於如來少分功德。」 「唯然,世尊!願樂欲聞。」

佛言:「善男子!如來大慈具足圓滿,於諸眾生悉皆平等——如於 一人慈悲平等,於遍法界一切眾生其心亦爾。

「如虚空界遍於一切眾生界中;如來慈悲遍一切處、無量無邊亦復如是,異於聲聞、緣覺菩薩。

「善男子!諸佛如來說法無盡,於無量劫不可窮竭,種種名字、種種義趣,於無量眾一時一音而為說法,隨其類音各各得解無限無 盡。

「善男子!諸佛如來問答具足。設有一切預眾生類以種種問俱問如來,如來隨其種種類音、種種名字,於一剎那、一念、一時皆悉能答,無滯無礙。

「善男子!諸佛禪定境界無礙。善男子!設有一切眾生之類位階十 地,一時一念俱時入於百千萬億禪定三昧,於諸無量種種三昧皆不 能及如來三昧無邊境界。

「善男子!如來具足無量色身。善男子!設有眾生以如來身應受化者,一念之頃遍於眾生,對其面前而現佛身,隨眾生願,一念之頃 現種種身。

「善男子!如來具足天眼無量境界。善男子!有諸眾生得天眼者, 所見諸色無量無邊諸世界中,如來悉見,如菴摩勒在手掌中。

「善男子!如來無量天耳境界。善男子!設有眾生得天耳者,滿於無量無邊世界,隨其所聞種種音聲,如來能於一剎那頃皆悉得聞是等音聲。

「善男子!如來具足知他心智無邊無盡等於虛空。善男子!設有一切諸眾生界種種覺觀、種種思惟、種種業行,如來能於一念之頃悉能了知無量無邊一切諸心,及所造業并業果報,於三世中以無礙智悉皆了知。

「善男子!如來恒在禪定不曾忘失。所以者何?佛無失念,諸根不動、內心無亂。何以故?一切煩惱、煩惱習氣畢竟盡故,恒在寂靜。善男子!有煩惱人內心迷亂,不得禪定;如來不爾。夫如來

者,無復煩惱、無復塵累,無漏、無為,得一切法,自在遊於一切 甚深三昧境界。善男子!如來設住隨一威儀中、隨一三昧中,乃至 涅槃,常住其中無有動移,故常在三昧。

「善男子!諸佛如來於無量劫備修諸行得成正覺,不可思量、不可思議、無有邊限。」

降伏一切障礙菩薩言:「世尊!如來不於無量劫中修功德耶?」 佛言:「善男子!莫作是說。何以故?菩薩摩訶薩不應思量如來境界。如來境界不可思量,但為淺近諸眾生等說三僧祇修習所得,而 實菩薩發心已來不可稱計。」

降伏一切障礙菩薩言:「世尊!幸甚。是等眾生修諸善根、已滅業障、多生信解、近於菩提,聞佛功德心生歡喜,何況聞已盡能受持、讀誦、解說、書寫、供養?世尊!是等眾生不久當得如來功德,無異今日。」

佛言:「善男子!如是,如是。如來攝受是等眾生,於諸佛所已種 善根、恭敬承事於無量佛,是等眾生聞佛功德不生疑惑。

「善男子!若善男子、若善女人七日七夜無餘思想,內心不亂,念 念相續,憶持如來如是功德甚深微妙,著淨潔衣,設諸供養,心心 成就,是七日內即見如來三十二相色身具足。若有散亂、不平其事 而恒一心,於臨死時如來現身立在其前。」

降伏一切障礙菩薩言:「世尊!頗有眾生聞佛所說如來功德生不信耶?」

佛言:「善男子!有諸眾生聞佛說是如來功德,以其惡口麁獷罵 詈、生瞋恚心、於說法者生怨家想,以是因緣,捨身之後生於地 獄,受無量苦。善男子!有諸眾生聞佛功德生歡喜者,於說法人生 善友想、生如來想。善男子!是等眾生信最極理,已於過去曾聞如 來如是功德。是等眾生於大眾中而作是說:『我於過去曾聞如來說 佛功德,無異今日經中所說。』」

爾時,世尊出長舌相以覆其面、覆於面已復覆其頂、覆於頂已復覆於身、覆於身已覆師子座、覆師子座已復覆菩薩及聲聞眾、覆聲聞眾已復覆釋梵四天等眾,如是普覆大眾等已而縮舌相,問大眾言:「如來世尊有此舌相,頗復能作妄語不耶?善男子!汝等當信如來

一如來世尊有此古相,頗復能作妄語不耶?善男子!汝等富信如來 所說必非虛妄。若信此經,於未來世為汝等故,長夜利益,安樂無 盡。」

大乘寶雲經卷第五

二諦品第六

爾時,世尊復告降伏一切障礙菩薩摩訶薩言:「善男子!菩薩摩訶薩具足十法,善解世諦。何等為十?所謂假說有色,非第一義故,得於色法而不執著;假說受、想、行、識,非第一義故,雖得於熟而不執著;假說地界,非第一義故,雖得是界而不執著;假說取人,非第一義故,雖得眼入而不執著;假說耳、鼻、舌、身、意入,非第一義故,雖得意入而不執著;假說可求,非第一義故,雖得是我而不執著;假說眾生,非第一義故,雖得是等而不執著;假說世間,非第一義故,雖得世間而不執著;假說世法,非第一義故,雖得世法而不執著;假說世法,非第一義故,雖得世法而不執著;假說菩提,非第一義故,雖得菩提而不執著得菩提者。「善男子!假名言說名字、論量,名為世諦,於世法中無第一義。

「善男子! 假名言說名字、論量,名為世諦,於世法中無第一義。 雖然,若離世法,第一義諦不可得說。善男子!菩薩摩訶薩於是法 處善解世諦,而不名解第一義諦。

「善男子!菩薩摩訶薩具是十法,善解世諦。

「善男子!菩薩摩訶薩具足十法,善解第一義諦。何等為十?所謂 具無生法、具無滅法、具不壞法、具不增不減不出不入法、具離境 界法、具無言說法、具無戲論法、具無假名法、具寂靜法、具聖人 法。所以者何?善男子!夫第一義,不生、不滅,不敗、不壞,不 增、不減,文字章句所不能說、不可詮辯,絕於戲論。

「善男子!第一義者,無言、無說,本性清淨,一切聖人內自證 得。若佛出世、若不出世,法性常爾,不減、不增。善男子!為是 法故,一切菩薩剃除鬚髮、著壞色衣,以善心故,遠離親屬、往空 閑處出家修道,精進耐苦如灸頭然,但為求得是妙法故。

「善男子!若無有此第一義諦,所修梵行皆悉無用,佛出於世亦復無用。善男子!是故,汝當知有第一義諦。有第一義諦故,說諸菩薩解第一義。

「善男子!菩薩摩訶薩具是十法,善知第一義諦。

「善男子!菩薩摩訶薩具足十法,善解十二因緣。何等為十?所謂 諸法空虛無實、厄縛危脆、如水中月、如鏡中影、如谷中響、如 夢、如幻、無暫時停、搖動不住、藉因緣生,皆悉知之。 「作是觀察:『是等諸法一切空虛,無有真實,如是危脆乃至藉因緣生、見生住滅。』復更思惟:『以何因緣是等法生?以何因緣是等法滅?』作是觀已,即知無明為是等法作生因緣,無明所生、無明源由、無明根本,依因無明諸行法生;行緣於識,以識因緣假說名色;名色立已而說六入;因於六入,觸方得生;觸因緣故,生於三受;受因緣故,嬰兒、凡夫生渴愛苦;渴愛因緣而取四取;緣於四取而有接續,有因緣生;以生因緣,老、死、憂、悲、苦、惱等生,純是大苦共相聚集。

「以是義故,聰明智者應當勤求滅是無明、破裂無明、拔無明根令不復生。無明滅故,一切諸法因無明者皆滅無餘。猶若命根,命根滅時一切諸根皆悉隨滅;無明滅時,一切諸法依無明者悉皆隨滅。無明滅故,煩惱不生;無煩惱故,不生六道。何以故?生死因緣已滅盡故,是故能得於大涅槃,常樂我淨。

「善男子!如是,菩薩具足十法,善知十二因緣。

「善男子!菩薩摩訶薩具足十法,知於自身。何等為十?善男子!菩薩摩訶薩作是觀察:『我今此生,何等種性?婆羅門性耶?剎利性耶?居士大家性耶?若卑劣性耶?若下賤性耶?』

「若生豪族、大富家者,莫恃怙之而生憍慢;若生下賤、貧窮家者 而作是念:『我於前世種是業緣,致使如是貧窮果報。』以是因 緣,多修厭離。

「生厭離故,樂求出家。得出家已作是觀察:『我今出家正何所為?』即知出家自能度脫方度他人,以是因緣,不應懈怠、不宜賴 惰。

「作是觀已:『我得出家,何等不善未滅盡者?若滅是法則生歡喜。』以是因緣,為滅是法勇猛精進。

「復作是念:『何等善法可得增長?以增長故,當生歡喜。』為諸 善法增長因緣勇猛精進。

「復作是念:『依何等師,一切善法而得增長、一切不善而得盡滅?』以是因緣,依止師僧——若多聞者、若不多聞,若持戒者、若不持戒——恒生尊想,如敬諸佛。而於和上阿闍梨邊恭敬尊重、至心承事亦復如是,而作是念:『藉師僧力,諸助道法所未滿者能令得備、煩惱未滅能令滅盡。』是等人邊生和上想,至心承事,生大歡喜,於善法中而修順行、於不善法逆之而行。

「復作是念:『我師是誰?』作如是觀則得知之:『夫我師者,是一切智、說一切法、憐愍世間、有大慈悲、是大福田、為天人師。』以是因緣,當生歡喜,復作是念:『幸甚,幸甚。我今已得最上勝利,能示於我學道正法,若失壽命亦不敢犯所受之法。若能不犯則是供養諸佛如來,隨順而行。』

「復作是念:『我今受誰飲食供養?』若豪富家、若貧窮家,令如是等飲食供養生大果報、生大利益,當受是等飲食供養。復作是念:『是等施主——若貧、若富——以何等心供養於我、供給飲食?』如是知之:『是等施主今謂我輩是出家人、行沙門法,作福田想、作持戒想、作生善想、作滅惡想。是故,我今不違彼心,受持沙門戒律、德業、出家福田、諸功德事。』而作是念:『無始生死我應度之,我今已得出家入道、行沙門行,則是我初度於生死;我當進修沙門德業,即是第二我渡生死。我今勇猛不敢懈怠,但為得是清淨法故。如是,無始無量生死我應度之。』

「善男子!如是,菩薩作是觀察則知己身。

「善男子!菩薩摩訶薩具足十法,了知世間。何等為十?所謂於傲恨者而生謙卑、於憍慢者而生恭敬、於諂曲者自行質直、於妄語者自修諦語、於惡口者自說愛言、於麁強者而自柔軟、於磣毒者多修忍辱、於惡賴者多修慈心、於困苦者多修悲心、於慳惜者多修喜捨。善男子!如是,菩薩具足十法,了知世間。

「善男子!菩薩摩訶薩具足十法,生淨佛土。何等為十?所謂戒品清淨,無隙、無雜、無瑕、無疵;於諸眾生起平等心;功用無二,具大善根;遠離利養、恭敬、名聞,心無染污;信根成就,心無疑惑;勇猛精進,不暫懈怠;具足禪定,心不散亂;多聞分別,不習邪論;具足利智,不生鈍根;自然多慈,不習瞋恚。」降伏一切障礙菩薩言:「世尊!具足十法生淨土耶?若不具足亦得

生乎?」 佛言:「善男子!於此十法設有一法而得具足,不隙、不雜,不 瑕、不疵、清淨明白,一切諸法悉皆具足。所以者何?具足十法得 生淨土,非不具足。

「善男子!如是,菩薩具足十法,生淨佛土。

「善男子!菩薩摩訶薩具足十法,不受胎生染污。何等為十?所謂 起造如來形像、治理故敗佛塔、於佛塔廟恒施塗香、洗浴佛像、於 佛塔廟掃灑泥塗、供養父母洗浣摩拭、供養和上闍梨同學一無希望 心、所修善根如是迴向而作是言:『以此善根,願諸眾生不受胎 生,得清淨生、無染污生。』以深心故。善男子!如是,菩薩具是 十法,不受胎生;唯除願力。

「善男子!菩薩摩訶薩具足十法,出離家居。何等為十?所謂無所戀著;不混雜住;背於貪境;遠離渴愛,不染塵勞;於佛正法隨順奉行;努力精進,善學知足;隨宜衣裳、隨宜飲食、隨宜臥具、隨宜湯藥;鉢盂、法服、資生什物不作儲畜;於諸塵境恒生怖懼;趣向寂靜,修道不廢。善男子!如是,菩薩具足十法,出離居家。

「善男子!菩薩摩訶薩具足十法,淨命自活。何等為十?所謂遠離 貢高諂佞利養、遠離相貌、遠離摩揣、不橫求財、離非法財、離不 淨財、不戀著財、不為利養之所污染、不渴愛求、於如法財尚生知 足。

「善男子!云何菩薩遠離貢高諂佞利養?菩薩摩訶薩不為利養作身 貢高、口貢高、心貢高。云何不作身貢高?菩薩摩訶薩若見檀越施 主之時,不自作身異相威儀、徐步而行現寂靜相、觀前一尋示如愁 苦、或作任運如非虛假,是身貢高皆悉不作。云何不作口貢高?菩 薩摩訶薩不以利養之因緣故安徐軟語,及以愛語、出隨順語,如是 口貢高皆悉遠離。云何心貢高?菩薩摩訶薩若有施主欲以財物而為 供養,口示少欲而其內心甚願多取。善男子!此則名為內懷中熱 一一所謂口稱無貪,心實欲得。

「云何遠離相貌?菩薩摩訶薩若見檀越,不作是相——示我衣鉢多有破壞、乏諸湯藥——現其闕少而以求施,口無所言。

「云何遠離摩揣?菩薩摩訶薩若見檀越,不作是說:『某甲檀越施 我此物,我以恩德報答彼施。』

「不作此言: 『令前施主知我持戒、知我多聞、知我少欲,我以慈悲受彼嚫施。』不作抑揚方便皷動。

「云何菩薩離橫求財?菩薩摩訶薩不作身瘡、不作心瘡而求財物。 言身瘡者,為財物故不憚劬勞、四方役身、疾急<mark>忽</mark>務、違於戒律; 言心瘡者,於諸同學減利養者多生嫉妬。

「云何菩薩離非法財?不以輕稱小斗欺誑於人、不以詐親及諸欺罔 而求財物。

「云何菩薩離不淨財?菩薩若於塔物相關、法物相關、僧物相關, 絓是不與、非隨喜者,悉不受用。

「云何菩薩不戀財利?菩薩摩訶薩若得財物,不作我所、不謂是 財、不作積聚,於時節中迴施之者、供養父母及諸親識、諸眷屬 等,於時節中復須自用。

「得此財時,不生染著;不得財時,亦不周慞亦不渴仰,於施主邊 不起惡心、不取過失。

「於如法財與眾共得,佛所稱歎、菩薩大士所不譏嫌、天神光揚、 同學歡喜,以此財物知足而住。

「善男子,如是,菩薩具足十法,淨命自活。

「善男子,菩薩摩訶薩具足十法,心不疲倦。何等為十?所謂但為 利益眾生善因緣故,住在生死不覺疲倦;為利益眾生故,受生死苦 不覺疲倦;為勸眾生令修善法不覺疲倦;為同眾生諸事業故而不疲 倦;為小乘眾說聲聞道而不疲倦;於聲聞人而不憎惡;修助道法而 不疲倦;為滿菩提行不生疲倦;願求涅槃,不取涅槃;行菩提行, 心不暫息。善男子!如是,菩薩是具十法,心不疲倦。

「善男子!菩薩摩訶薩具足十法,奉行佛教。何等為十?所謂遠離一切放逸,住無放逸;善自守護,不作身之惡業;善自守護,不作 口之惡業;善自守護,不作心之惡業;恒畏惡道,遠離一切諸不善 法;諦說道理,離諸非道;恒說正法,毀諸非法;遠離鄙業,隨順 德業;不污如來正法戒律;遠離一切煩惱毒臭,廣護佛法;於不善 法常守自心。善男子!如是,菩薩具足十法,奉行佛教。

「善男子!菩薩摩訶薩具足十法,姿顏光悅,面無顰蹙。何等為十?所謂諸根澄淨、諸根清淨、諸根光徹、諸根無染、諸根皎潔、遠離忿恨、遠離諸使、無復結縛、離蓋怨憾、離諸瞋恚。善男子!如是,菩薩具足十法,姿顏光悅,面無顰蹙。」

降伏一切障礙菩薩言:「世尊!如我解佛所說之義,諸根淨故,菩薩摩訶薩顏色和悅;離煩惱故,面無顰蹙。」

佛言:「如是,如是。善男子!如汝所說,諸根淨故,菩薩摩訶薩 顏色和悅;離煩惱故,面無顰蹙。

「善男子!菩薩摩訶薩具足十法,多聞具足。何等為十?所謂生死熾然,婬欲猛火菩薩摩訶薩如實知之、瞋恚猛火如實知之、愚癡亂心如實知之、諸行無常如實知之、三界皆苦如實知之、世間空虚如實知之、諸法無我如實知之、世間虛誑、著於妄想、受生分別如實知之、一切諸法藉因緣生如實知之、涅槃寂靜如實知之。是三無性、聞思修慧如實知已,不但音聲分別說其名字而已。雖如是知,發增廣心,興大慈悲,誓願堅固,為諸眾生拔苦根、栽正勤勇猛。善男子!如是,菩薩具足十法,多聞具足。

「善男子!菩薩摩訶薩具足十法,受持正法。何等為十?所謂於末世時、後五百歲正法滅時,如來經教諍訟競起,無量眾生行於邪道,智燈欲滅、無示導者,微妙甚深修多羅經——廣大之義、有大威德、是一切法摩德勒伽(此云法母)——而能受持、讀誦、宣說、恭敬供養;亦能為他顯示其義、廣為解釋、令得易解;於行法者生大歡喜,善護念之;心無希望、樂聽正法;於說法人生世尊想、於正法中生甘露想、生妙藥想;不惜身命求於正法,得正法已努力修行。善男子!如是,菩薩具足十法,受持正法。

「善男子!菩薩摩訶薩具足十法,生法王子。何等為十?所謂以相嚴身具隨眾好、微妙修飾諸根滿足、隨於如來所行之道、住在如來境界之處、覺了諸佛不退還法、善能救濟眾生苦難、善能習學眾聖軌則、善能遊觀四無量心、眾梵住處如來所居、一切智城能隨鎮之。善男子!如是,菩薩具足十法,生法王子。

「善男子!菩薩摩訶薩具足十法,釋梵四王之所奉迎。何等為十? 所謂不退菩提之心、一切眾魔不能惱亂、於佛正法不動不搖、深入 諸法微妙祕藏、隨順一切法平等智、於佛法中不隨他語、於佛法中 得無礙智、不同一切聲聞緣覺、於諸世間而登上首、安隱住於不生 法忍。善男子!如是,菩薩具足十法,釋梵四王之所奉迎。

「善男子!菩薩摩訶薩具足十法,知諸機性。何等為十?所謂有諸眾生性多婬欲如實知之、若瞋恚性、若愚癡性、若剛強性、若中庸性、若善軟性、若磣毒性、若弊急性、若遲緩性如實知之、如知一人遍眾生界亦如是知。善男子!如是,菩薩具是十法,知諸機性。「善男子!菩薩摩訶薩具足十法,善知成熟眾生。何等為十?所謂若以佛色身應得度者即為示現如來色身、若以菩薩色身應得度者即為示現聲聞身、應以帝釋身應得度者即現帝釋之身、若以魔身應得度者則現魔身、若以於身應得度者則現於身、若以養羅門身應得度者則現魔身、若以於身應得度者則現於身、若以婆羅門身應得度者即現婆羅門身、若以剎利王身應得度者即為現身、若以長者居士身應得度者即為現之。善男子!隨因隨緣、種種方法,但令眾生得成熟者,隨其因緣則為現之。善男子!如是,菩薩具足十法,成熟眾生。

「善男子!菩薩摩訶薩具足十法,堪任正法。何等為十?所謂質直柔軟、無諂曲心、善調伏心、無垢污心、內心清淨、性無麁踈、無瞋恚心、遠離麁獷、心多忍辱、具足堪任法王子位。善男子!如是,菩薩具是十法,堪任正法。

「善男子!菩薩摩訶薩具足十法,安樂共住。何等為十?所謂正見 具足、淨見具足、戒品具足、威儀清淨、行於所宜境界、無煩惱 住、動止細密、同學和睦、每事有分、行一乘道無餘師範。善男 子!如是,菩薩具足十法,安樂共住。

「善男子!菩薩摩訶薩具足十法,善修攝法。何等為十?所謂以利益施攝受眾生、以安樂施攝受眾生、以無盡施攝受眾生、以利益說、以實義說、以正法說、以道理說、以利益事、以資生供給事、以財物利益事攝受眾生。

「善男子!利益施者,謂法施也;安樂施者,是財物施也;無盡施者,示正道理;利益說者,勸令修善;實義說者,謂不倒說;正法說者,隨順佛教所攝之法;道理說者,不違實際;利益事者,迴於不善、令住善處;資生供給事者,若飲、若食;財物利益者,謂金、銀、琉璃、真珠、玻琍、琥珀、珊瑚、瑪瑙、象馬車乘、所須之物。

「善男子!菩薩具足十法,善修攝法。

「善男子!菩薩摩訶薩具足十法,端正具足。何等為十?所謂威儀 庠序、於四威儀悉非虛偽、見之可愛、猶若秋月、見之生樂、視不 知足、悅人內心、於諸眾生無憎惡者、眾生見者無不歡喜、眾生見 者發清淨心。善男子!如是,菩薩具足十法,端正具足。

「善男子!菩薩摩訶薩具足十法,能為眾生之所依止。何等為十? 所謂擁護眾生於煩惱畏、將領眾生出於生死稠林曠野、濟度眾生於 生死海、孤獨眾生為作親眷、於諸煩惱疾病眾生為作醫王、無救護 者為作救護、無料理者為料理之、無歸依者為作歸依、於無洲無渚 能為洲渚、無趣向者為示趣向。善男子!如是,菩薩具足十法,能 為眾生之所依止。

「善男子!菩薩摩訶薩具足十法,喻大藥樹。何等為十?所謂如大藥樹——名曰善見——疾病眾生隨意得用,根、莖、枝葉、皮肉、華果,若見、若嗅、若甞、若觸,無不痊愈。善男子!菩薩若爾,從初發心見諸眾生為諸煩惱種種疾病,布施治療、戒、忍、精進、禪定、般若,若得見聞菩薩功德、若得親近、若得其味,病無不差。善男子!如是,菩薩具是十法,喻大藥樹。

「善男子!菩薩摩訶薩具足十法,福業相應。何等為十?所謂於三寶處隨力治理;於諸眾生有疾病者布施湯藥;於飢饉者布施飲食;若有眾生寒熱所逼,施其溫涼;於和上阿闍梨深心供養、恭敬承事;於諸同學禮拜奉迎送去,合掌問訊,作和睦事;處處建立伽藍園林,應時布施米穀、財物及諸倉庫;於諸奴婢、僕使、下隷施其飲食、衣裳、湯藥而擁護之;時時往詣持戒多聞沙門親近禮拜。善男子!如是,菩薩具是十法,福業相應。

「善男子!菩薩摩訶薩具足十法,善能變化。何等為十?所謂於一佛剎不動不搖,則能遍於諸佛剎土諮稟如來;於一佛剎不動不搖,往詣諸佛無量剎土供養承事彼佛世尊;於一佛剎不動不搖,往詣諸佛無量剎土行菩提行,令得滿足;於一佛剎不動不搖,往詣諸佛無量剎土,彼土菩薩成等覺時詣彼供養、恭敬、禮拜;於一佛剎不動不搖,往詣無量諸佛剎土現自成佛;於一佛剎不動不搖,往詣無量諸佛剎土現般涅槃;於一佛剎不動不搖,往詣無量諸佛剎土現般涅槃;於一佛剎不動不搖,往詣無量諸佛剎土現般涅槃;於一佛剎不動不搖,往詣無量諸佛剎土,彼有眾生應得度者悉為變化,作諸神通令得度脫,雖作變化而無思惟、亦無分別。」

降伏一切障礙菩薩言:「世尊!云何菩薩作諸變化?云何不思惟? 云何無分別耶?」

佛言:「善男子!我今為汝說於譬喻。如此日、月照了四洲,為是 眾生而作利益,而是日、月無有思惟亦無分別。以光明故利益眾 生,但以過去業行、因緣、果報故,有如是日、月利益事生。善男 子!菩薩亦爾,雖作變化利益眾生,皆無思惟、悉無分別,不作功 用運是業行。所以者何?是等變化皆由菩薩善業因緣之所成故。菩 薩於因地中行菩薩時發弘誓願,以本願力而不思惟亦不分別,生諸 變化不加功用。

「善男子!菩薩摩訶薩具足十法,速得成阿耨多羅三藐三菩提。何等為十?所謂萬行,具如前說。夫萬行者,布施具足、戒品具足。言戒品者,不隙、不雜、不瑕、不玼,過於聲聞、緣覺戒品,清淨明白。戒品具足、忍辱具足、精進具足、禪定具足、善慧具足、善巧方便具足、善願具足、諸力具足、微妙甚深正智具足、所修妙智具足。不共一切聲聞、緣覺,過其境界,從於菩薩初地以上乃至九地,過境界故。善男子!菩薩具足十法,速得成於阿耨多羅三藐三菩提。」

大乘寶雲經卷第六

寶積品第七

爾時,佛告寶積菩薩言:「善男子!有四種法,退失菩薩智慧。何謂為四?於佛正法無尊重心,亦不恭敬是說法者;慳嫉正法,設有人來求正法者而不為說;於樂法者為作留難,遮護覆藏,自生憍慢;復加誹謗說正法者。寶積!如是四法退失智慧。

「善男子!有四種法,增長菩薩摩訶薩廣大智慧。何等為四?所謂敬重正法及說法者;隨所聽得微妙正法,廣為他人分別解說,不求名聞、無希望心而為說法;勤求正法如救頭然;隨所聞聽堅固受持、如法修行,不但說是名字而已。善男子!如是四法,增長菩薩廣大智慧。

「善男子!具有四法,而皆忘失菩薩摩訶薩大菩提心。何等為四? 所謂不隨順和上阿闍梨一切福田、他人不疑而為作疑、見行大乘者 而誹謗之、自心欺誑復誑於他。善男子!如是四法,失菩提心。

「善男子!有四種法,菩薩摩訶薩生生世世大菩提心自然現前,中間不失乃至坐於菩提道場。何等為四?所謂若失身命終不妄語乃至戲笑;知而不說虛妄之言;於諸眾生起平等心,心無欺誑亦不誑他;於諸菩薩生世尊想,不樂小乘故。善男子!如是四法,生生世世大菩提心自然現前,中間不失乃至坐於菩提道場。

「善男子!具四種法,菩薩摩訶薩一切善根不得生長。何等為四? 自生憍慢、勤求世間文章呪術、勤求利養貪著名聞、以欺誑心而誑 於他。善男子!具是四法,菩薩摩訶薩一切善根永不增長。

「善男子!具有四法,菩薩摩訶薩生生世世增長善根,轉勝明淨,不復退失。何謂為四?捨離一切不淨之法,勤求一切清淨正法,夫正法者,所謂六波羅蜜菩薩法藏;於諸眾生心無憍慢,猶若家犬;如法受施而自知量,捨離一切諸邪慢等,安心知足住於聖種;不說他人罪過虛實,不求人短。若於諸法心不通達,亦於世世增長善根,轉勝明淨,不復退失。

「善男子!菩薩有四種諂曲之心,常應捨離。何謂為四?於諸佛法心生疑、悔、不決了等,於諸不毀謗當作是念:『唯佛作證。佛法無量,為諸眾生隨機所說;甚深難解,唯佛自知,非我所解。』是故,不生違逆之心。善男子!是名四法令眾生生憍慢心、瞋恨惱等、於他利養起嫉妬心、呵罵菩薩、廣其惡名。善男子!是名四種諂曲之心,菩薩摩訶薩常應捨離。

「善男子!菩薩摩訶薩具有四種真實之相。何等為四?所謂於所犯 罪終不覆藏,向他發露懺悔、改往,心無蓋纏;若以實言應失國 土、身命、財物,如是急事不捨實語,亦不異緣作諸餘語;一切惡 事、罵詈、誹謗、撾打、繫縛、種種傷害,受此苦時但自咎責、推 於往業,不瞋恨他、不懷其惡,善住信力、自心淨故;若於諸佛甚 深之法——難信、難解——悉能信受、讀誦、受持。善男子!是名 菩薩有四真實質百之相。

「善男子!具有四法,[怡-台+龍]悷難調難伏之相。何謂為四?讀 誦經典翻為戲論,雖口說法不隨順行,於諸教誨違逆不信;不能隨 順恭奉供養和上、闍梨諸福田等令心喜悅;損他信施、恭敬供養, 自違本誓而受信施;見諸調御菩薩大士輕欺生慢而不恭敬。善男 子!是名菩薩有四種法,[怡-台+龍]悷難調難伏之相。

「善男子!菩薩有四調順之相。何謂為四?隨所聞法而善說之,如 說而行,依止於法、不依言說;承奉師教能知意旨,易與言語,所 作皆善不失師意;不退戒、定,以調順心而受供養;見諸善調信順 大士恭敬愛樂,隨順善訓,稟受德行。善男子!是名菩薩有四調順 之相。

「善男子!菩薩有四僻謬。何謂為四?不可信人與之同意是菩薩 謬、非器眾生說甚深法是菩薩謬、樂大乘者為說小法是菩薩謬、若 布施時但施持戒供養善者不施惡人是菩薩謬。善男子!是名菩薩四 種僻謬。

「善男子!菩薩有四正道。何謂為四?於諸眾生生平等心、普信眾生等以佛慧、於諸眾生說法平等、等令眾生等住正行。善男子!是 名菩薩有四正道。

「善男子!菩薩有四非善知識、非善等侶。何謂為四?求聲聞者, 但欲自利;求緣覺者,心樂少事;歎外經典、路伽耶陀、文章嚴 飾;所親近者,但增世利、不慕法利。善男子!是名菩薩有四非善 知識、非善等侶。

「善男子!菩薩有四善知識、四善等侶。何謂為四?諸來乞者是善知識,道因緣故;能說法者是善知識,增長善故;勸令出家是善知識,出三界苦;諸佛菩薩是善知識,增長一切正妙法故。善男子! 是名菩薩四善知識、四善等侶。

「善男子!菩薩有四實非菩薩而似菩薩。何謂為四?貪求利養而不求法、貪求名稱不求功德、貪求自樂不救眾生、以滅苦法樂聚徒眾不樂遠離。善男子!是名四非菩薩而似菩薩。

「善男子!有四種真實菩薩。何謂為四?能信於空亦信業報、知一 切法無有吾我而於眾生起大悲心、深樂涅槃而遊生死、所作布施皆 為眾生不求果報。善男子!是為菩薩四種真實菩薩功德。 「善男子!菩薩有四大藏。何謂為四?若有菩薩值佛出世,因爾得聞六波羅蜜及其義趣,以無礙心侍說法者、不暫遠離、心無懈怠、住阿蘭若而無放逸。善男子!是名菩薩有四大藏。

「善男子!菩薩有四種法,能壞魔事。何謂為四?常不捨離菩提之心、於諸眾生心無罣礙、於諸執著悉皆覺知、心不輕賤一切眾生。 善男子!是名菩薩有四種法,能壞魔事。

「善男子!菩薩有四不可思量福德行業。何謂為四?以清淨心而行 法施、於破戒人生大悲心、於諸眾生稱揚歎詠菩提之心、於無力者 修習忍辱。善男子!是名菩薩有四不可思量福德行業。

「善男子!菩薩有四種法,破碎煩惱、無明住地。何謂為四?戒品清淨——若輕、若重——悉皆不犯、攝持正法不憚劬勞、布施燈明供養福田、捨施財物無有親踈,是名四法破碎煩惱、無明住地。

「善男子!有四種法,得無礙智。何謂為四?無希望心常行法施、 受持正法與理相應、於他利養不生嫉妬、恒自攝心不生憍慢,是名 四法得無礙智。

「善男子!非但名字號為菩薩,能行善法、行平等心名為菩薩,若能成就三十二法則名菩薩。何謂三十二法?常為眾生深求安樂,皆令得住一切智中,常自稱量無上法器,心不憎惡他人智慧,破壞憍慢,深樂佛道,心地堅固敬無虛假,親友究竟得至成佛,於親、非親心常平等,言常含笑、言語知量、前應問訊面無顰蹙,所為事業終不中息,普為眾生等行大悲,心無疲倦,多聞無厭,自責己過、不譏彼短,於有罪者慈悲呵責,以菩提心行諸威儀,所行布施不求反報、不求生處而行持戒、於諸眾生生無礙忍、為修一切諸善根故勤行精進、遣無色界取於禪定、行方便慧應四攝法,持戒、毀戒慈心平等,至心聽法,心樂遠離,住阿蘭若而不樂著一切世間種種榮華,於大乘中見大利益,離惡知識、親近善友,常運平等,四種梵心,遊戲五通,常依真智,於諸眾生一一邪行、正行一一俱不棄捨,言常決定貴真實法,一切善根以菩薩心而為上首。若人具此三十二法則得名為菩薩之位。

「善男子!菩薩功德無量無邊,當以譬喻因緣知之。善男子!譬如 大地容受眾生,無分別心、不求報恩;菩薩亦爾,從初發心至坐道 場,一切眾生皆蒙利益,心無分別、不求報恩。

「善男子!如一切水潤生百種稻禾、藥草、叢林、樹木皆得增長; 菩薩亦爾,自心淨故,慈悲普覆潤諸眾生,皆令增長一切善法。

「善男子!譬如火種皆能成熟百種禾穀、藥草、華果;菩薩智慧亦 復如是,皆能成就一切善根。

「善男子!譬如風輪皆能成立一切世界諸佛剎土; 菩薩方便亦復如是, 皆能成立一切善法。

「善男子!如月初生,光明炎色日日增長;菩薩淨心亦復如是,一 切善法日日增長。

「善男子!如日初出,一時發光普為一切眾生照明;菩薩亦爾,發智慧光,一時普照一切眾生。

「善男子!如師子王,隨所至處不驚不畏;菩薩亦爾,持戒清淨,智慧真實,隨所住處不驚不畏。

「善男子!譬如善調大龍象王,荷負重擔身不疲極;菩薩亦爾,善 調心故,荷負一切眾生之類,作大利益而無疲倦。

「善男子!譬如蓮華生於水中,水不染著;菩薩亦爾,生於世間, 諸世間法而不染污。

「善男子!如人伐樹,根在還生;菩薩亦爾,方便力故,雖斷結使有善根愛還生三界。

「善男子!譬如諸方流水入于大海皆為一味;菩薩亦爾,以種種門 習諸善根,迴向阿耨多羅三藐三菩提皆為一味。

「善男子!譬如須彌山王,忉利諸天及四天王皆依止住;菩薩大菩提心亦復如是,為薩婆若所依止住。

「善男子!如大國王,以群臣力能辦國事;菩薩智慧亦復如是,以方便力皆能成辦一切佛事。

「善男子!譬如天淨清明,無諸雲氣必無雨相;寡聞菩薩無所知 解、無法雨潤亦復如是。

「善男子!譬如天陰雲起必能降雨, 充足眾生生長萌牙; 菩薩亦爾, 從大悲雲起大法雨利益眾生。

「善男子!如轉輪聖王所出之處則具七寶;菩薩亦爾,隨所出處三十七品現於世間。

「善男子!如摩尼珠所在之處,則有無量金、銀、珍寶;如是,菩薩隨所出處則有無量百千聲聞、辟支佛寶。

「善男子!如忉利天入雜藏園,隨意所用悉在其中;菩薩亦爾,真 淨心故,於諸眾生平等教化。

「善男子!譬如呪術藥力, 毒不能害; 菩薩結使亦復如是, 智慧力故不墮惡道。

「善男子!如大城中所棄糞穢,若置甘蔗、蒱萄田中則有利益;菩薩結使亦復如是,所餘習氣為一切智而作因緣。

「善男子!譬如有人不曾習學戈矛之法則無武用;菩薩亦爾,不曾 習學一切諸法而不能為算擇分別,受持修行。

「善男子!譬如陶師,於諸坏器未燥之時不堪大火;菩薩亦爾,於諸眾生智慧微弱不堪聽聞諸佛大法故不為說,彼設得聞則生狂亂。

「善男子!菩薩摩訶薩欲學寶雲微妙經者,常應修習實法正觀。云何正觀?所謂真實思惟是法正觀,不觀我、人、眾生、壽命,是名

中道直實下觀。

「善男子! 夫實觀者,觀色非常亦非無常,亦觀受、想、行、識非常亦非無常,是名中道真實法觀。所以者何?常是一邊、無常一邊,常與無常二邊中間無色、無形、無命、無知,是名中道諸法實觀;我是一邊、無我一邊,我與無我二邊中間無色、無形、無命、無知,是名中道諸法實觀。

「善男子!若心有實是為一邊、若心非實是為一邊,若無心識、亦無心數諸大地法,是名中道諸法實觀。如是,善法、不善之法,世間諸法、出世間法,有罪之法、無罪之法,有漏、無漏,有為、無為,乃至有垢、無垢亦復如是,離於二邊而不可取亦不可說,是名中道諸法實觀。善男子!有是一邊、無是一邊,有無中間無色、無形、無命、無知,是名中道直實法觀。

「善男子!我之所說十二因緣:無明緣行、行緣識、識緣名色、名色緣六入、六入緣觸、觸緣受、受緣愛、愛緣取、取緣有、有緣生、生緣老、死、憂、悲、苦、惱,如是因緣而為招集成大苦聚。若無明滅故行滅、行滅故識滅、識滅故名色滅、名色滅故六入滅、六入滅故觸滅、觸滅故受滅、受滅故愛滅、愛滅故取滅、取滅故有滅、有滅故生滅、生滅故,如是,老、死、憂、悲眾惱大苦聚滅。明與無明無二、無別,若如是知,是名中道諸法實觀。如是,行及非行、識與所識、名色可見及不可見、諸六入非六入、觸及所觸、受及受滅、愛與愛滅、取與取滅、有與有滅、生與生滅、老死與老死滅皆是無二、無別,若如是知,是名中道諸法實觀。

「復次,善男子!夫真實觀,不以空故令諸法空,法性自空;非無相故令法無相,法性之體本自無相;不以無願令法無願,但諸法性本自無願;不以無起、無生、無我、無取、無性令法無起、無取、無性,但法本來自無起、無取、無性。若如是觀,是名實觀。

「復次,善男子!非無人故名之曰空,但空自空;前際、後際、中際亦空,但法自空。非色滅空,當依於空、莫依於人。若以得空而依於空,佛說是人則為退墮。

「善男子!寧起我見積如須彌,莫以空見起增上慢。所以者何?一切諸見以空得脫,若起空見則不可治。

「善男子!如醫授藥令治彼病,是藥在內祕而不出。於意云何?如是病人寧得差不?」

「不也。世尊!是藥不出,其病轉增。」

「善男子!如是諸見唯空能滅,若起空見則不可治。譬如有人怖畏虚空,悲號搥胸,作如是言:『却此虚空。』於意云何?如是虚空可除却不?」

「不也。世尊!」

「善男子!如是,若畏空法,我說是人狂亂失心。所以者何?常行空中而畏於空。

「譬如畫師自手畫作夜叉鬼像,見則怖畏,迷悶躄地;一切凡夫亦 復如是,自造色、聲、香、味、觸故往來生死,受諸苦惱不自覺 知。

「善男子!譬如幻師幻作猛虎,幻虎成已還食幻師;行道沙門亦復如是,有所觀法皆空、皆寂、無有見者,是觀亦空。

「善男子!譬如兩木本無火相,以兩相揩從中火生遂燒是木。善男子!如是真實觀故,生聖智慧;聖智生已,遂滅實觀。

「善男子!譬如然燈,一切黑暗皆自無有,無所從來、去無所至, 非東方來、去亦不至,南、西、北方、四維、上、下,不從彼來、 去亦不至。而此燈明亦無是念:『我能滅暗。』但因燈明,法自無 暗。明、暗俱空,無作、無取。善男子!如是,實智慧生、無智自 滅,智與無智二相俱空,無作、無取。

「善男子!譬如千歲暗室未曾見明,設復有人於中然燈。於意云何?暗寧作念:『我久住此,不欲去也。』」

「不也。世尊!若燈然時,是暗無力,必當滅去。」

「善男子!如是,百千萬劫久集結業,以一觀智即皆能滅。其燈明者,聖慧根是;其黑暗者,諸結業是。

「善男子!譬如種植空中,若能增長無有是處;菩薩取證亦復如 是,增長佛法亦無是處。

「善男子!譬如種植在於良田則能生長,斯有是處;菩薩亦爾,有諸結使雜世間垢能長佛法。

「善男子!譬如於彼高原陸地不生蓮華;菩薩亦爾,於無為中不生佛法。

「善男子!譬如卑濕污泥乃生蓮華;菩薩亦爾,生死污泥、邪定眾 生能生佛法。

「善男子!譬如四大海水生蘇滿中;菩薩有為善根甚多無量亦復如 是。

「善男子!譬如若破一毛以為百分,以一分毛取海一滴;一切聲聞 有為善根亦復如是。

「善男子!譬如虫芥子孔所有虛空;一切聲聞有為智慧亦復如是。 「善男子!譬如十方虛空無量無邊;菩薩有為智慧亦復如是。

「善男子!譬如轉輪聖王有大夫人懷妊七日,是子具有轉輪王相, 諸天尊重過餘諸子具身力者。所以者何?是胎王子必紹尊位,繼聖 王種。善男子!初心菩薩亦復如是,雖未具足諸菩薩相,如胎王 子,諸天、神、王深心尊重。所以者何?如是菩薩必紹尊位,不斷 佛種。 「善男子!譬如一琉璃珠勝於水精;菩薩亦爾,從初發心便勝一切 眾生之類。

「善男子!譬如大王夫人生子之日,小王、群臣皆來拜謁;菩薩亦爾,初發心時,諸天世人所應禮拜。

「善男子!譬如雪山王,諸藥草遍無所屬、無所分別,隨有所病悉 能療治;菩薩亦爾,所集智藥無所分別,普為眾生平等救護。

「善男子!如月初生,眾人愛敬踰於滿月。善男子!如是,眾生信我語者,愛敬菩薩甚於如來。所以者何?由諸菩薩生如來故。」爾時,世尊復告寶積菩薩摩訶薩言:「善男子!菩薩摩訶薩常為利益一切眾生修集梵行、清淨功德、無上善根,以平等心施與眾生,所得智藥遍到十方療治一切煩惱病苦,皆令畢竟,永不復起。

「云何名為菩薩智藥?謂不淨觀治於貪欲、以修慈心治於瞋恚、以 因緣觀治於愚癡、以修空觀治諸妄見、以無相觀治諸憶想分別境 界、以無願觀治於一切生三界願、以四非倒治於四倒、以無常觀治 無常中計常顛倒、以修苦觀治諸苦中計樂顛倒、以法無我治無我中 計我顛倒、涅槃寂滅治不淨中計淨顛倒。

「身、受、心、法四念處觀則為對治四種顛倒——順身相觀不墮我 見、順受相觀不墮我見、順心相觀不墮我見、順法相觀不墮我見 ——是四念處能治一切身、受、心、法,開涅槃門。

「以四正勤能斷已生諸不善法、不起未生諸不善法、未生善法悉能 令生、已生善法能令增長。舉要言之,能斷一切諸不善法、成就一 切諸善之法。四如意足治於身心一合之相,令得如意自在神通。以 此五根治諸無信、懈怠、失念、亂心、無慧一切眾生,以此五力摧 諸煩惱,以七覺分治諸法中疑悔妄謬,以八正道治諸邪道一切論 師。

「善男子!是為畢竟智慧妙藥,菩薩常應修集、殷勤行之。

「善男子!閻浮提內,耆婆醫王最為第一。令三千大千世界一切眾生皆如耆婆,若有人問心中結使、煩惱、邪見、疑悔病藥,尚不能答,何況能治?菩薩於中應作是念:『我終不以世藥為足,我當修習出世智藥,亦修一切善根福德。』如是,菩薩得智藥已,遍到十方畢竟療治一切眾生煩惱等病。

「何謂菩薩出世智藥?信知諸法從緣合生,信一切法無我、無人,亦無眾生、壽命知見,亦無作者、亦無受者,信解通達無我我所。 於是空法無所得中不驚不畏,勤加精進而求心相,菩薩摩訶薩如是 求心。

「何等是心?若貪欲耶?若瞋恚耶?若愚癡耶?若過去、未來、現 在耶?若心過去,過去已滅;若心未來,未來未至;若心現在,現 在無住。是心非內、非外亦非中間,是心無色、無識、無形、無 見、無知、無住處。如是之心,十方三世一切諸佛不已曾見、非今 現見、非當來見。若一切佛過去、來、今所不見者,云何當有?但 以顛倒妄想因緣,心生諸法種種差別。

「善男子!是心如幻,憶想分別,起種種業、受種種身。

「善男子!心去如風,於非境界遠行難收;心如流水,生滅不住;心如燈炎,眾緣故有;是心如電,剎那不停;心如虛空,客塵煩惱之所障蔽;心如獼猴,取一、捨一,遍諸境界;心如畫師,能造種種業因緣故;心無暫定,隨逐種種諸煩惱故;心唯獨一,無第二故;心如大王,一切諸法增上主故;心常獨行,無伴侶故;心如怨家,能作一切諸苦惱故;心如狂象踏小兒諸土舍,能壞一切諸善根故;是心貪著如魚吞鈎,於苦受中生樂想故;是心如夢,於無我中生我想故;心如青蠅,於不淨中起淨想故;心如債主,生苦楚故;心如惡鬼,求人便故;心常高下,貪、瞋逼故;心如偷劫,奪善根故;心常貪色,如蛾投火;心常貪聲,如戰鼓響;心常貪香,如猪樂廁;心常貪味,如駝愛蜜;心常貪觸,如蠅著油。

「善男子!菩薩如是求於心相而不可得,若不可得則非過去、現在、未來;若非過去、現在、未來則出三世;若出三世則非有、無;若非有、無則是不起;夫不起者則是無性;若無性者則是無生;若無生者則是無滅;若無滅者則無所離;若無離者無來、無去、無退、無生;若無來去、無退、無生則無諸行;若無諸行是則無為;若無為者,是為一切諸聖根本,是中無有持戒、破戒;若無持戒、無破戒者,是則無行亦無非行;若無有行、無非行者,是則無有心心數法;若無心心數法者,則無有業亦無業報;若無有業、無業報者則無苦樂;若無苦樂是則聖性,是中無業、無起業者,無有身業亦無意業,是中無有上、下差別。

「聖性平等,猶若虛空;是性平等,無有優劣,一切諸法等一味故;是性平等,遠離一切身心相故;是性遠離一切諸法,順涅槃故;是性清淨,遠離一切煩惱垢故;是性無我,離我所故;是性真實,順如如故;是性寂靜,常安樂故;是性無有高下,從平等出故;是性真實,第一義故;是性無盡,畢竟不生故;是性常住,諸法常爾故;是性安樂,涅槃第一故;是性清淨,離一切相故;是性無我,求不可得故。

「善男子!汝等應當內善觀察,莫外馳騁。

「善男子!當來沙門,如狗逐塊。云何名為如狗逐塊?譬如有人以塊擲狗,狗即捨人而走逐塊。如是,善男子!有諸沙門、清信士女,怖畏色、聲、香、味、觸故,住阿蘭若空閑之處,獨無等侶,離眾憒間,身離五欲而心不捨。是人存念色、聲、香、味、觸等,心貪樂著而不內察,不知云何當離五塵。以不知故,有時來入城

邑、聚落、在人眾中還為五欲之所繫縛。若空閑處持有漏戒,死得生天,又為天上五欲所縛。從天上墮,終不得脫於三惡道——所謂地獄、畜生、餓鬼——是名沙門如狗逐塊。

「善男子!云何沙門不如於彼逐塊之狗?若有沙門為人所罵而不加報,打害、瞋毀亦不報之,但自內責、求伏於心,作如是觀:『罵者是誰?受者是誰?打者、害者、毀者、瞋者亦復是誰?』是名沙門不如於彼逐塊癡狗。

「善男子!如調馬師,馬若[怡-台+龍] 候即為制伏;行者亦爾,隨心所向則能收攝,不令放逸。

「善男子!譬如有人咽喉閉塞則能斷命;如是,善男子!一切諸 見,唯有我見則能斷於智慧命根。

「善男子!譬如有人隨所縛處而求解脫;如是,善男子!隨心所著當應求解。

「善男子!出家之人則有二種不淨污心。何謂為二?一者、讀誦世間文章、外道諸術,二者、多畜諸好衣鉢、種種服飾。

「又,出家人二種堅縛。何謂為二?一、執著縛,二、供養縛。

「又,出家人二種障法。何謂為二?一者、親近白衣,二者、憎惡 善友。

「又,出家人有二種垢。何謂為二?一者、忍受煩惱,二者、求諸 檀越。

「又,出家人二種雹雨。何謂為二?一者、毀壞善根,違逆正法; 二者、以破戒身受他信施。

「又,出家人二種癰瘡。何謂為二?一者、求顯他過,二者、自覆 其罪。

「又,出家人二種燒熱。何謂為二?一者、以垢穢心愛著法服,二者、持戒人邊受其供養。

「又,出家人有二種病。何謂為二?一者、懷增上慢而調伏心,二者、破壞他人發大乘心。

「善男子! 夫沙門者凡有四種。何謂為四? 一者、形相詐現沙門, 二者、威儀欺誑沙門, 三者、求名沙門, 四者、實行沙門。

「何謂形相詐現沙門?有一沙門形相具足——服僧伽梨,剃除鬚髮,執持應器——而便成就不淨身業、不淨口業、不淨心業,不善護身、慳嫉懈怠、破戒懷惡,是名形相詐現沙門。

「何謂威儀欺誑沙門?有一沙門具足沙門身四威儀,行、立、坐、 臥一心安詳,斷諸美味,修四聖種,遠離眾會憒閙之所,言語柔 軟。如是德行欲為欺誑、不為寂靜,而於空法見有所得、於無所得 而生怖畏如臨坑想、於說法者而生忿怒如怨賊想,是名威儀欺誑沙 門。 「何謂名聞沙門?有一沙門偽作相貌、現行持戒,欲令人聞;努力讀誦,欲令他知自為多聞;獨處閑靜不餘雜間,欲使人知住阿蘭若;少欲知足修遠離法,欲得人知我是厭離。不為寂靜、不為得道、不為沙門及沙門果、不為涅槃微妙勝果,是則名為求名沙門。「善男子!何謂實行沙門?有一沙門於自身命尚不生貪,何況利養、名聞等事?於空、無相、無取之法,聞大歡喜,順達真如,隨說而行。不為涅槃而修梵行,豈樂三界無樂之處?空尚不執,何況我見、眾生人見?依止於法而求解脫——夫求解脫不外馳騁——見一切法本來無垢、畢竟清淨,但依自身、不依於他。於佛法身尚不執著,何況色身?以空遠離而不見法,何況貪著音聲、言說?以無為法尚不見僧,何況當見有和合眾?於諸法中無所斷除、無所修行,不生生死、不著涅槃,知一切法本來寂滅,不見有得、不求解脫,是名實行沙門。

「如是,善男子!汝等當學實行沙門,莫著名字,空無利益。

「善男子!譬如貧窮下賤之人強為作字名為富貴。於意云何?是貧賤人稱此名不?」

「不也。世尊!」

「如是,寶積!雖為沙門而無沙門實行之德,如彼貧人空荷名字。 「善男子!譬如有人漂溺海中渴乏而死。如是,寶積!有諸沙門雖 多讀誦種種經典,而不能止貪、恚、癡渴,在法水中煩惱渴死,墮 諸惡道。

「善男子!譬如醫王多畜眾藥,自身有病而不能治;多聞之人有煩惱病亦復如是,雖有多聞,不止煩惱,何能自利?

「善男子!譬如有人服王貴藥,不能將節為藥所害;多聞之人有煩 惱病亦復如是,得好法藥,不能修行自害慧命。

「善男子!如摩尼珠墮不淨中,未即可用;多聞之人貪著利養,未 能利益一切天人。

「善男子!譬如死人著金瓔珞;多聞破戒而被法服、受他供養,亦 復如是。

「善男子!如長者子——若男、若女——淨自洗浴,剪除爪甲,以香自熏,著新淨衣,寶飾、華鬘莊嚴身首。如是,寶積!多聞之人受持淨戒而被法服、受他供養,亦復如是。

「善男子!有四種破戒似善持律。何謂為四?設有一人具足持戒, 大小罪中心常怖畏,所聞戒法皆能履行,身、口、意業悉皆明白, 正命清潔,如是之人說有我論,是初破戒似善持律。善男子!復有 一人誦持戒律,隨所說行,身見不滅,是二破戒似善持律。善男子!復有一人具足持戒,取眾生相而行慈心,聞一切法本來無生心 大驚怖,是三破戒似善持律。善男子!復有一人具足修行十二頭 陀,見有罪相,是四破戒似善持律。

「善男子! 夫持戒者,無我、無我所,無作、無非作,無有作法、亦無作者,無行、無非行,無色、無名,無相、無非相,無成、無不成,無取、無捨,無可取、無可棄,無眾生、無眾生名,無心、無心名,無世間、無非世間,無依止、無非依止,不以持戒而自矜高,亦不輕蔑毀破戒者,亦不憶想分別此戒。

「寶積!是名聖戒、無流之戒、不著三有無所依戒。」 爾時,世尊欲重宣此義而說偈言:

「清淨持戒者, 無垢、無所有, 持戒無憍慢, 亦無所依止, 持戒無愚癡, 亦無有諸縛, 亦無有違失。 持戒無塵污, 持戒心善軟, 畢竟常恒寂, 遠離於一切, 憶想諸分別。 解脫諸亂念, 是淨持佛戒, 不貪惜身命、 不用諸有生, 修習於正行、 安住於下道, 是名為佛法, 堅實淨持戒。 亦不依世法, 持戒不染世, 埭得智慧明, 無暗、無所有, 無我、無彼想, 已知見諸相, 是名為佛法, 真實淨持戒。 無有此彼岸, 亦無有中間, 於無此彼中, 亦不有所著, 無縛、無諸漏, 亦無有欺誑, 真實淨持戒。 是名為佛法, 心不著名色, 不牛我我所, 是名為安住, 直實淨持戒。 雖持諸戒行, 其心不自高, 亦不以為上, 過戒求智慧, 是名為真實, 清淨持戒相。 不以戒為最, 亦不貴三昧, 過此二事已, 修習於智慧。 空寂無所有, 是諸賢聖性, 如是淨戒者, 諸佛所稱美。 心脫於身見, 除滅我我所,

信解於諸佛, 所行空寂法, 如是持聖戒, 則為無有等。 依戒得三昧, 三昧能修慧; 依因所修慧, 逮得於淨智; 已得淨智者, 具足清淨戒。」

佛說是語時,五百沙門不受諸法,心得解脫;三萬二千人遠塵離垢,得法眼淨;五百沙門得於禪定,聞此深法心不信解、不能通達、不入內懷,從座而起還干山林。

爾時,大迦葉前白佛言:「世尊!是五百沙門皆得禪定,不能信解入深法故,從座起去。」

佛語大迦葉:「是諸沙門以增上慢,聞是清淨無流戒相,不能信解、通達了知。佛所說偈,其義甚深,不入內懷。所以者何?諸佛菩提極甚深故。若無福德、未種善根、隨逐惡友,多不能信受此深法。迦葉!是五百人於過去世迦葉佛時外道弟子,往到佛所欲求佛過,聞佛說法得少信心而自念言:『是佛希有,快說妙法。』以是善心福德因緣,命終之後生忉利天。從彼墮落生閻浮提,於我法中而得出家。是諸沙門深著諸見,聞說深法不能信解,而不隨順、不能通達。以聞深法因緣力故,得大利益,不以此生更墮惡道,當用此身得入涅槃。」

爾時,世尊告長老須菩提言:「汝往就彼諸沙門邊為教誨之,令其得解。」

長老須菩提對曰:「世尊!是等沙門於佛所說尚不信受,豈能信受 於我語耶?」

是時,如來即為化作二沙門像,隨逐如是五百沙門所遊道路。是諸沙門見是二人而問之曰:「汝何去耶?」

答曰:「我等欲去就阿蘭若,住於山林閑寂之處修禪定樂。所以者何?佛所說法殊不可解。」

諸沙門言:「長老!我等聞佛說法亦不能解,故欲入山修學禪 定。」

時化沙門而對之曰:「我等當離自高逆心,應當求解佛所說義。所以者何?無高、無諍是沙門法。長老!如佛所說,涅槃之名空無所有。誰得涅槃?為何所滅?何法當名為涅槃耶?於此身中頗有我、人、眾生、壽者、作者、士夫、弗伽羅等得涅槃耶?」

又問:「何法名涅槃耶?」

諸沙門曰:「長老!貪、瞋、癡盡故涅槃耶?」

化沙門曰:「長老!是貪、瞋、癡可盡滅者當何處有?」

諸沙門曰:「是貪、瞋、癡,非內、非外,亦非中間。若無憶想、 處妄分別,是貪、瞋、癡亦不得生。」

化沙門曰:「長老!若爾,不須分別。長老!若不分別,貪、瞋、 癡等豈得生耶?

「是貪、瞋、癡若不更生,是名寂靜,不為生死、不為涅槃。

「長老!以戒、定、慧、解脫、解脫知見不生、不滅。長老!如是 等法顯了涅槃,是等諸法性相空寂,不取、不捨。長老!當滅此相 謂涅槃想。若於無相而作想解、若於有相而作想解、於此有無而起 想者,是名相縛。長老!應當入於滅受想定,若一能得入滅想定 者、所作已辦,則為滿足更無餘事。」

爾時,長老須菩提問諸沙門言:「汝等向者為何處去?今何來耶?」

諸沙門曰:「長老!佛所說法,來無所從、去無所至。」

又復問曰:「汝等沙門云何聽法?」

沙門答曰:「不為繫縛、不為解脫。」

又問:「汝等沙門習行何法?」

答曰:「不為得故、不為失故。」

又問:「誰調伏汝?」

答曰:「身無決定、心無所著,有此二者能調伏我。」

又問:「汝等云何解脫?」

答曰:「不斷無明、不生明故。」

又問:「汝等為誰弟子?」

答曰:「無證、無覺,是彼弟子。」

又問:「汝等幾何當入涅槃?」

答曰:「猶如如來所作化人,其入涅槃,我等當入。」

又問:「汝等已得己利耶?」

答曰:「自利不可得故。」

又問:「汝等所化已得辦耶?」

答曰:「我及我所不可得故。」

又問:「汝等修梵行耶?」

答曰:「於三界中不行亦非不行,是我梵行。」

又問:「汝等煩惱盡耶?」

答曰:「一切諸法畢竟盡故。」

又問:「汝等破魔眾耶?」

答曰:「陰魔不可得故。」

又問:「汝等承事如來耶?」

答曰:「不以身、心故。」

又問:「汝等住福田耶?」

答曰:「無有住故。」

又問:「汝等斷於生死諸往來耶?」

答曰:「無常斷故。」

又問:「汝等斷諸行耶?」

答曰:「無礙解脫故。」

又問:「汝等究竟當至何所?」

答曰:「隨於如來化人所至。」

於是,長老須菩提問沙門時,五百沙門不受諸流,心得解脫;三萬二千人遠塵離垢,得法眼淨。

爾時,會中有菩薩摩訶薩名曰普明,在大眾中合掌恭敬而白佛言:「世尊!菩薩欲學是寶雲經,當云何學?」

佛言:「善男子!汝當勤心學此經典。何以故?諸佛如來說此寶雲 微妙經典,但為實行有善根者大利益故。

「善男子!譬如有人乘土坏船欲渡大河。善男子!於意云何?以何精進乘是坏船?是人得渡如是大河?」

對曰:「世尊!以大勇猛精進力故。所以者何?是人念言:『我今漂溺四種大流,莫於中間是船破壞。』勇猛精進乃可得渡。」 佛告普明菩薩摩訶薩言:「菩薩亦爾,欲學此法當勤精進倍過於 此。所以者何?是身無常、無有決定,難信、難養,必當敗壞、不 得久住、終歸磨滅,未得法利勿令於中而破壞故。我在大河為渡眾

生於四流故,常習法船往來生死度諸群品。「云何菩薩習於法船?謂平等心於諸眾生為船因緣,習無量善以為

率厚,清淨戒行以為板障,布施及果以為裝飾,信心佛道為諸林木,一切福德以為校具,慈、悲、喜、捨堅固繫縛,忍辱柔軟憶念為釘,諸菩提分堅強精進,最上妙善諸法林中出生如是不可思議無量禪定、功德、業慧,善寂調心以為師匠,畢竟不壞大悲所攝,以四攝法廣度致遠,以智慧刀防諸惡賊,善權方便種種諸法,合集奉行以為裝飾,四正念處以為樓櫓,四正勤行以為人力,四如意足以為疾風,五根善察以為船師,五力強壯以為防備,七覺覺悟能破魔賊,八直正道隨意到彼,離外道法,止為調御,觀為利益,不著二邊,有因緣法甚為安隱,大乘廣博、無盡辯才、廣布名聞能濟十方一切群品,而自唱言:『汝等當來上我法船,從安隱道得至涅槃,度於斷常到無為岸。』

「善男子!如是,菩薩摩訶薩常應修習如是法船,以是法船——無量無邊百千萬億船——於阿僧祇劫在生死中度脫漂沒長流眾生。」

佛復告普明菩薩摩訶薩言:「善男子!又有法行能令菩薩疾得成佛,謂諸所行真實不虛,厚習善法,身心清淨,不捨精進,樂近光明,修善根故;常正憶念,樂善法故;多聞無厭,具足慧故;破碎憍慢,增益智故;除滅戲論,具功德故;樂住山林,無爭競故;不處憒閙,離惡友故;深求諸法,決定依於第一義故;求於智慧,通達真實諸法相故;求於空法,所行正故;求於遠離,永寂滅故。「如是,善男子!是為菩薩摩訶薩獲得速成諸佛神通,當如是學,如是修行。」

爾時,長老摩訶迦葉復白佛言:「希有。世尊!如是寶雲微妙經典,大為利益一切天人無量無邊。若善男子、善女人於此大乘寶雲經典,受持、讀誦、若為人說、若稱善哉,及諸幢幡、華香、燈燭而供養之,乃至讀誦一四句偈,而不誹謗、歡喜信受,是人得福無量無邊。所以者何?財施果報但在三界,法施之力出於三界,無老、病、死,得涅槃樂。設有女人能誦此經,彼則離於四種惡趣,從今以去永不復受女人之身;轉女身已得成男身,聰明智慧,生正信家,當速得成如來法身三十二相、八十種好、金剛不壞真實之身。」

大乘寶雲經卷第七

CBETA 贊助資訊

(https://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".